


განმარტოებული

საბჭოთა



საბჭოთა

განმარტოებული „საბჭოთა საქართველო“

თბილისი — 1966

8Г2

899.962.1.092 [ტაბიქე, გ]

ჩ 695

ამ წიგნის ავტორი წლების განმავლობაში მუშაობდა გალაკტიონთან და ასრულებდა ლიტერატურული მდიენის მოვალეობას.

წინამდებარე ნაშრომში ის მოგვითხრობს გალაკტიონთან ვატარებულ დღეებზე: როგორ მუშაობდა გალაკტიონი, როგორი იყო დიდი პოეტი შინ და გარეთ; გვაცნობს გალაკტიონის შეხედულებებს პოეზიაზე, ხელოვნებაზე და ქართული ლექსის ფორმებზე.



გალაკტიონი ჩვენსას

როგორც ყოველთვის, გალაკტიონის მოსვლამ დღეს (26 მარტი 1950 წ.) ჩვენს ოჯახში დიდი სიხარული გამოიწვია. საყვარელი პოეტი ჩვეული თავაზიანობით მიესალმა ოჯახის ყველა წევრს. ერთხანს თავისუფალი საუბრით გავერთეთ.

მერე გალაკტიონი და მამაჩემი საწერ მაგიდას მიუსხდნენ და შეუდგნენ მასალების შერჩევას „რჩეულისათვის“¹. მეც იქვე ვიყავი და ზოგ რამეში ვეხმარებოდი მათ. თან ვცდილობდი გალაკტიონის ყოველი სიტყვა, ნაკვთის ოდნავი მოძრაობაც კი აღბეჭდილიყო ჩემს მეხსიერებაში.

ჩემი შთაბეჭდილებები იმავე დღეს გადამქონდა ხოლმე ქალაქიდან და, ამრიგად, წელთა მანძილზე დიდძალი საინტერესო მასალა დამიგროვდა.

აი ამ ჩანაწერებიდანაა ამოღებული ქვემოთ გადმოცემული ეპიზოდები.

უნდა აღინიშნოს, რომ მამაჩემი — ბენედიქტე ექვთიმეს ძე ჩიქობავა, 1946 წლიდან მოყოლებული, ერთგვარ თანამშრომლობას უწევდა გალაკტიონს: უკეთებდა ლექსების პუბლიკაციებს

¹ გალაკტიონის „რჩეული“, რომელიც 1954 წ. გამოიცა.

რუსულად, შველოდა ახალ თუ წინათ დაწერილ თხზულებათა რედაქტირებაში.

მაგიდაზე მიდევს 1944 წელს გამოცემული გალაკტიონის რჩეული და ის ტომეულები, რომლებშიც მრავალი სიტყვასახეა გადასხვაფერებული, მოწესრიგებულია პუნქტუაცია, უსათაურო ლექსები დასათაურებულია, ნაჩვენებია დაწერის თარიღები.

ეს შესწორებები ფანქრითაა შესრულებული; რამდენიმე ადგილას გვხვდება გალაკტიონის საკუთარი ხელით ჩანაწერი სიტყვა-ფრაზები.

— თქვენ თვითონ ამბობთ, გალაკტიონ:

ნუ მიატოვებ ლექსს უთვისტომოდ,
ღროსი, ეპოქის და სივრცის გარეთ!...

და განა შეიძლება უთარილოდ ლექსის გამოქვეყნება?! — შენიშნავდა ხოლმე მამაჩემი.

ვერ ურიგდებოდა მამა აგრეთვე ლექსის უსათაურობას და ახალ რჩეულში შესატანი არა ერთი უსათაურო ლექსი იქნა „მონათლული“ გალაკტიონისა და მის მიერ.

გალაკტიონი ბეჯითად ასწორებდა თავის ლექსებს, შემდეგ კმაყოფილებით გადაათვალიერებდა აჭრელებულ ფურცლებს და იტყოდა:

— აი, ახლა კი ეს ლექსი უკეთ ეღერს!

უნდა ითქვას, რომ თითოეული შესწორება გალაკტიონს მხოლოდ კარგად ჩაფიქრების შემდეგ შეჰქონდა, სტრიქონებს ბუტბუტით შეადარებდა ერთმანეთს და საუკეთესოს შეარჩევდა.

იმ დღეს შედარებით ცოტა ხანს იმუშავა. დავიდალეო, — განაცხადა და ამის მიზეზი, ალბათ, ისიც გახდა, რომ ვერ შეეგუა დედაჩემის სათვალეს, რომლითაც კითხულობდა, რადგან თავისი არ წამოეღო.

გალაკტიონმა მუშაობას თავი გაანება და მამაჩემთან ერთად სასადილო ოთახში გამოვიდა.

— ვინც მოვიდა, გაუმარჯოს! — შესძახა გალაკტიონმა, როდესაც დედაჩემმა ბოთლებით ლუდი შემოიტანა.

დიდმა პოეტმა ოჯახის დიასახლის-მამასახლისის სადღეგრძელოები წარმოთქვა და მერე ასე მალდღეგრძელა:

— 1950 წელი ნახევარი საუკუნის მიჯნაა და ასეთ დროს იწყება ახალი ძალების გამოჩენა პოეზიასა და ხელოვნებაში... გისურვებ, ჩემო გოგი, გამარჯვებას პოეზიაში!

ჩემი სამი ლექსი წამაკითხა (ერთი მათგანი რუსული იყო). არც ერთი სიტყვა არ ეპარებოდა, რიტმის თავისებურებას საგანგებოდ აკვირდებოდა — მე რომ ვკითხულობდი, იგი დირიჟორივით იქნევდა ხელს.

ჩვენი საუბარი ლიტერატურულ მიმართულებებს შეეხო.

მამაჩემმა 1927 წელს გამოცემული ფუტურისტების ჟურნალი „მემარცხენეობა“ (№1) მომანახინა. გალაკტიონმა წაიკითხა იქიდან რომელიღაც ლექსი და გადამღები სიცილი აუტყდა.

ჩვენც ავყევით, გავმხიარულდით.

როდესაც სიტყვა ჩამოვარდა მწერალ-პედაგოგებზე, დედაჩემმა უამბო გალაკტიონს ზოგი რამ შესანიშნავი მწერლის ვასილ ბარნოვის შესახებ, რომელიც, უკვე მსცოვანი, დედაჩემ-

თან — დარია მიხეილის ასულ თინიკაშვილთან ერთად თბილისის ქალთა ეპარქიულ სასწავლებელში ყოფილა მასწავლებლად.

— მეც ყოფილი მასწავლებელი გახლავართ. სიამოვნებით ვიგონებ ჩემი ახალგაზრდობის იმ წლებს, — თქვა გალაკტიონმა, — მეც ძველი პედაგოგი ვარ. შენ კი, ჩემო გოგი — ახალი. შემდეგ ყველას გადაგვხედა და ისევ მომიბრუნდა, ჭიქა აიღო და მაღალი იდეების დაბადებისა და განხორციელების სადღეგრძელო თქვა.

საუბარი თანდათან უფრო გაცხოველდა და რა და რას არ შეეხო.

— გალაკტიონ, როგორ იყო, პარიზში რომ ვიღაც პოეტი გაკრიკეთ? — შეეკითხა მამაჩემი.

— „ჰოო, ეს იყო 1935 წელს, — ღიმილით დაიწყო გალაკტიონმა. — მოგეხსენებათ, მაშინ პარიზში გახლდით მწერლები ანტიფაშისტური კონგრესის დელეგატებად... სხვათა შორის, ერთი პოეტი გვერია, მესხიერება მლალატობს, გვარი არ მახსოვს. ჰო-და, ამ კაცს თმა ქალურად ჰქონდა მოშვებული. თავისი გაჩეჩილი თმით ამაცობდა. დიახ, ამიტომაც ამოვიღეთ ნიშანში მისი თმა და ერთხელ, როდესაც კაფედან შეზარხოშებულები გამოვედით, ვტაცეთ ხელი და გრძელთმიანი საპარიკმახეროში შევათრიეთ. იქაჩებოდა, არ გვნებდებოდა... ტლინკაობითა და ხელების ქნევით იცავდა სახეზე წამოშლილ თმას, რომელსაც ეტყობოდა მაკრატელი არ ენახა. მაგრამ, ვერაფერს გახდა... პარიკმახერმა, რომელსაც ჩვენ ვშველოდით, ჩინებულად ჩაატარა ოპერაცია. გადაკრეჭილი პოეტი გაგვებუტა, და სამიოდე დღე გაოგნებულივით დაბორილობდა დაკარგულ „მშვენებაზე“ მგლოვიარე“.

შემდეგ ჩვენს ახალგაზრდა პოეტებზე ჩამოვარდა სიტყვა. როცა გალაკტიონს რომელიმე ახალგაზრდა პოეტის ლექსი მოეწონებოდა, პათეტიკურად მიმართავდა ხოლმე: „ვეფხვი ხარ, ვეფხვი!“.

„ვეფხვი“ გალაკტიონის ცოცხალ მეტყველებაში თავისებურად ჟღერდა. ვეფხვის სახეს, რომელიც ქართულ პოეზიაში სიმშვენიერისა და სიძლიერის სიმბოლოა, პოეტი თავისი მეგობრების შესაქებად, გასამხნეველად ხმარობდა, როცა მათი საქციელი მოეწონებოდა, მათი გამარჯვება გაანარებდა. გალაკტიონის ბავით წარმოთქმული „ვეფხვი“ მკაფიოდ ავლენდა ალერსს და სიყვარულს. ამიტომ იყო, რომ პოეტისაგან „ვეფხვობით“ მიმართვა მის მეგობრებს. ეამებოდათ, როგორც გულის სიღრმიდან ამომსკდარი წრფელი ქება, როგორც ძვირფასი მეგობრის ნობათი.

გალაკტიონი როდესაც წერდა

წერისათვის განწყობილი გალაკტიონი განმარტოვდებოდა ხოლმე. ყურადღებითა და ენერგიით აღტყინებული სახით, საშინაოდ გადაცემული მიუჯდებოდა თავის საწერ მაგიდას. რომელზეც მოფანტული იყო წიგნები, უურნალ-გაზეთები, ხელნაწერები, და ერთთავად ჩაეფლობოდა ქაღალდებში.

მთელი დღეობით არავის ღებულობდა, ტელეფონსაც კი გამოთიშავდა. მარტო ოჯახის წევრები თუ შვიდოდნენ მასთან ფეხაკრეფით, რომ საქმელი შეეტანათ. დამაშვრალი პოეტი ცოტას ჭამდა.

სიამაყის გრძნობით უნდა აღვნიშნო, რომ მუშაობაში გარ-

თული გალაკტიონის კაბინეტის კარები ყოველთვის ღია იყო მამაჩემისა და ჩემთვის — ჩვენ მასთან მისვლის მუდმივი „ვიზით“ ვსარგებლობდით.

რამდენჯერ მინახავს, რომ გალაკტიონის კაბინეტში ფანჯრის დარაბა მიხურული იყო და ბნელით მოცულ ოთახს საწერ მაგიდაზე დადგმული ერთი ან ორი სტეარინის სანთელი ანათებდა. შთაგონებული პოეტი წინწახრილი იჯდა და გამალებით წერდა. სანთლის მოლიცლიცე შუქი მის მაღალ შუბლს მკრთალ ნათელს ჰფენდა და ერთგვარ რომანტიკულ რიდედ ებურებოდა იქაურობას.

განა უცნაურობა არ იყო, რომ ელექტრონისა და ატომის ეპოქაში, სინათლის პრიმიტიულ წყაროს იყენებდა დიდი პოეტი უკვდავი სტრიქონების წერის დროს ჩვენს გაკაშკაშებულ თბილისში!..

ეგ თავისი საკვირველი საქციელი პოეტმა ასე ამიხსნა:

— სანთლის შუქი მყუდროებასა და სიმშვიდეს მგვრის, — მხოლოდ ვიწრო არეს ანათებს ჩემ ირგვლივ და ამიტომ ნათლად მარტო საწერ ქაღალდს ვხედავ და მასზე ვახდენ მთელი ჩემი ყურადღების კონცენტრაციას. ისიც უნდა ითქვას, ახალგაზრდობაში სულ ასეთ სინათლეზე ვწერდი... ნათქვამია: ჩვეულება რჯულზე უმტკიცესიაო.

ოლიმპიელის განსახიერება იყო გალაკტიონი შემოქმედების მომენტში ან, მისივე სიტყვებით რომ ვთქვათ, „სულის ცეცხლად გადაქცევის“ დროს, და მის შემხედვარეს უნებლიეთ მახსენდებოდა ხოლმე მისი ლექსი „შემოქმედება“, განსაკუთრებით ის ადგილი, სადაც პოეტი ასე გადმოგვცემს თავის განცლებს, როდესაც იგი შემოქმედებითს პათოსში იმყოფება:

ვბრძანებ: ტყის შქერში გაჩუმდება
ნიავი ნელი,
ვიტყვი და თრთოლვად გადაიქცევა
ვერხვის ფოთოლი...
მზე ჩემთვის ბრწყინავს და მეფე ვარ
ყოვლისმოქმედი,
არე-მიდამო ნეტარების
ცრემლით ივლება,
ჩემს ხელში არის მაშინ ჩემი
მძვინვარე ბედი,
ქვეყნად ყოველი არსის სული
მემორჩილება.

გალაკტიონი ექსპრომტად კმნიდა შესანიშნავ სტრიქონებს.
მისი ყოველი ფრაზა—დიდი ტალანტის ბრწყინვალე გამოსხი-
ვება იყო.

ქუთაისიდან მატარებლით მომავალმა პოეტმა პაპიროსის
კოლოფზე წააწერა:

წყალტუბოდან ქუთაისში მიმავალო ქარო,
თუ მაისის ქუთაისმა გკითხოს-ვინა ხარო,
უპასუხე, რომ სუნთქვა ხარ, არ კი უთხრა — ვისი:
ისეც იგრძნობს ქუთაისი, ჩემი ქუთაისი!

შემდეგ ეს ლექსი ხალხმა აიტაცა და სიმღერად აქცია.

გალაკტიონის ექსპრომტის ამგვარი უსადარო ნიმუშები მა-
ინც მხოლოდ პოეტური ნაპერწკლებია, ხოლო თავის უკვდავ
თხზულებებს დიდი ხელოვანი ზემოთ აღნიშნულ საგანგებოდ
შექმნილ პირობებში და დამშვიდებული სულიერი განწყობი-
ლების ქვეშ წერდა.

დიდოსტატ პოეტისათვის დამახასიათებელი იყო აგრეთვე უბრალო საწერი ხელსაწყოსა და უბრალო ქალაქის გამოყენება. ჩვეულებრივ, გალაკტიონი წერდა ბლაგვი, ულაზათოდ წათლილი ფანქრით ან მოძველებული ავტომატური კალმისტრით.

— კარგი ხარისხის ქალაქზე კარგი ლექსი არასდროს არ დამიწერია. უბრალო ნაგლეჯზე უკეთ ვწერ, ასე მაქვს დაცდილი, — იტყოდა ხოლმე გალაკტიონი ღიმილით.

ამასთან დაკავშირებით მახსენდება 1951 წელს დაწერილი გალაკტიონის ლექსი „ქალაქი“, რომლის გამოქვეყნება საკამათოდ გახადეს ვილაციებმა მხოლოდ იმიტომ, რომ აქ ქარაგმის ენით გაწკებლილია (და მართებულადაც) უნიჭო მჭლახნელები.

ქალაქი და მასთან ერთად უბადრუკი ავტორი ფიქრობს,

რომ ყოველივე
იწყება მისით,
თავდება მისით!

ნამდვილად კი ნაწერის ღირებულება დამოკიდებულია დამწერზე, შემოქმედზე და არა ქალაქზე:

ქალაქი მრავალს
იჩენს მარიფათს,
ქალაქი მოდის
რაგინდრაფერი:
იყო, არის და
ჩაება ღარიბად...
სწერთ? ქალაქია,
სხვა არაფერი!

სიტყვამ მოიტანა — მეტად საგულისხმოა, რომ ამ პატარა, ოცდაოთხტაეპიან ლექსს გალაკტიონმა შედარებით დიდი დრო მოანდომა, რამდენჯერმე გადააკეთა, ათიოდე დღე თვალწინ ედო საწერ მაგიდაზე სხვა გასაჩალხ ხელნაწერთა შორის.

როგორ იზვა „მთაწმიდის მთვარა“

გალაკტიონმა ერთხელ მიამბო, რომ ჯერ კიდევ ახალგაზრდობაში, მას და გიორგი ქუჩიშვილს ქალაქ ფოთის მუშებმა შეხვედრა მოუწყვეს. წინა დღით პოეტებმა დაათვალიერეს კოლხიდის მშვენება ფოთი და პალიასტომის ტბის შემოგარენი. ლამის გასათევად ერთ მუშის ბინაზე მიიწვიეს ორივენი და ცალკე ოთახი დაუთმეს.

გალაკტიონს ძილი არ ეკარებოდა.

გიორგიმ რამდენჯერმე უთხრა, სინათლე ჩააქრე და დაიძინეო, მაგრამ ამაოდ.

ახალგაზრდა პოეტი ფიქრმა გაიტაცა.

ქართველ პოეტებს მომაკვდავი გედის სიმღერის თემაზე, მგონი, არაფერი დაუწერიათ... სიცოცხლეში გედი მხოლოდ ერთხელ მღერის... ისიც სიკვდილის წინ... მხოლოდ მაშინ ებადება თავისი სიმშვენიერისა და სილალის განცდა... იშვიათი მოვლენაა ბუნებაში!.. უნდა ითქვას ეს პოეტური სიტყვით...

ამ ოცნებამ შეიპყრო მგოსანი, და ჩაამწკრივა თოთხმეტმარცვლოვანი ტაეპები.

—არ დაიძინებ, კაცო?!—ერთი პირი ძილის მოთავეების შემდეგ უკმაყოფილოდ შეეკითხა გიორგი.

— მაკალე, თუ ძმა ხარ! — ჩაიბუტბუტა გალაკტიონმა და ლექსის გაჩაღხვას შეუდგა.

სტრიქონები გადაიკაზმა, ზოგი ზევით ავიდა, ზოგმა ქვევით ჩაიწია. შავი ხაზებით გადაისერა რამდენიმე სიტყვასახე და ტაეპი. ლექსი უხვად იქნა შემკობილი ნატიფ მეტაფორა-ეპითეტ-შედარებებით.

ასეთ მოსაპირკეთებელ მუშაობას ცოცხლად წარმოიდგენს ის, ვისაც პოეტურ შემოქმედებითს წვასთან ერთად განუცდია წვალება, რაც თან სდევს მოხდენილი სიტყვის მონახვას.

* * *

ლექსთწყობა, რიტმი იგივე დარჩა, მაგრამ შინაარსი გადასხვაფერდა. სწორუბოვარი შემოქმედლის მიერ ობოლ მარგალიტთა მძივებად იქნა ასხმული მომხიბლავი მხატვრული სახეები. თაიგულივით შეიკრა ჰარმონია ბგერებისა. შეიცვალა ლექსის მოტივიც. პოეტის წარმოსახვაში გასხივოსნდა თბილისისა და მთაწმიდის პროფილები, ცისფერი ლანდები, მტკვრისა და მეტეხის თეთრი ელვარება, აკაკის ლანდი, ბარათაშვილის „ობლად სიარული“ — და ყველაფერი ეს, მთვარის „შუქში გახვეული მსუბუქ სიზმარივით“, განსახიერდა ლექსში, რომ ქართული სიტყვის სამარადისო ძეგლად აღმართულიყო.

მთვარიან ღამეში თბილისის პეიზაჟი თავისი მთაწმიდიან, მტკვრითა და მეტეხით რომანტიკულ ფერებში წარმოესახა მომავლად გედზე შთაბეჭდილების ქვეშ მყოფ პოეტს და მის წინ მთელი სიმძაფრით დაისვა სიკვდილის პრობლემა.

შემოქმედი ჩასწვდა „თუ ღამემ სულში როგორ ჩაიხედა“
და მთვარიანი ღამის პეიზაჟი და თავისი ფიქრები სიკვდილის
ირგვლივ შესანიშნავ ლექს-სიმფონიად გადმოაფრქვია:

ჯერ არასდროს არ შობილა მთვარე ასე წყნარი!
მღუმარებით შემოსილი შეღამების ქნარი
ქროლვით იწვევს ცისფერ ლანდებს და ხეებში აქსოვს...
ასე ჩუმი, ასე ნაზი ჯერ ცა მე არ მახსოვს!..

...და მეც მოვკვდე სიმღერებში ტბის სევდიან გედად,
ოღონდ ვთქვა, თუ ღამემ სულში როგორ ჩაიხედა,
თუ სიზმარმა ვით შეისხა ციდან ცამდე ფრთები.
და გაშალა ოცნებათა ლურჯი იალქნები...

...სიკვდილის გზა არ-რა არის, ვარდისფერ გზის გარდა;
რომ ამ გზაზე ზღაპარია მგოსანთ სითამამე,
რომ არასდროს არ ყოფილა ასე ჩუმი ღამე,
რომ, აჩრდილნო, მე თქვენს ახლო სიკვდილს ვეგებები,
რომ მეფე ვარ და მგოსანი და სიმღერით ვკვდები,
რომ წაპყვება საუკუნეს თქვენთან ჩემი ქნარი..
ჯერ არასდროს არ შობილა მთვარე ასე წყნარი!

ხატოვანობითა და ემოციის სიძლიერით ეს სტრიქონები
გენიალური ხელოვანის ისეთივე ჯადოსნური სუნთქვაა, რო-
გორიც ბეთჰოვენის „მთვარის სონატა“, რომლის ჰანგები და
გალაკტიონის პოეტური მეტყველება თანაბრად საუცხოო
ჩუქურთმებს ქმნიან ღამისა და მთვარის ფონზე.

გალაკტიონმა იცის, რომ სიკვდილი ყველას მიმართ უღმობ-
ელია, რომ ის დიდ მგოსნებსაც არ ინდობს. ამით ჩვენი ეპო-

ქის დიდი პოეტი ეხმაურება გენიალური წინაპრის, შოთა რუსთაველის სიბრძნეს:

ვერ დაიპირავს სიკვდილსა გზა ვიწრო, ვერცა კლდოვანი;
მისგან გასწორდეს ყოველი სუსტი და ძალგულოვანი...

და სიკვდილის შიშს უქრობს, მხნეობას უნერგავს ადამიანს პოეტის ფილოსოფიური თქმა:

სიკვდილის გზა არ-რა არის, ვარდისფერ გზის გარდა...

* * *

„მთაწმიდის მთვარის“ შექმნის პროცესი პოეტური შემოქმედების ფსიქოლოგიის თვალსაზრისით დიდად საინტერესოა. მომაკვდავი გედის სიმღერამ სიკვდილის პრობლემა წამოაყენა მის წინაშე.

სიკვდილზე ფიქრი პოეტის წარმოსახვამ იმ დღეს ზღვისპირა ქალაქში ნახულ-გაგონილს დაუკავშირა, რაზეც გვანიშნებს ლექსში ნახმარი სიტყვები: ზღვა, ტბა, იალქნები და, განსაკუთრებით, მომაკვდავი გედი.

ამავე დროს სიკვდილის ფიქრით გართულ პოეტს თვალწინ წარმოუდგება დიდ ქართველ პოეტთა პანთეონი—მთაწმიდა. „აქ მწუხარე“ სასაფლაოში „მეფური ძილით“ სძინავთ აკაკის, ბარათაშვილს... სიკვდილს მათთვისაც სახე შეუცვლია — „სიკვდილის სიახლოვე როგორ ასხვაფერებს“ ყველას. მაშ სიკვდილის „გზაზე ზღაპარია მგოსანთ სითამამე“. მაგრამ, არა! პო-

ეტა ქედს როდი უხრის სიკვდილს და ვაჟკაცურად აცხადებს:
„მეფე ვარ და მგოსანი და სიმღერით ვკვდები“.

ამრიგად, მიუხედავად ლექსის საერთო სევდიანი ტონისა, მის აქცენტს პოეტის მებრძოლი ხმა ქმნის—სიკვდილის საშინელება დაძლეულია.



უკვე განთიადმა მოატანა, როდესაც პირვანდელი სათაური „მომაკვლავი გელის სიმღერა“ წაიშალა და ჩამოყალიბდა ახალი — „მთაწმიდის მთვარე“.

მეორე დღეს ფოთელი მუშების მიერ მოწყობილ შეხვედრაზე გალაკტიონმა პირველად წაიკითხა „მთაწმიდის მთვარე“, მეორედ კი — თბილისში, ორიგინალურ კონკურსზე, სადაც ამ ლექსით აღტაცებულმა ქართველმა პოეტებმა მას პოეტთა მეფე უწოდეს.

დიდოსტატ პოეტს ყველაფერი გამოადგება თემად, მასა-ლად, შემოქმედებითი შთაგონების საბაზად: აწმყო და წარსუ-ლი, მუსიკა და საუბარი, მოსწრებული რეპლიკა, უბრალო ამო-ხვრა, მრავალჯერ ნანახის კიდევ ერთხელ ხილვა.

ერთი უბრალო კოეტი

დილას, რვის ნახევარზე პირობისამებრ გალაკტიონისას ვი-ყავი. როგორც წინა დღეებში, მის თხზულებათა რჩეულის დამზადებაზე უნდა გვემუშავა.

ჩემი მისვლა ესიამოვნა და გულითადად მომესალმა. სად-
ღაც მიიჩქაროდა და მეც თავისთან მიწვევდა.

გალაკტიონი ადრე დგებოდა ხოლმე და ქუჩაზე გასვლას
ესწრაფებოდა. უნდოდა ეცქირა, როგორ იღვიძებდა თბილისი.
მისი მეუღლე ნინო და მე ვთხოვდით, შინ დარჩენილიყო.
ვერ დავიყოლიეთ.

მუშაობისთვის არ მცალია, ათასი წვრილმანი მაწუხებს! —
თქვა ნერვიულად და წავიდეთო მანიშნა.

8 საათზე ქუჩაზე გამოვედით. დინჯი ნაბიჯით მივდიოდით.
მარჯანიშვილის მოედანზე ფოტოატელიესთან შემაჩერა,
ვიტრინისაკენ მიმითითა:

— ეს ჩვენი ძვირფასი გიორგია, ვენაცვალე სულში! —
თქვა პროფ. გიორგი ახვლედიანის სურათზე.

ქუჩაში მიმავალნი ნაბიჯს ანელებდნენ ან ჩერდებოდნენ კი-
დეც და სმენად იქცეოდნენ.

— გორკის კლუბში მაქვს საქმე! — მითხრა გალაკტიონმა
და იქითკენ გავეშურეთ. გზაში ვიღაც ქალარა კაცმა გადაკოცნა.
შევდექით, ის კაცი გამაცნო და აღფრთოვანებით მიმართა
მას:

— გახსოვს, ოქტომბრის რევოლუცია.. პეტერბურგი, მოს-
კოვი?. მიტინგი მოსკოვში... ბანკიდან ტომრებით გამოიტანეს
ქალღმრთის ფული და დასწვეს. ამბობდნენ, აწ ფული საჭირო
აღარ იქნებაო.

ქალარამ დაუდასტურა ნათქვამი და იმ დღის თარიღიც გაიხ-
სენა.

გორკის სახელობის კლუბის დირექტორმა გულთბილად მი-
გვიღო.

— ამ დღეებში გეძებდით და ვერ გიპოვნეთ, ბატონო გალაკტიონი!.. უთხრა,—თქვენთან შეხვედრის დღე უნდა დაენიშნოთ¹.

— მგონი, ამ თვის 10-ში მიწყობთ შეხვედრას? — იკითხა გალაკტიონმა.

რამდენიმე წუთს შეხვედრის თარიღს აზუსტებდნენ.

— საათს შეგატყობინებთ, მოსაწვევ ბარათებსაც მოგართმევთ ორ-სამ დღეში. — ეუბნებოდა დირექტორი. შემდეგ ახლად შემოსული ახალგაზრდა ქალი გაგვაცნო და დასძინა, — ჩვენი სახალხო პოეტი გალაკტიონი, ესეც მისი მდივანი.

ქალმა, რომელიც მე მიცნობდა, გრძნობით თქვა:

— ჩვენთვის დიდი სიხარულია, გალაკტიონ ტაბიძეს რომ შეხვედრას ვუმართავთ, ბატონო გალაკტიონ, მე გატაცებით მიყვარს თქვენი ლექსები.. და მათი ავტორი...

— მეც, მგონი, ნამდვილად შემეყვარდებით. თქვენ ისეთი ყარგი ხართ! — უთხრა პოეტმა.

ქათინაურმა ქალი წამოაწითლა, თავი დახარა და მორცხვად ჩაიცინა.

— არ გეწყინოთ, გეხუმრეთ, გენაცვალოს გალაკტიონი. რა ვქნა, ერთი უბრალო პოეტი ვარ, მოხუცი პოეტი.. მაპატიეთ -- გულთბილად მოუბოდინა.

ქალმა გულლიად გაუღიმა.

კლუბის ბაღში გამოსულნი მერხზე დავსხედით. მუსაიფი გავაბით.

¹ ეს იყო 1958 წ. 4 თებერვალს.

ხეივანში ორი კაცი მოდიოდა. გალაკტიონმა შეაჩერა ისინი და მთხოვა:

— აბა, ამათ უთხარი ის ეპიგრამა, იმ დღეს რომ მომეწონა.

უცნობები მოსასმენად მოემზადნენ, მაგრამ, ცივი უარით გავისტუმრე.

— სწორი ხარ, ყველასთან არ არის საჭირო, — მხარზე ხელის დაკვრით მითხრა გალაკტიონმა.

ახლა; ამ მომენტის მოგონებაზე, გამახსენდა გალაკტიონის უსათაურო ლექსი:

გიორგი! ახლა
მზრუნველს და მომვლელს
საქართველოში ვინმე გამოლეს?
მზად იყავ მისცე
ანგარიში ხალხს
და არა ყოველ
გამვლელ-გამომვლელს!

ეს ტაეპები მუდამ გაფრთხილებად მიელავს მეხსიერებაში, როცა მცონარენი გამომძიებლურ დაკითხვა-საუბარს გააბამენ ხოლმე.

კლუბიდან ერთი კაცი გამოვიდა. გალაკტიონს მისი პორტრეტის კლიშე სთხოვა მოსაწვევი ბარათისათვის.

პოეტის ბინამდე მცირე მანძილი იყო, მაგრამ სამივენი ავტოთი წავედით, რადგანაც გალაკტიონი დაღლილი იყო.

კლიშე მოვნახეთ და კლუბის მუშაკი გავისტუმრეთ. მე საჯარო ბიბლიოთეკაში წავედი. გალაკტიონის სექმის გამო.

ერთი საათის შემდეგ კი გალაქტიონთან ერთად ავტოთი მიჰქროდი მთავრობის სახლისაკენ.

იქ მშენებლობის მინისტრის მოადგილესთან ამხ. ზ. ჯაფარიძესთან შევედით. მან პატივისცემით, გულთბილად მიიღო მზკოვანი პოეტი.

გალაქტიონი სთხოვდა მას, დახმარებოდა ზოგი ტექნიკური საკითხის მოგვარებაში.

— როგორც თქვენ გნებავთ, ისე გაგიკეთებთ, ძვირფასო გალაქტიონ!—და დასძინა გულშემატკივრულად—იმედი გქონდეთ, არაფერში შეგაფერხებთ, ნუ სწუხხართ!.

— რა ვქნა, ჩემო კარგო, პოეტი კაცი გახლავარ, განცდების კაცი...

ამხ. ჯაფარიძემ დაწვრილებით აგვიხსნა, თუ რა იყო საქირო მშენებლობის დასამთავრებლად.

* * *

ქ-ნმა ნინომ სადილზე წითელი ღვინო გამოგვიტანა, მეორე ოთახიდან გამოვიდნენ ნუნუ და ზეინაბი.

ყველანი სუფრას მივუსხედით.

სადღეგრძელოს სადღეგრძელო მოჰყვა და თუმცა ძალიან ცოტას ვსვამდით, სიმღერა შემოვძახეთ.

როდესაც პიანინოს მივუჭექეი, ზეინაბმა დაკვრა მთხოვა და ჯერ ნუნუსთან, მერე გალაქტიონთან იცეკვა.

ცალი თვალი მოცეკვავეებისაკენ მეჭირა.

მხარზე გალაკტიონის ხელი ვიგრძენი და კლავიშებს თითებში მოვაშორე.

— ჰო, ძამიკო! კარგი იყო, მაგრამ...

გალაკტიონმა თეთრი ხელსახოცი ბალდადივით გაშალა, ზეინაბი გაიყოლია და ერთი წრე შემოიარა.

— არა, ბიძიკოებო, მაგი არ ვიცი კარგად, — ამბობდა სიცილით, თან მძიმედ სუნთქავდა, — კინტაურს ვირტუოზულად ცეკვავს ჩვენი დიდი მხატვარი ლადო გუდიაშვილი. ჩემო გოგი, შენ რომ მისი ცეკვა ნახო!..

— ორ-სამჯერ მინახავს პროფ. ალ. ფიცხელაურის ოჯახში.. ვქეიფობდით.. დავუკარი.. ლადომ, მართლაც შესანიშნავად იცეკვა.

— იცი, ჩვენ რომ ლექსი ვთქვით, ეგ წინათ კოტე მარჯანიშვილმა ამღერა არტისტებს სცენიდან... მოდი ჩვენც ვიმღეროთ.

გაგონილი მქონდა, ამ ლექსს ერთი ნეაპოლიტანური რომანსის მელოდიაზე (თბილისში რომ „პარახოდს“ ეძახიან!) მღეროდნენ. დავუკარი და ყველამ ვიმღერეთ.

— მაგონდება, მოწაფეობისას კომპოზიტორ ნიკო სულხანიშვილის გუნდში ვმღეროდი. ეგ, ხომ იცით, რომელი კომპოზიტორია? „სამშობლო ხევსურისა“, „მაშ, გაუმარჯოს“ და კიდევ ბევრი სიმღერის ავტორი. ნიკოს ძალიან გუყვარდი... საკმაოდ კარგი ხმა მქონდა ბავშვობაში, — თქვა გალაკტიონმა. და „მაშ, გაუმარჯოს“ წაიმღერა. შემდეგ შეეცადა გახსენებოდა ის სიმღერა, რომელსაც მისი დედა უკრავდა ჩონგურზე და მღეროდა, მაგრამ ვერ გაიხსენა, სამაგიეროდ, თავისი დედის, მაკრინე ადგიშვილის შესახებ გვიამბო: თურმე პოეტის

დედას, ახალგაზრდობაში დაქვრივებულს, სანლიდან გაძევებით
ემუქრებოდა და გათხოვდიო—ჩასჩიჩინებდა ქმრის ერთი ახლი
ნათესავი. მაგრამ სათნო მაკრინემ შვილების — პროკლეს (აბე-
სალომის) და გალაკტიონის გამოზრდას შესწირა მთელი თა-
ვისი ცხოვრება.

— ოდესმე გავიხსენებ იმ ძველ ქართულ სიმღერას, რო-
მელსაც დედაჩემი მღეროდა და ვინმეს ნოტებზე გადავატანი-
ნებ... გაუმარჯოს მუსიკას, გაუმარჯოს ბეთჰოვენს — მუსიკის
ღმერთს, გაუმარჯოს მოცარტს, ბახს, შოპენს და ჩვენი ერის
სიამაყეს ზაქარია ფალიაშვილს!..

დამისხი, დამალევინე
ეგ ღვინო ოხერ-ტიალი...
ეგების წალმა ვიფიქრო -
ქვეყნის უკულმა ტიალი

დიდი კომპოზიტორის ზაქარია ფალიაშვილის მიერ ვაჟა-
ფშაველას ამ უკვდავ სიტყვებზე დაწერილი მომხიბლავი არიით
დაასრულა მან სადღეგრძელო და ფაიფურის პატარა ფიალა
ზეაღმართა. ზეინაბს მიუბრუნდა და შემდეგი სადღეგრძელო
წარმოთქვა:

— ეს გაუმარჯოს იმ უბანს, სადაც შენ ცხოვრობ, მთაწმი-
დას გაუმარჯოს, ჩვენი დიდი პოეტების პანთეონს! ილიასა და
აკაკის, ბარათაშვილისა და ვაჟას სახელებს მოწიწება და სამა-
რადისო ხსოვნა! გაუმარჯოს მთაწმიდას! ხომ გიყვართ ის
უბანი? ჩვენი ნუნუ იქ ცხოვრობს... ნინოც იქ ცხოვრობდა წი-
ნათ... მთაწმიდა თბილისის გულია, საქართველოს გული!.. აბა,
ჩემო ზეინაბ, ეს შინიც დალიე!

ზეინაბმა დრო იხელთა და სთხოვა. თქვენს პორტრეტს რომ დამპირდით, მისახსოვრეთო.

— დიდი სიამოვნებით!.. წამოდით! — წამოიძახა გალაკტიონმა და ზეინაბი და მე კაბინეტში გაგვიყვანა.

სანამ გალაკტიონი თავის სურათს მონახავდა, თვალი შევავლე ნაცნობ ნივთებს და მათ შორის ახალიც შევნიშნე, საწერ მაგიდაზე იყო კლიშე, გადაღებული იმ დაძველებული ფოტოსურათიდან, რომელიც ადრე მინახავს აქ: აქაკი წერეთელი ზას მოწაფეებში, უკანა რიგში, ფეხზე დგას ქაბუკი გალაკტიონი მოკრძალებული, ჩაფიქრებული.

გალაკტიონმა მეც მისახსოვრა იმ ხანებში გადაღებული თავისი ფოტოსურათი წარწერით:

„ჩემს ძვირფას გოგის. გალაკტიონი. 1958 წ. 4 თებ.“.

ეს სურათი ჩემთვის განძია, რომელიც მიმშვენებს ოთახს. კარგია, მეტად კარგი! გალაკტიონის ზეშთაგონებული სახე პროფილით. შორს მზირალი ჭკვიანი თვალები, მაღალ შუბლზე ტალღებად გაწოლილი ღრმა ნაოჭები, ხშირი ფართო წვერი დიდებულების სხივებს ჰფენენ პოეტის მრავალმეტყველ სახეს, და გრძნობ იმ ტიტანურ ძალას და ბობოქარ სულს, რაც ესოდენ სჩქედს მის უკვდავ შემოქმედებაში.

შემოვიდა შინამოსამსახურე ქალიშვილი და გაზეთები და წერილები შემოიტანა.

გალაკტიონმა თვალი გადაავლო გაზეთებს, რომელიდაც გაზეთიდან ხმამაღლა წაიკითხა ერთი კორესპონდენცია, სადაც ცოლ-ქმრის ვაი-ვაგლახური ურთიერთობა იყო გადმოცემული, და სასტიკად გააკიცხა ზოგიერთი ქმრის უხეშობა. როდესაც ისევ სუფრას მივუბრუნდით, მეუღლეს მიმართა:

— მართალია, მე ხანდახან ჰირვეულობა ვიცი, მაგრამ შენ არ გაწყენინებ... ხომ სწორს ვამბობ? ნინომ დაუდასტურა და გალაქტიონმა განაგრძო, — მე მწამს რაინდული სიყვარული. რუსთაველური სიყვარული!... დავლით ავთანდილისა და თინათინის სიყვარულის სადღეგრძელო. ქალი რომ საქმეს დაავალებს, ვაჟკაცმა ავთანდილივით პირნათლად უნდა შეასრულოს და მფარველობაც უნდა გაუწიოს ქალს. ეს აზრი მაქვს ჩაქსოვილი ჩემს ახალ პოემაში „მშვიდობის წიგნი“, რომელშიც აღწერილია, რომ ქალი აგზავნის ვაჟს ძნელად საპოვნის წიგნის მოსაპოვებლად. ეს არის ავთანდილისა და თინათინის სიყვარულის მსგავსი მიჯნურობა... მე და ნინოსაც ასე გვიყვარდა ერთმანეთი დღემდე და ასევე გვეყვარება, ხომ, ნინა?!.. სპდ წახვედი, ნინიჩკა?!.

— მოვდივარ, მე ყველაფერი მოვისმინე! — მოისმა სამზარეულოდან ნინოს ხმა. მალე თვითონაც გამოჩნდა და ლანგრით ინდაურის საცივი შემოიტანა.

— ვინც მოვიდა, გაუმარჯოს! — მხიარულად თქვა გალაქტიონმა. შემდეგ დაუმატა:

— მოსკოვში საქართველოს დეკადაზე უნდა წავიდეთ მე, ნინა და გოგი... ახლა კი ვიმღეროთ და ვიცეკვოთ!.. ქართული... ქართული!..

ტელეფონის ზარმა შეაწყვეტინა ცეკვა.

სემინარიის თანაკლასელი ამხანაგი ურეკავდა. სკოლის ამხანაგები ამ დღეებში ვახშამს ვაწყობთ (მგონი ქუთაისში) და მზად იყავით.

— ჯანმრთელობა არ მიწყობს ხელს, მაგრამ თუ სიტყვას

მომცემთ, რომ ღვინოს არ დამაძალებთ, უსათუოდ თქვენთან გავჩნდები! — ჩასძახა ყურმილს პოეტმა.

— სმას დაგაძალებენ, აბა, რა იქნება?! არ წახვიდე, თავს გაუფრთხილდი, მე ასე გირჩევ! — უთხრა ნინომ.

— ბავშვობის მეგობრებთან მიშლი წასვლას? მაგი რავე შეიძლება. იქ უამრავი მასალა უნდა შევაგროვო ჩემი ამხანაგების მიერ მონაყოლი მოგონებებიდან...

ნინოც მალე დაეთანხმა.

— ჩვენს ნინას გაუმარჯოს! — წამოიძახა გასწრებულმა გლაკტიონმა, მე ეს გოგონა ბალდადში¹ გავიცანი... ხანისწყალთან სამი ქალიშვილი მღეროდა. მომეწონა მათი წკრიალა ხმები. მივუახლოვდი და გამოვეცნაურე... ერთი მათგანი ნინა გახლდათ. მეგობრულად მიმიღეს. მეც ავყევი სიძღვრაში. მერე დიდხანს ვისაუბრეთ. ძალიან მომეწონა ნინა, ჭკვიანი და ლამაზი გოგონა იყო. მას შემდეგ მრავალმა წელმა განვლო. მოვიარე რუსეთი, რევოლუციის ქარიშხალი გამოვიარე. ვიყავი საფრანგეთში. სახალხო პოეტი გავხდი. ბედის უკუღმართობით საყვარელი მეუღლე ოღდა, ოკუჩავას ქალი, დაგვარგე... ახალგაზრდობის მეგობრებიც დამეღუპნენ, დავრჩი მარტოდ...

და აი, ერთხელ, თბილისში, ვერის ხილთან, შემხვდა ნინო შეწუხებული, დაღვრემილი. რა მოგივიდა-მეთქი, შევეკითხე. ქმარი დამეღუპაო, მითხრა. შემეცოდა ეს თვალცრემლიანი ქალი. აღარც ბინა ჰქონია, აღარც ცხოვრების სახსარი, ნათესავებს შეკედლებია.

¹ ახლანდელ მაიაკოვსკში.

მეც ნინასავით გულმოკლული ვიყავი... ეკონომიურად კი არა მიჭირდა. მოვკიდე ნინას ხელი და წამოვიყვანე ჩემს სახლში. მეორე დღეს ნინამ თავისი შვილი ნუნუც მოიყვანა, სულ პატარა იყო და შვილად მივიღე...

მას შემდეგ აი რამდენი წელია, მე და ნინა ვცხოვრობთ მეგობრულად. მაშ, გაუმარჯოს ჩემს ძვირფას ნინას!

თებერვლის სუსხიანი ღამე იმზირებოდა ფანჯარაში. ქუჩაზე შიშველი ხეები და ბურუსში გახვეული ლამპიონები მოჩანდა. გრანიტის პერანგიანი წიგნის სასახლის გვერდით „მრავალდროების“ მოწმე მოდუდუნე მტკვარი მოიზღაზნებოდა.

დიდი პოეტის ბინაში მხიარულება სუფევდა.

სუფრიდან წამოვიშალეთ. ცოტა ხანს მომავალ სამუშაოზე ვილაპარაკეთ. გამომშვიდობებისას სასწრაფოდ მივაშურე დერეფანს, სადაც ჩემი პალტო ეკიდა. არ მინდოდა გალაკტიონს რომ დაესწრო იქ გასვლა.

ვიცოდი, თავისი ხელით პალტოს ჩაცმას დამიპირებდა და არც ისე ადვილი იყო დაგეცვა თავი თავაზიანი მასპინძლისაგან.

თუ უარზე დადგებოდი, შეუვალად გეტყოდა: თქვენ ხომ ჩემი სტუმარი ბრძანდებითო... „На правах гостя, на правах гостя!“ — დასძენდა სიცილით.

ხეების სიმშონია

თბილისში პაპანაქება სიცხე იყო.

„დინამოს“ სტადიონთან ტრამვაიდან დავინახე გალაკტიონი და ვაგონიდან ჩამოვხტი.

მომეგება, მკერდში ჩამიკრა.

— თქვენსას მოვდიოდი სწორედ!.. მამაშენი შინ არის?..

აი, ინჟინრობა დავიწყე! — ამ სიტყვებთან მან ჩაიცინა და ლითონის „რულეტი“ (სიგრძის საზომი, მშენებლები რომ ხმარობენ) გაშალა. მე გაკვირვებული, ღიმილით შევაჩერდი.

— წყნეთში ვიშენებ პატარა სახლს სააგარაკოდ, — ამიხსენა მან.

— ხომ წამობრძანდებით ჩვენსას?

— ფეხით წავიდეთ, თუ ძმა ხარ!

— სიამოვნებით.

სტადიონის გასწვრივ, ბაღში, ხეები მოეწონა. შემაჩერა. კარგა ხანს ათვალიერა. ჩაიცინა:

— გოგი, ბიძიკო, ზოგი ხე ზოგ კაცს სჯობია. აი, მაგალითად. რით არ სჯობია ეს სამი ჭადარი.. — და მან ორიოდე კაცის გვარი დაასახელა.

ჩვენს სიცილზე გამვლელები ღიმილით ჩერდებიან. გალაკტიონის კოლორიტულ გარეგნობას შორიდანვე სცნობენ.

დაბურდულ წვერზე ხელი ჩამოისვა, ჩაფიქრდა.

ისევ განვაგრძეთ გზა.

პოეტმა და მამაჩემმა გადაკოცნეს ერთმანეთი. გალაკტიონის ახალი წიგნის გამოცემის შესახებ ისაუბრეს და მასალებში „ჩაიძირნენ“.

ვთხოვეთ, მაგრამ სადილად არ დარჩა.

— შეჩქარება, ჩემს მშენებლობას უნდა მივხედო! — თქვა ღიმილით და დაუმატა, — გოგი, ბიძიკო, წამყევი. აქვე ახლოს კანტორაში პატარა საქმე მაქვს.

ამ დროს დედაჩემმა ბოთლი შემოიტანა. მამამ შესთავაზა:

— ყურძნის წვენია, გულისთვის კარგია, დავლიოთ!

— აჰ, არა. არა! — ხელი მომკიდა. სწრაფად გამიყვანა აი-
ვანზე, — მე ეს მირჩევნია ახლა! — თქვა სიცილით, მაგიდი-
დან სალათაში ჩაჭრილი კიტრის რამდენიმე ნაჭერი ამოიღო და
შეექცა, თან მაჩქარებდა.

ფეხით გავისეირნეთ ქუჩაში გამოსულებმა.

ბაზართან, მშენებლობის კანტორაში მივედით. იქ საქმას
მწარმოებელს მიმართა:

— მე ტაბიძე ვარ, სახალხო პოეტი.

— გეცნობთ, ბატონო, დაბრძანდით! — მოგვართვა სკამე-
ზი ახალგაზრდა ქალმა.

— ერთი თხოვნა მაქვს თქვენთან. მოგეხსენებათ, წყნეთ-
ში ვაშენებ სახლს.

— ვიცი. როგორ მიდის თქვენი მშენებლობა?

— კარგად, მაგრამ... მე მინდა ცოტათი შევცვალოთ
პროექტი იმ გზისა, რომელიც ჩემი სახლის წინ უნდა გაიყვა-
ნოთ.

— ???

— საქმე იმაშია, რომ იქ ლამაზი ხეებია, ძველი დაბურული
ხუჭუჭა ხეები. თუ გზას პროექტის მიხედვით გაიყვანთ, ხეები
უნდა განადგურდეს. არ შეიძლება, ჩემი ხათრით, იმ გზამ. ოჯ-
ნავი რკალი გააკეთოს, რომ ხეები გადაარჩეს?

— ძალიან ვეცდები, ბატონო! თუკი თქვენი სურვილია იმ
ხეების გადაარჩენა, ჩვენ ყოველ ღონეს ვიხმართ, რომ გასა-
მოვნოთ, — მიუგო ქალმა.

გალაკტიონმა დიდი მადლობა გადაუხადა და კანტორიდან
გამოვედით.

დავპირდი, წყნეთში გინახულებთ-მეთქი და დავშორდით ერთმანეთს, ეს იყო 1952 წლის ზაფხულში.

ქალაქში მყოფს, ბუნების წიაღს აგონებდა ყოველი ხე. ბუნების წიაღში ოლიმპიური სიმშვიდე მოეფინებოდა ხოლმე სახეზე.

ერთხელ დილაადრიან მოვიდა თავისი ავტოთი ჩვენსას. ფოტოაპარატიანი კაცი ახლდა. მამაჩემი წაიყვანა. ბაზალეთის ტბა და სანახები დაათვალიერეს. გზადაგზა სურათებს იღებდნენ. ფოტომოყვარულის გაუწაფავი ხელით დამზადებულ იმ სურათებს ახლაც სასოებით ვინახავ.

ტბათა სარკოვანი ზედაპირი, „ნათელი სავსე მთვარის“ თუ კავკასიონის ცაღ აღვლენილი მწვერვალები, შავი ზღვის ბობოქარი ტალღები იწვევდა პოეტში აღტაცებას და გატაცებას, ხოლო ყველა ამას გალაკტიონის პოეზიაში მწვანე ზოლად გასდევს ხეების სიყვარული.

აწ ჩემი ოცნება
და ჩემი ლირიკა
ობოლი ნაძვია —
ლარიქს სიბირიკა
(„ლარიქს სიბირიკა“)

და რადგან პოეტის ოცნება მუდამ მაღალი და განუზომელია, ამიტომ:

განდევნა მიწამა,
ცამ ვერ შეირიგა
მაღალტანოვანი
ლარიქს საბირიკა,

ხოლო ლექსში — „ევკალიპტი“, პოეტი ეალერსება მცენარეს და პარალელს ავლებს ადამიანის წმიდა გრძნობასა და ხის ფესვების ძალმოსილებას შორის. პოეტის აზრით, აქ არის „დიდი საერთო“ ნიშანი:

სულთქმით დიადით,
გულთქმის ხმაურით,
მხრების აზიდვით
და ძალშევსებით —
მცენარე მკვიდრობს
ფესვებით მძლავრით,
ადამიანიც —
ძმობის ფესვებით,

ასე, ვაჟა-ფშაველას მინდიასავით, პოულობდა დიდი პოეტი ადამიანის სულიერ მოძრაობასა და მცენარეთა შრიალს შორის საერთო ჰარმონიას, კაიკაცობისა და ავკაცობის ასოციაციებს.

ამიტომ იწვევს პოეტში სინხარულს არემარე, სადაც უნაპიროა ნაყოფიერი ხეების ზღვა, მოლივლივე ფოთლების ჩერო და ნეშო. იქ კი, სადაც საბჭოთა ადამიანები ქმნიდნენ და ქმნიან წალკოტებს, ვაჟკაცურ შრომას დროშასავით მიუძღვის წინ გალაკტიონის სიტყვები:

აქ აყვავდეს უნდა მხარე ფლორითა.
ბაღზე ბალი გესალმება გორიდან —
აქ ასეა. მალე ამრიალდება
ფორთოხალის და ლიმონის ბაღები,
დაიქროლებს სიო ჩვენი შავი ზღვის
და პალმების აიწვევა თაღები.

(„კოლხიდის დაბლობზე“)

ამავე სიმფონიაში შედის პეიზაჟების გამომხატველი ლექსები: „ტყემ წამიყვანა“, „სალამო ტბის პირად“, თუ მელოდური „ატმის ყვავილები“,—სადაც ქართული კლასიკური ლექსის უმაღლესი ფორმებითაა აყდრებული ტყის მწვანე ჭურღმულში ატეხილი ხის რტოთა და ბალახების მწვანე ყანა და ჩამავალი მზის შუქით მოქათქათე ტევრი, რომლისგან იზადება სიცოცხლის საღამო.

და ჩრდილი ბინდისა, წერწეტა ხის ჩრდილი
ეცემა ბილიკზე შემკრთალი, დაღლილი.
(„სალამო ტბის პირად“).

სიყვარულის ფაქიზი გრძნობა ჩქეფს ქარით აქოჩრილ, თაიგულივით გაშლილ ატმის ხის ყვავილებსა და რტოებში. ეს არის პოეტური ნათელხილვა ნაზი სატრფოსი და მაღალი ოცნებისა, სინარულისა და მწუხარების პოლუსთა მწვავე ქიღალა:

ატმის ხე იდგა ვით ნაზი ქალი,
ვით დედოფალი უცხო მხარეში;
სინარნარეში სწვავდა მზის ძალი
და გრძნობათ ალი, სიმწუხარეში.
ატმის ხე შლილი ოცნებას ჰგავდა,
როცა ღელავდა მზით აღჭურვილი,
მე მისი ჩრდილი ხშირად მხიბლავდა
და ხშირად მწვავდა ტრფობის სურვილი.

(„ატმის ყვავილები“)

ათი სტროფისაგან შემდგარი ეს შედეკრი, შინაგანი რითმე-

ბით ამღერებული მელოდია და ქართული ლექსის თეორიისათვის საუკეთესო ნიმუშია.

გარდასულ დროთა გმირების აჩრდილებს ინასავენ ის თვალწარმტაცი მიდამოები, სადაც

შემოდგომამ ყველაფერი
შესძრა ხელშეუხები —
წყარიალებენ, გრიალებენ,
მქუხარებენ მუხები!

აქ ცოცხლდება ქართველი ხალხის მებრძოლი სულის უბადლო სიმბოლო — მარაბდელი ოძელაშვილი და კიდევ ერთხელ შეახსენებს მკითხველს გასული საუკუნის ქართველების შემართებას დუხჭირი ბედის წინაშე:

„მუხებს ჩოხათ საქილეში
ჩაუწყვიათ რკოები,
აქ არსენას ნაბდის გაშლას
გრძნობენ მიდამოები.

(VIII ტ.)

საქართველოში ვის არ უნახავს სიცოცხლის ხისა და ციურ მნათობთა, ფანტასტიკურ ცხოველთა, ცისკენ აპყრობილი ადამიანის ხელებისა და ფრთა-ვაზების განმასახიერებელი ჩუქურთმებით მოხატული კარი ან დედა-ბოძი — ძველი საცხოვრებელი სახლების დარბაზთა საყრდენი სვეტი, ოჯახის წმიდათა წმიდა, წარმართობის დროინდელი სიმბოლოებით გრავირებული! რამდენ მამაპაპურ კარგ ზნე-ტრადიციას აგონებს პოეტს ბუხრის შუქზე ალიცლიცებული ასეთი გამოსახულებანი,

ფიქრიანი ცეცხლის ფრთიან ალზე ამოძრავებული და ამეტყვე-
ლებული ამოკვეთილობანი:

ნაკვერცხლებო, თქვენც ზიარის
მოგონებით ენთებით —
სიცოცხლის ხის, ნათელ მთვარის
და მზის ორნამენტებით.

თქვენ დაგტქერით მოსახება
ვაზის ნელი სირმების,
და მედგარი დაჯახება
ჯიხვების და ირმების...

მსურს შევადო სახლის კარი
და უეცრად დავდექი:
ო, ეს კარი კი არ არის,
ცისკრისაა დამდეგი!

თითქო ნაბდიანი მეგრი
ორნამენტად ეგება,
„მობრძანდიო“ — მისი ეგრე
მესმის შემოგებება.

და იღება ხმებიანი
პანგით თანამოგვარე,
კარი ჩუქურთმებიანი,
კარი სტუმართმოყვარე.
(„ბუხართან“)

ასეთ ასოციაციებს იწვევს პოეტში ხის ფიცრებით შე-
თხზულ კარზე ამოტვიფრული ძველქართველთა რწმენის ემბ-
ლემები, ხეთა ხანგრძლივი სიცოცხლე და ძალმოსილება.

გალაქტიონის ლექსში „მუხა“ (1914 წ.) ერთხელ კიდევ ილ-
ვიძებს ხალხური სიმღერა „მუმლი მუხასა“ და ბაჩანას „მუ-
ხა“—დევეკატურად მსუნთქავი და სტიქიასთან მებრძოლი გუნ-
თოვანი რაინდი, რომელიც პირველი ეგებება ქვეყანაზე მოგ-
ლენილ ყველა დარტყმას, მრავალსაუკუნოვანი ბრძოლით დაღ-
ლილი და დაბერებული ამაყად ეგებება სიკვდილის უღმობელ
ცელს:

მუხა პირველი იგრძნობს ალიონს
და პირველ სალამს განთიადისას,
ამაყად დასცქერს მთას კავკასიონს,
მეფურ ღუმლით დაჰყურებს მიწას.

მუხა პირველი მებს ეგებება,
შეუშფოთებელ და მძლავრ რტოებით,
შეუშფოთებლად და მძლავრად კვდება,
ველზე მდგომარე განმარტოებით.

(„მუხა“).

პოეტი ეალერსება ქარის იმ სუნთქვასაც კი, რომელიც „ხე-
თა რიგს, ხეთა ჯარს რკალად ხრის“, რადგან ტევრი „უშორეს
ზღაპართა“, სიზმართა და ტყბილ ოცნებათა ამშლელი წიაღია,
გარდასული სიჭაბუკის მოგონებათა მყუდრო სავანე:

ეს იყო წინათ, დიდი ხნის წინათ,
ეს იყო ვერხვის ფოთლების კვნესა.
დრომ ყვაილებით დაგვაგვირგვინა,
მე პაეი ვიყავ, ის კი — პრინცესა.

(„ვერხვები“).

ცაცხვები და ჭადრები, ვერხვები და მუხნარი ხიბლავდა მგოსნის თვალსა და გულს გოლიათური იერით, ხეთა სახელე-
ბი ზურმუხტის თვლებივით კამკამებენ მის ლექსებში: „წამყე
ბეთანიისაკენ“, „დასძინებია ალერსიან ბალს“, „ალვები თოვლ-
ში“, „შემოდგომის დღე“, „ტყის პირად“, „გაზაფხულია“, პოე-
მაში „სინათლის ყვავილი“...

განა ლექსს სიკვდილი
დასძლევს? პირიქით!
ცა, მიწა სავსეა
მარადი ლირიქით.

ალვის ხე, მუხა თუ
„ლარიქს სიბირიკა“ —
ეს არის ლირიკა
და მხოლოდ ლირიკა,
(VIII ტ.)

მღეროდა პოეტი.

არ ვიცი, აღმოჩნდა თუ არა გულისხმიერი და მკლავდალო-
ცვილი ქართველი, რომელსაც შეეძლო წყნეთში „იფნის შოლ-
ტივით მოქნეული გზა“ ოდნავ მოერკალა და ჩვენი სასახელო
პოეტის მითითებული „ძველი დაბურული ხუჭუჭა ხეები“ გა-
დაერჩინა... ერთი კი აშკარაა! — გალაკტიონი ისევე გზნებით
უმღეროდა ხეებს, როგორც მათს მასაზრდოებელ ძუძუ-
მკერდს, საქართველოს მიწას.

ლექსი „მერი“

მასწავლებელმა ქალებმა მთხოვეს, გამეგო „მერის“ ისტორია, — შეეხებოდა თუ არა გალაკტიონის ეს ლექსი რეალურ პიროვნებას.

უხერხულად მივიჩნიე მეკითხა პოეტისათვის. რადგან იმ ხანებში ყოველდღე მოდიოდა ჩვენსას და დიდხნობით მუშაობდა წიგნზე მამაჩემთან ერთად, ამიტომ მამაჩემს ვთხოვე ამ საკითხის გამორკვევა.

ერთხელ შესვენების დროს, როდესაც ყველანი შინ ვიყავით, მამაჩემმა ჰკითხა ზემოხსენებული ლექსის გამო.

პოეტმა განმარტა:

— საერთოდ, სატრფიალო ლექსებში იდეალური ქალი მყავს ხოლმე წარმოდგენილი. ჩემთვის რეალური მერი არ არსებობდა!...

— ხომ არ არის თქვენი ეგ ლექსი გამოხმაურება „მერის“ იმ კულტისა, რომელიც ბაირონმა და შელიმ წამოიწყეს, პუშკინმა განაგრძო.. შემდეგ „მერი“ და „მარი“ ენაცვლებოდა ერთმანეთს ბევრის პოეზიაში, გ. ერისთავის ჩათვლით, და რომელიც ბოლოს XX საუკუნის პოეზიამ გააიდგალა?

— დიახ, რა თქმა უნდა, ასე გახლდათ სწორედ.

აი, მერი ჯვარს იწერდა სხვაზე. ლექსის ლირიკული გმირისათვის კი ის ღამე „მწუხარე იყო, ვით შემოდგომა“. სანთელ-ვით გაფითრებული მერის სახე ათქმევინებს შეყვარებულ ქაბუკს:

მესმოდა შენი უგონო ფიცი...
მერი, ძვირფასო დღესაც არ მჯერა...
ვიცი წამება, მაგრამ არ ვიცი:
ეს გლოვა იყო თუ ჯვარისწერა?

ნაბადი ტანზე შემოვიხვიე,
თავი მივანდე ფიქრს შეუწყვეტელს...
ოჰ! შენი სახლი! მე სახლთან იქვე
ღონემიხდილი მივაწექ კედელს,

გალაკტიონმა ასე წარმოადგინა ქართულ ნაბადში გახვეული სასოწარკვეთილი გმირი, რომლის განცდას თვით ბუნებაც იზიარებდა და ეხმაურებოდა:

ასე მწუხარედ ვიდექი დიდხანს,
და ჩემ წინ შავი, სწორი ვერხვები
აშრიალებდნენ ფოთლებს ბნელხმიანს,
როგორც გაფრენილ არწივის ფრთები.

და შრიალებდა ტოტი ვერხვისა,
რაზე — ვინ იცის?! ვინ იცის, შერი!
ბედი, რომელიც მე არ მელირსა,
ქარს მიჰყვებოდა, როგორც ნამქერი.

ლექსის ფინალში ხდება მკვეთრი გაიგივება ლირიკულ გმირსა და ავტორს შორის. ისე მძაფრად განიცდის პოეტი სატრაფოს სამუდამოდ დაკარგვას, რომ თავისი შემოქმედებითი ბიოგრაფიის განვლილი დღეები ამაო შრომად მიაჩნია და მის ღრმა კაეშანში გამოკრთის გამოძახილი მსოფლიო კლასიკური ლიტერატურის ისეთი დიდი ტრაგიკული ციკლისა, როგორიც არის შექსპირი:ადა:

ან ცას ღიმილით რად გავცქეროდი,
ან რად ვიჭერდი შეუქს მოკამკამეს?

ან „გურიის მთებს“ რისთვის ვმღეროდ
ან ვინ ისმენდა ჩემს „მე და ლამეს“?
ქარი და წვიმის წვეთები ხშირი
მწყდებოდნენ როგორც მწყდებოდა გული
და... მე ავტირდი, ვით მეფე ლირი,
ლირი, ყველასგან მიტოვებული...

ასეთი ემოციით სუნთქავს ლექსი „მერი“, რომელიც ერთ-
გვარ დასაწყისს წარმოადგენს იმ ციკლისა, რომელშიც შედის
ლექსები: „გახსოვს?“, „მერის თვალებით“, „გზადაგზა“, „ო,
დღეს შემოდგომაა“, „არდაბრუნება“, „ეს იყო ოქტომბრის
ღამე“, „შენ ზღვის პირად“ და სხვ.

ეს ლექსები სხვადასხვა დროსაა დაწერილი და ყველაში
მერის სახე წარმოდგენილია, როგორც უმწიკვლო, ჰაეროვანი
მუზის, იდეალური ქალის განზოგადებული რომანტიკული გა-
გება.

* * *

— არც ერთ მერის არ ვიცნობდი არასდროს... არც მომ-
წონებია. გოგი, თუ შენი მეორე შვილი გოგონა იქნება, მერი
დაარქვი ჩემ მოსაგონრად, — სიცილით მითხრა იმ დღეს გა-
ლაკტიონმა.

— რატომაც არა?! მშვენიერი სახელია!

იმ დღიდან ორი წლის შემდეგ დიდი პოეტის მუხლზე დას-
კუპული ჩვენი პატარა მერიკო თითებით წვეკრს უვარცხნიდა
და მხიარულად ტიტიინებდა.

დიდ პოეტთან

1956 წლის იანვარ-თებერვალში გალაკტიონი ხშირად ავადმყოფობდა. იწვა, მაგრამ მაინც „მეცადინეობდა“, წერდა, კითხულობდა.

დილის საათებში ვინახულებდი და ვკითხულობდით ჟურნალ-გაზეთებს და ხელნაწერებს.

ერთხელ ჩაის ვსვამდით, იქვე, პოეტის საწოლთან, მაგიდობას წიგნებით დატვირთული სკამი გვიწევდა.

გალაკტიონმა ორი ფურცელი მომაწოდა. მანიშნა, წაიკითხეო. ერთი ლექსი ვაზის ერთ-ერთი ქართული ჯიშის ხოტბას წარმოადგენდა. ჩანაფიქრი ფრიად ორიგინალური იყო. აღტაცება გამოვთქვი.

გალაკტიონს თვალები აუციანდა — მეორეც წაიკითხე — მითხრა წყნარად.

მეორე ლექსში აღწერილი იყო მცხეთის პეიზაჟი. იქ მტკვარი და არაგვი დებად იყო განსახიერებული.

მაგრამ შემდეგ გაახსენდა ლერმონტოვის „მწირიდან“:

«Там, где сливаясь шумят
Обнявшись будто две сестры,
Струи Арагвы и Ктуры».

ჩაიცინა. ხელნაწერი გამომართვა და რამდენიმე სტრიქონი გადახაზა.



თებერვლის ბოლო რიცხვებში გალაკტიონი მოკეთდა, მაგრამ სახლიდან იშვიათად გამოდიოდა. ერთხელ მე და მამაჩემი

მთელ საღამოს ვიყავით მასთან. ვისაუბრეთ ლიტერატურის საკითხებზე. შემდეგ ტიციან ტაბიძის ახალგამოსული წიგნი-დან წავიკითხე რამდენიმე ლექსი.

— ტიციანის საუკეთესო ლექსები არ შეუტანიათ ამ კრებულში. აფსუს! — სინანულით თქვა პოეტმა და თავისი ბიძაშვილის, ტიციანის რამდენიმე ლექსი დაასახელა. აი, ესენი უნდა დაებეჭდათო.

— თუ დაგრჩა რამე ტიციანის ნაწერებიდან ხელნაწერის სახით? — შეეკითხა მამაჩემი.

— პირადი წერილები დამრჩა. ბევრი მათგანი ძალიან საინტერესოა. სოფელში უნდა მქონდეს შენახული, ასე მახსოვს. აი, წავიდეთ სამივენი ჩემთან სოფელში და წავიკითხოთ. იქ სხვა მასალებიც მეგულება, გადავხედოთ ოდესმე.

ბოლოს გალაკტიონმა წავგიკითხა დიდი ნაწყვეტები თავის ახალი პოემიდან „მშვიდობის წიგნი“.

პოემის თემაა მშვიდობის წიგნის ძებნა. პოემის მთავარი მოქმედი პირი, დაბრკოლებებთან ხანგრძლივი ჭიდილის შემდეგ, პოულობს დაკარგულ ლეგენდარულ წიგნს და უბრუნებს ხალხს.

ეს იყო მოვარდნილი ქარიშხალივით ბობოქარი ნაწარმოები, პოეტური სახეების უნაპირო ზღვა.

კედელზე, ეკატერინე გაბაშვილის სურათს ზემოთ, ხელნაწერის ფოტოგრაფია შევნიშნე.

— ეს რა არის, ძველებურ სიგელს რომ ჰგავს? — ვკითხე გალაკტიონს.

პოეტი წამოდგა. ჩამოხსნა კედლიდან ფოტოქაღალდი და ღიმილით აგვიხსნა:

— დიახ, ეს სიგელია ჩემი წინაპრებისათვის მიწების ბოძების შესახებ.

— ტაბიძეები აზნაურები იყავით, გალაკტიონ? — შეეკითხა მამაჩემი.

— არა, ჩემო ბენო, პირიქით, უღარიბესი გლეხები ვყოფილვართ. იმდენად ღარიბები ვყოფილვართ, რომ იმერეთის მეფეს შევცოდებივართ და ერთგული სამსახურისათვის მიწები უბოძებია. მოდი, წავგვიკითხოს გოგამი.

ტექსტი წარმოადგენდა იმერეთის მეფის სოლომონ II-ის სიგელს, მიცემულს, ტაბიძეებისათვის, რომელიღაც ადგილიდან დაწყებული მდინარე რიონამდე მიწების ბოძების შესახებ. გუჯარი დადასტურებული იყო შვიდიოდე ხელმოწერითა და ბეჭდებით.

— ეს მიწები დაახლოებით უდრის ტერიტორიას აქედან (ე. ი. გალაკტიონის ბინიდან, — გ. ჩ.) კარლ მარქსის ზიდამდე, მაგრამ შიგ ბევრგან რიყეა და სახნავ-სათესად არ ვარგოდა, — ღიმილით თქვა პოეტმა — ეს სიგელი ჩემმა სახლიკაცმა ბესარიონ ტაბიძემ, ცენტრალური არქივის ფოტო-კინო განყოფილების უფროსმა, გადაიღო და სახსოვრად გამომიგზავნა.

გვიან ღამით წამოვედით ტაბიძეების სახლიდან.

* * *

11 მარტს, საღამოს გალაკტიონი შემოვიდა ჩვენთან და დიდი სითბო და ბუმბერაზული მხნეობა შემოიტანა. — ჩემს უძვირფასეს ძმას, ბენოს, გაუმარჯოს! — შესძახა მეორე ოთახიდან გამოსულ მამაჩემს.

ცალ ხელში ქედს ატრიალებდა, მეორეში — წიგნს.
სათითაოდ მოიკითხა ოჯახის წევრები და ყველას მიე-
აღერსა.

— ერთი შეხედეთ, რა დიდი და მეტყველი შუბლი აქვს
ამ ბავშვს! — ალტაცებით სთქვა ჩემს პატარა ქეთინოზე, სა-
თუთად მიეფერა და თავისი თბილი მზერით გადმოგვხედა.

პოეტი მხნედ გამოიყურებოდა. ჯანმრთელი კაცის ფერი
ჰქონდა.

— თვითეული კარგი ქართველი ჩვენი ახალგაზრდა თაობი-
სათვის ძვირფასია. მით უმეტეს შენ, ქართველი ერის სიამაყე,
ძალიან უნდა გაუფრთხილდე თავს, ჩემო გალაკტიონ, — ეუბ-
ნებოდა მამაჩემი პოეტს.

საწერი მაგიდის გარშემო დავსხედით. გალაკტიონმა თავი-
სი მოტანილი წიგნი, ალ. აბაშელის ახალგამოცემული ლექსე-
ბი, გადაფურცლა და წაკითხვა მთხოვა.

ხალისით წავიკითხე მინიშნებული ლექსები, მათ შორის,
ერთი მიძღვნილი გალაკტიონისადმი, რომელიც ასე იწყება:

შენ ჩონგური გაამდიდრე
ახალ სიმთა რხევით,
ახალი ხმა დაამკვიდრე
და ასწიე ზევით.

გალაკტიონი ჩემკენ გადმოიხარა და... ამ სტროფის ქვეშ
მთრთოლვარე ცერის ფრჩხილით განახაზი დღესაც დიდი სი-
ოცხლის სუნთქვასავით გამოკრთის.

კითხვა არ შემიწყვეტია:

... ხან შესტყერი ღამეს უჩვევს
და მთაწმილის მთვარეს,
ხან პარიზის ხედავ ქუჩებს,
აღებ ლუერის კარებს.

ხან იღვრება ჩუმ დაისში,
როგორც სუნთქვა წყნარი,
წყალტუბოდან ქუთაისში
მიმავალი ქარი' ...

ბოლოს გამომართვა წიგნი და თავფურცელს სამახსოვრო
წარწერა გაუკეთა.

— ეს წიგნი თქვენი იყოს! — თქვა ბოლოს გალაკტიონმა
და მომიბრუნდა, — ახლა კი, შენი ახალი ლექსები წავიკით-
ხოთ...

ჩინებული ახსნა-განმარტება იცოდა. ხავერდოვანი შთაგო-
ნებული ხმა ჰქონდა და თავისებური სინტაქსით მეტყველებ-
და. სწორედ ამიტომ მისი ნათქვამი ფრთაშესხმული ლექსის
დარად დიდხანს სიტყვა-სიტყვით რჩებოდა მსმენელის მეხსიე-
რებაში.

ნაწარმოების კითხვის დროს „მიკროსკოპულ“ ნიუანსებსაც
კი გრძნობდა. უამრავ ანალოგიურ მაგალითს გაიხსენებდა და
პარალელებს გაატარებდა. გარდა ყველა სხვა მადლისა, ამ
კაცში იყო მომავალი თაობის აღზრდის დაუშრეტელი წყურ-
ვილი, დაუღალავად მჩქეფარე პედაგოგიური სული.

ერთ საათს „ვიმეცადინეთ“ ასე იმ საღამოს.

მუშაობა სტუმრებმა შეგვაწყვეტინეს. ორი ჩემი მეგობარი
მეწვია: ინჟინერი გ. ზოზიაშვილი და სტუდენტი ჯ. ლუღუ-

შაური: მოჰყვნენ და იმდენი ახალი ამბები გვიამბეს, რომ კარგა ხანს ყურადღებით ვუსმენდით.

გალაკტიონმა გატაცებით ისაუბრა ახალგაზრდებთან. ხშირად წამოიჭრებოდა სკამიდან და ოთახში ბოლთას სცემდა, ისევ დაჯდებოდა. ხელებს შლიდა და ცეცხლიანი თვალებით უხსნიდა, შთააგონებდა, ეკამათებოდა და ეთანხმებოდა მათ. თავისი შეუდარებელი უბრალოებით ათამამებდა ჰაბუკებს, მაგრამ მსჯელობის „ლოტბარობას“ ბოლომდე ინარჩუნებდა.

ინჟინერი ჩქარა წავიდა.

ჩაის მივუსხედით, ლულუშაურმა ისე ენამადლიანად გვიამბო სტუდენტური ცხოვრების ეპიზოდები, რომ გალაკტიონს თვალზე ცრემლი მოერია.

— შენ... შენ პოეტი ყოფილხარ, ბიძიკო! — უთხრა ჰაბუკს აღელვებულმა და შუბლზე აკოცა.

ლამის თერთმეტი საათი სრულდებოდა, როდესაც მე და ჯიმშერმა გალაკტიონი „დინამოს“ სტადიონამდე მივაცილეთ, ტროლეიბუსის მოლოდინში ორიოდ ანეკდოტი ვთქვით, რაღაც წავიდიდინეთ და მოწყენით გავხედეთ ლამის ბურუსში ჩაჩუმებულ ქუჩას, რომელსაც უნიათოდ ანათებდა მოახლოებული ლიფლიფების შუქი.



თბილისში, მარჯანიშვილის მოედანზე რომ დიდი სახლებია, საიუველირო მალაზიის პირდაპირ, მესამე სართულზე კეთილმოწყობილ ბინაში გალაკტიონს მეორე სამუშაო კაბინეტი ჰქონდა. იქ იდგა ჩუქურთმებით დამშვენებული ავეჯი: შავი

ხის დიდი საწერი მაგიდა, ისეთივე კარადა, რბილი სავარძლები, ტელეფონი...

აქ მუშაობდა ამ სტრიქონების ავტორი გალაკტიონის ხელნაწერებზე. ერთი სიტყვით, ვასრულებდი ლიტერატურული მდივნის მოვალეობას. ოფიციალურ პირებთან საუბარში პოეტი ფავის მდივანს ან თანამშრომელს მიწოდებდა.

გალაკტიონს იმდენად უყვარდა ლიტერატურაზე საუბარი, რომ გვიან ღამემდე არ დაიძინებდა, მწერლებისა და წიგნების შესახებ ლაპარაკობდა და პაექრობდა მახლობლებთან. იგი ყველა შემოქმედზე და ნაწარმოებზე მოხდენილად მსჯელობდა და დიდი დამაჯერებლობითა და ცოდნით აშუქებდა თავის შეხედულებას ხელოვნების რომელიმე ნიმუშის შესახებ.

XIX საუკუნის ქართველი კლასიკოსებიდან განსაკუთრებით უყვარდა აკაკი და ვაჟა. მის არქივში ერთი სურათიც კი იყო (კარგახანს კედლებზეც ეკიდა) უცნობი მხატვრის მიერ შესრულებული: აკაკის პროფილის სილუეტზე დახატულია გალაკტიონის სახე პროფილში.

თანამედროვე ქართული ბელეტრისტიკიდან განსაკუთრებით მოსწონდა კონსტანტინე გამსახურდია.

— ეგ კაცი მარტო მწერალი კი არა, ნამდვილი პოეტია! მისი ნაწერების კითხვა ხშირად ახალ ლექსს შთამაგონებს, განწყობილებას მიქმნის.

— რომელი უფრო მოგწონთ მისი თხზულებებიდან?

— „დიდოსტატის მარჯვენა“. მაგ წიგნში არის სწორედ ის, რაც ესოდენ საჭიროა ჭეშმარიტი ხელოვნებისათვის. მე მინდა ვთქვა, რომ ნამდვილი ხელოვნება არაფრისგან რაიმეს

შექმნა და როდესაც მხოლოდ სვეტიცხოვლის კედლის ბარელიეფმა, არსუკისძის მკლავმა და მცირე წარწერამ¹, მწერლის ფანტაზიაში საქართველოს მეათე საუკუნის მთელი ისტორია გააცოცხლა, ეს არის შემოქმედის გამარჯვება... მათიანებში ვრცლად აღწერილი გმირების შესახებ (იქნება ეს ვანტანგ გორგასალი, დავით აღმაშენებელი თუ თამარ მეფე), კიდევ ბევრს დაწერს ჩვენი შთამომავლობა, რომელიც, ცხადია, ეცდება აჯობოს ახლანდელ მწერლობას. მაგრამ უკეთესი რომანის შექმნა ხუროთმოძღვარ არსუკისძეზე, რომლის სახელი დაცხოვრება მხოლოდ კედლის ლაკონიურმა წარწერამ და ლეგენდარულ ბურუსში გახვეულმა ოთხტაეპიანმა ხალხურმა ლექსმა² შემოინახა, არა მგონია, მომავალშიც ვინმემ იკისროს და შესძლოს.

მეოცე საუკუნის ქართველი მწერლებიდან გალაკტიონი ხშირად ახსენებდა აგრეთვე მიხეილ ჯავახიშვილს, როგორც დიდ ბელეტრისტსა და ჭაბუკობის წლების პირად მეგობარს.

ქართველი მხატვრებიდან ლადო გუდიაშვილი ხიბლავდა. მახსოვს, მისი დიდი სიხარული, როდესაც ლ. გუდიაშვილის საიუბილეო გამოფენა გაიხსნა. ინტერესით კითხულობდა პრესაში დიდი ქართველი მხატვრის გამარჯვებას.

აქვე მინდა აღვნიშნო, რომ გალაკტიონი კარგად იცნობდა კლასიკოს მხატვართა შემოქმედებას და „თავისთვის“ თვითონაც ხატავდა. მის ხელნაწერებში ხშირია ჩანახატები: ადამიან-

¹ იგულ. „ხელი მონისა არსუკისძისაი, რათა შეუნდოთ“.

² „ხეკორძულას წყალი მისვამს,
მცხეთა ისე ამიგია“... და სხვ.

თა სახეები, პეიზაჟი თუ ფანტასტიკური საგნები. ყველა ესენი ფანქრით ან კალმითაა შესრულებული და მეტად ორიგინალურ ხასიათს ატარებს.

პოეტს ბევრი რამ ჰქონდა წაკითხული მხატვრობის შესახებ და პატივს სცემდა ისეთ მწერალთა სახელებს, რომლებიც ამ თემაზე წერდნენ. მაგონდება, ერთ სალამოს ოსკარ უაილდის „დორიან გრეის პორტრეტი“ და „სიცრუის დაცემა“, ფოიჭტვანგერის „გოია“ და კიდევ რამდენიმე ამგვარი ნაწარმოები იყო მისი საუბრის თემა...

* * *

ზემოხსენებულ კაბინეტში ორ მეგობარს ვესაუბრებოდი, როდესაც მეწვია ლალი მყავია და ლექსი გადმომცა.

ეს „ლურჯა ცხენებია“, ინგლისურად თარგმნა მხატვარმა ვახტანგ ერისთავმა. მას გალაკტიონის კიდევ რამდენიმე ლექსი აქვს თარგმნილი, სასურველია, პატივცემულმა გალაკტიონმა ეს თარგმანებიც ნახოსო...

ქალიშვილი მალე წავიდა.

რამდენიმე ხნის შემდეგ გალაკტიონი მობრძანდა. მხიარულად მოგვესალმა და სავარძელში ჩაჯდა.

ვისარგებლეთ მომენტი და „ლურჯა ცხენების“ ინგლისური ტექსტი ხმამაღლა წავაკითხეთ ერთ-ერთ მეგობარს გ. ჯაბაშვილს. გალაკტიონი, მხატვარი გ. კასრაძე და მე ვუსმენდით ლექსის განმარტებას. ორ-სამჯერ ტაეპები ქართულს შევადა-

რეთ. აშკარად ჩანდა შინაგანი რითმები. თარგმანის მაღალ-
ქღერადობა და ხარისხოვნება. გახარებული გალაკტიონი ათრ-
თოლებული ხმით ამბობდა:

— როგორც კი საშუალება მომეცემა, პრესაში გამოვაცხა-
დებ, რომ ჩემს ლექსებს ჰყავს კიდევ ერთი ნიჭიერი და მო-
სიყვარულე მთარგმნელი ვასტანგ ერისთავი, — შემდეგ მო-
მიბრუნდა, — ეგ კაცი აუცილებლად უნდა ვნახოთ, ახლოს
გავიცნოთ და ვესაუბროთ.

რასაკვირველია, დავეთანხმე და იმ დღის შემდეგ ხშირად
შემიხსენებია მისთვის მხატვარ ერისთავის გაცნობა, მაგრამ
ყოველთვის ან გამოსაცემ წიგნზე შრომა, ან მოგზაურობა, ან
ახალი სამუშაო აფერხებდა იმ სასურველ შეხვედრას და
მთარგმნელი-მხატვრის „პრესაში გამოცხადებას“, რასაც დღეს
სიამოვნებით ვკისრულობ, როგორც დიდი პოეტის ნაანდერ-
ძევს.

კარგად მახსოვს, ვ. ერისთავის ხელნაწერი გალაკტიონმა
ცალკე საქალაქში შეინახა იმედით, რომ ახლო მომავალ-
ში შექსპირისა და ბაირონის ენაზეც აელვარდებოდა მისი კი-
დევ რამდენიმე ლექსი.

პოეტი წამოდგა. გაიარ-გამოიარა ოთახში. საწერი მაგი-
დის ის უჯრა, სადაც ჩემი ხელნაწერები ელაგა, ნახევრად გა-
მოადლო და ღიმილით მკითხა:

— აქ რა გაქვს ახალი?

ფანქრით ნაწერი ფურცლები გავუწოდე.

გალაკტიონმა ხმამაღლა წაიკითხა მხიარულ ტონში დაწე-
რილი ლექსი „აფიშების გამკვრელის სიმღერა“ და სიცილით
თქვა:

— ყმაწვილებო, წინათ აფიშების გამკვრელები მეტად კოლორიტული ხალხი იყო. ქუთაისში ორი ცნობილი მეთაფიშე გახლდათ: შუხა და არტემა. ჰო-და, ერთხელ, 1914—16 წლებში გაიმართა შალვა შარაშიძის (თაგუნას) ლექსების კითხვის საღამო. წაიკითხა და წაიკითხა შალვამ თავისი ლექსები. შემდეგ არტისტები გამოვიდნენ. როდესაც რეპერტუარი ამოეწურათ, ისევ შალვა გამოვიდა სცენაზე და იხუმრა:

„ახლა რა ვიმღეროთ,
შემოგვაკლდა ტემა,
მოდო და ვამღეროთ
შუხა და არტემა!“

ამაზე დარბაზში დიდი სიცილი ატყდა. შუხამ და არტემამ კი „უკვდავება მოიპოვეს“ პოეზიაში.

გალაკტიონი ჩაფიქრდა. ხელნაწერი ხელში შეატრიალა და მოგონებებში ჩაძირულმა თვალების მილუღვით სთქვა:

— ბედნიერებაა პოეტისათვის პრესაში გადადგმული პირველი ნაბიჯები... მახსოვს, ჩემი პირველი ლექსი „ღრუბელი“¹ რედაქტორმა ლადო დარჩიაშვილმა დამიბეჭდა 1908 წელს თავის ჟურნალში „ახალი კვალი“. ახლაც მახსოვს, სიხარულით ფრთები შემესხა... ენერგია შემემატა... სულ სხვა გავხდი!

შემდეგ ყურადღება შეაჩერა იუმორისტულ ლექსზე, სადაც

¹ ხოლო 1960 წ. მწერლების კავშირში მოწყობილ გ. ტაბიძის ხსოვნისადმი მიძღვნილ საღამოზე ერთმა ორატორმა განაცხადა: გალაკტიონის პირველი ლექსი ჟურნალ „ფასკუნჯში“ დაიბეჭდაო, მეორემ კი ჟურნალი „ნიშადური“ დაასახელა.

პარიკების გამკეთებელზე იყო ლაპარაკი. ისევ გაიცინა და სთქვა:

— ამას, ალბათ, პარიკმახერები დაიტაცებენ! ეჰ, რარიგ არ მოვწონვარ დალაქებს! მე ხომ წვერს არ ვიპარსავ...

ლექსების საერთო სათაურს დახედა და დინჯად წაიკითხა:

— „ბოგირბანის მუშები“. რა არის ბოგირბანი?

— Подмостки сцены, — ვუპასუხე მე, — ქართულში ეს სიტყვა შემოიტანა ერთმა ჟურნალისტმა.

გალაკტიონმა რამდენჯერმე გაიმეორა ეს სიტყვა, რომ მეხსიერებაში ჩაეწერა.

— როდის დაიწყებ ჩემი პორტრეტის ხატვას? — მოულოდნელად მიმართა პოეტმა გივის.

— როდესაც მოიცლით. გოგი შემატყობინებს და... — მიუგო მხატვარმა, რომელიც ყოველ შეხვედრაზე განსაკუთრებული ყურადღებით აკვირდებოდა გალაკტიონის გარეგნობას და მისი სახის ნაკვთებს.

— აქამდე ვერ მოვიცალე... და ვერ შეგისრულე პირობა. დღეში თითო საათი რომ დაგიჯდე, საკმარისი იქნება?

— სავსებით. ბატონო გალაკტიონ, როდესაც მე ვიმუშავებ თქვენ შეგიძლიათ წეროთ ან იკითხოთ. მხატვრებს ხომ ჩუმი სამუშაო გვაქვს. ხელს არ შეგიშლით.

— მაშინ ხვალ ან ზეგ ჩემს ბინაში დაგიბარებთ, — თქვა პოეტმა. შემდეგ კი თითქოს თავისთვის ჩაილაპარაკა ალექსანდრე ბლოკის ცნობილი ლექსიდან:

«!), я хочу безумно жить:

Все сущее увековечить

მეოცე საუკუნის ქართულ პოეზიაზე საუბარში აღმოჩნდა, რომ გალაკტიონს კარგად არ ახსოვდა ლადო ასათიანის ლექსები... და ერთ საღამოს წყნარად, ყოველგვარი პათოსის გარეშე, ჩუმი ხმით ვკითხულობდი ასათიანის ლექსებს.

გალაკტიონი სავარძელში ჩაწოლილი მისმენდა, ტუჩთან მიტანილი მსხვილი ფანქრის ბოლო ოდნავ თრთოდა, იქ მეორედებოდა გაგონილი ლექსის რიტმი. დროდადრო შემაწყვეტი-ნებდა და ხმამაღლა იმეორებდა:

რა ქართველი ხარ და რა ჰაბუკი,
თუ მამულს თავი არ ანაცვალე, —
ეს აწვალებდა ცოტნე დადიანს,
მეც ქართველი ვარ და ეს მაწვალებს...

ან კიდევ:

„პეი, თქვენ, არაგველებო, გაუმძღარნო ომითა,
თქვენს საფლავებთან მოსვლა და მუხლის მოღრეკა მომინდა.

მეორე დღეს გალაკტიონი დღისით მოვიდა, ჯიბიდან ხელ-ნაწერი ამოიღო, გამომიწოდა და მითხრა:

— ლადოს ლექსია. იმ დალოცვილს ჩემზეც დაუწერია, მაგრამ დღემდე მის კრებულებში არ შეუტანიათ. ამ დილით ჩვენს მწერლებთან ვაქებდი ასათიანის ლექსებს, ერთმა ახალ-გაზრდამ იქვე დამიწერა და მომართვა. თუ ძმა ხარ, შენ რომ იცი, იმ პაპკაში ჩადე... ძალიან მომწონს.

დაკვირვებით წავიკითხე ლექსი:

„გალაკტიონს“!

საქართველოში შენს გარდა მგოსანს
დღეს ქების შაირს არ ვეტყვი, არა,
შენა ხარ ლექსის მეორედ მოსვლა,
და, რომ არ გითხრა, ივარგებს განა?!

და სხვ.
1939 წ.

დიდი ქართველი პოეტი ლადო ასათიანი ამ ლექსში მოხ-
დენილად ძერწავს გალაკტიონის ხასიათს, მის პორტრეტს.

— ეს ბავშვი არასოდეს არ გახდება პოეტი! — წამოიძინა
გალაკტიონმა, დივანიდან წამოდგა, მაგიდაზე გაზეთი დამიღო
და ლექსზე მიმითითა:

— არა, გენაცვა, ლექსი, რომელსაც ერთი წაკითხვით გაი-
გებ, არ ვარგა. უნდა რჩებოდეს მასში ჩასაფიქრებელი და
ამოსაცნობი აზრი... თუ დამიჯერებ, „მესაფლავე“ ახალგაზრ-
დობაში დაეწერე, თორემ ახლა არაფრად მიმაჩნია, რადგან იქ,
ჯერ ერთი, ახალი არაფერია ნათქვამი... ფორმა პრიმიტიულია
და ამოსაცნობიც არაფერი რჩება.

— თქვენ ეს წინათაც გითქვამთ, მაგრამ ეს ლექსი საზო-
გადობას მოსწონს.

— საზოგადოებას ბესო ელენტმა აუხსნა პირველად, რომ

¹ ამჟამად ეს ლექსი შეტანილია ლ. ასათიანის კრებულში „ჩემი ქვეყ-
ნის ოქროყანა“, 1959 წ.

ჩემს ადრინდელ ლექსებში ქვეტექსტების სახით პატრიოტიზმი და რევოლუციური სულისკვეთებაა მოცემული, თორემ... კრიტიკოსებს გააზრების თავი არ ებათ და მაშინათვე სიმბოლისტობას მომაწერდნენ, — ასე ატყუებდნენ საზოგადოებას, — გაცხარდა გალაკტიონი და შემდეგ ხაზი გაუსვა იმ გარემოებას, რომ მის ლექსებში არ არის სიკვდილისა და ჭლეტის აპოლოგია, თვითმკვლელობის აგიტაცია, ლოთობისა და სიმანინჯის კულტი — ეს სიმბოლიზმის ძირითადი და მუდმივი თანამგზავრები.

გალაკტიონმა ნერვიულად გაიარ-გამოიარა ოთახში, შემდეგ ისევ აიღო გაზეთი და ახლა მეორე ლექსი წამაკითხა.

წარბები შევკმუნენ.

— ხომ ხედავ... ხომ გესმის? ამის ავტორს ზომიერებაა გრძნობა არა აქვს.

მაგრამ თუ ვისიმე ლექსი მოეწონებოდა, თუ შიგ პოეტური სულის ნაპერწკალს წააწყდებოდა, მთელ სხეულში აღტაცების ჟრუანტელი დაუვლიდა, იმ დღეებში ვინც შეხვდებოდა, ყველას ურჩევდა წაეკითხა, თვითონაც ხშირად წაიბუტბუტებდა მოწონებულ ტაეპებს, ვისიც არ უნდა. ყოფილიყო ის სტრიქონები — ძველისა თუ ახალის, პრესაში აღიარებულისა თუ ხელნაწერებში ჩაფერფლილი მივიწყებული პოეტისა.

* * *

მივიწყებული პოეტები... ესაა ვითარების ქარბორბალამ გარდასული წლების ფერფლი მიაყარა მათ წმიდა სახელებს.

ჩვენი სახელოვანი პოეტები და მწერლები, მეცნიერები და ჟურნალისტები სათუთად აცლიან მტვერს უცნობი პოეტების ხელნაწერებს და თუმც, ცოტა არ იყოს, უტემპოდ, მაგრამ კეთილსინდისიერად ამზეურებენ.

ქართული სიტყვის დიდ მესაიდუმლეს და ჩვენი საუკუნის პოეზიის პულსის განუყრელ ებგურს გალაკტიონს მუდამ თან სდევდა მაღალი იდეა—მოეხადა მოქალაქეობრივი ვალი იმ პოეტების წინაშე, რომლებსაც პირადად იცნობდა და რომელთა სიმღერას დიდი ექო დაეტოვებინა მის მგზნებარე გულში.

— ასი პოეტის სახელი და გვარი ჩამოვწერე, ასი დავიწყებული პოეტის! ყველას პირადად ვიცნობდი. თითქმის ყველა მათგანის თითო ან ორ-ორი ლექსი მახსოვს. ერთხელ დავსხდეთ და ჩავიწეროთ. ზოგს მე დავწერ, ზოგს გიკარნახებ, კარგი? — მითხრა ერთხელ ჩვენსას და დასძინა, — აღდგენა მათი სახელებისა, ვინც ცარიზმის ბნელ დროში პოეტურად ოცნებობდა ხალხის ბედნიერებაზე, წმიდა საქმეა. მოდი, შევადგინოთ მათი ლექსების კრებული, წარვადგინოთ, დავსტამბოთ.

— ალბათ მათ შორის ზოგი დიდი გაქანების ადამიანი იყო!
— ჩაერია საუბარში მამაჩემი.

— ვერ წარმოიდგენ, ჩემო ბენო, რა ნიჭიერი იყო ზოგი მათგანი, — უპასუხა გალაკტიონმა, — მაგალითად, ჩემი სკოლის ამხანაგი ქუჩუ ქავთარაძე, ბრწყინვალე განათლებისა და ნიჭის კაცი იყო. სრულიად ახალგაზრდა გარდაიცვალა. მახსოვს, მისი დაკრძალვა მიტინგად გადაიქცა... მე ლექსით გამოვედი იქ!

¹ გალაკტიონის სკოლის ამხანაგების გადმოცემით, ეს იყო: „მე დავიბადე განთიადისას“.

რამდენიმე დღის შემდეგ მის ლაბორატორიაში ვისხედით (გალაქტიონის მეორე კაბინეტში). მაგიდაზე ქალაღდის თაბაქი იღო. აქ გალაქტიონის ხელით ჩამოწერილი სიიდან შორეული ვარსკვლავებივით ციმციმებდნენ საუკუნის მიტოვებულ ბურუსში ჩაძირული ქართველი პოეტების სახელები და გვარები.

მდუმარედ დავცქეროდი ერთ თეთრ ქალაღდზე მოთავსებულ პანთეონს, რომელსაც მიუკარებლად მიჰყვებოდა გალაქტიონის შუათითზე დაყრდნობილი ფანქარი. დიდი მგოსანი ფატაცებით მიამბობდა, მაცნობდა სრულიად უცნობ ან ძველ პრესაში ორ-სამჯერ განაეღვებ მეღეჭსეთა ვინაობას.

— ეს სათუთი ლირიკოსი იყო... სულ ახალგაზრდა დაიღუპა... ეს გააციმბირეს რევოლუციური ლექსებისათვის... ამას, საწყალს, ბედმა არ გაუმართლა, თორემ დიდი პოეტი გახდებოდა... ამასთან ერთად სემინარიაში ვსწავლობდი, ძალიან გვიყვარდა ყველას... ამან თავი მოიკლა, მძიმე დრო იყო, მძიმე, — ამ სიტყვებთან გალაქტიონი რამდენიმე ტაეპს ამბობდა ხოლმე ხან ერთისა და ხან მეორის ლექსებიდან.

იმ დღეს ვაპირებდით ასი (თუ მეტის!) პოეტის ლექსების აღდგენაზე მუშაობის დაწყებას, მაგრამ... მაგიდაზე ტელეფონი აწკრიღაღდა, გალაქტიონი სადღაც მიიწვიეს, ჩვენი ორიგინალური სამუშაო „გრაფიკიდან ამოვარდა“, იმ დღეს მოჰყვა რამდენიმე აფორიაქებული დღე — სხვადასხვა ორგანიზაციებში მოუწყვეს გალაქტიონს შეხვედრები და ბანკეტები. შემდეგ გამომცემლობაში სასწრაფოდ წარსადგენ წიგნზე დაძაბული მუშაობა და ოფიციალურ პირებთან საქმიანი საუბ-

რები, ისევ შეხვედრები და სხვ. მუდამ ცხოვრების რიტმთან ნაბიჯშეწყობილ პოეტს, რომლის ბუნება ჩამორჩენას ვერ ეგუებოდა, აღარ ჰქონდა უკან მოსახელი დრო, რომ ეფიქრა და ეზრუნა წარსულის მოგონებათა აღდგენაზე, ძველი პოეტების მიმქრალი ლექსები აეგიზგიზებინა. ყოველდღიური სი-ახლე და მომავლის პერსპექტივები ავსებდნენ მის მოუსვენარ არსებას, მისი პოეტური ნათელსილვის ყველა წერტილს.

* * *

და განა ერთი და ორი იდეა აწუხებდა მის მაღალ გონებას!

— მოუსვენრობა დამჩემდა... ბედნიერი კაცი იყო ბაიონი, მოგზაურობდა... სულის სიმშვიდეს პოულობდა სივრცეთა გადალახვაში. ბოლო დროს ველარ მომისვენია... სიამოვნებით წავიდოდი ინდოეთში, ეგვიპტეში, საბერძნეთში... ვნახავდი, დავწერდი და უფრო ხალისიანი დავბრუნდებოდი ჩემს ქვეყანაში — ამბობდა აღელვებული და ბოლთას სცემდა.

მამაჩემმა თავი ასწია წყნარად და ღიმილით უთხრა: — ჯერ ერთი ბაირონი ბედნიერი არ იყო, შენ კი ხარ... ჰო-და: — ვინ გიშლის მოგზაურობას, რა გრწოლის?.. წადი, ნახე, გაეცანი, დაწერე!

— ეჰ, რა მიშლის და... რა მიშლის და ჩემი ავადმყოფობა! — ნერვიულად, მაგრამ ხმადაბლა სთქვა გალაკტიონმა.

მამაჩემმა გამხნევება დაუწყო. შეჰყვინენ საუბარს. მეც კი დაკეცილ დარაბას მიყრდნობილი ფანჯრიდან მოწყენილად გავცქეროდი ქუჩას და ვფიქრობდი: „რა უხდა ახლა ამ კაცს

ეგვიპტეში? რამდენი წასულა იქ და დაბრუნებულა, მაგრამ რომელმა დაწერა ეგვიპტის თემაზე ისეთი კარგი ლექსება: როგორიცაა:

სარკოფაგიდან დგება მუშია.. რა სიჩუმეა... პაერი ლურჯი

აბრეშუმია...

ორხიდეები ეცემა ნილოსს, როს მხურვალეა ქვიშაზე კენესის,
უნდა, რომ სული არ მიიხილოს, უნდა სამარე ჰპოვოს რამზესის..

ის იყო მეფე. ახლა მტვერი, რომ საუკუნეთ რიგი გარიყოს,
არ შეუძლია იყოს პირფერი, არ შეუძლია მტვერი არ იყოს...

და საუკუნეთ რიგს სთელის მუშია: მზიანი დღეა თუ სამუშია.

(„სასაფლაონი“)

ან კიდევ მეტად კოლორიტული „ვარდისფერი საფეხურები“, სადაც პირველსავე სტრიქონებში გაისმის ძველი ეგვიპტის უკვდავი ძეგლის გამოძახილი:

აჰყვე კიბეებს, სადაც სფინქსი ქეებს ეფერება,
და შიშში გრძნობდე, რომ ახლოა ბედნიერება

ასე ვფიქრობდი მაშინ. ახლა კი, ვამბობ: მართალი ყოფილა ჩვენი მსცოვანი პოეტი! იგი ოცნებობდა, უფრო მძაფრად აღექვა სურნელება აღმოსავლეთის ზღაპრული ძეგლებისა და ქართულ ენაზეც აემღერებინა ფარაონთა პირამიდების ფონზე მობობოქრე თავისუფლებისათვის მებრძოლი ხალხების ძღვევამოსილი ჰიმნები.

მაგრამ პოეტის ჭაბუკურ შემართებას სუროსავით შემოტმასნოდა ხანდაზმულობა, პერიოდული ავადმყოფობა და ეს ოცნებებიც დაკარგულ პოეტთა აღორძინებაზე ფიქრივით გა-

ნუხორციელებელი რჩებოდა, როგორც ლტოლვა მეზღვაური-
სა, რომელსაც ერთ დროს ასე უმღერა გალაკტიონმა:

შორს ზურმუხტისფერ სიერცის იქით ნაპირი ჩანდა,
დასასვენებლად მიიწედა იქ მეზღვაური.
ერთხელ ცა გაწყრა, აირია, გაეინიანდა —
ტალღებმა შექმნეს ვაი-ვიში, აურზაური...
და გემს უმიზნოდ, საუკუნოდ დაუგვიანდა.
მას აქეთია იალქანი ზღვაზე მიფრინავს,
მისთვის ერთია სად დახუქავს ოცნება თვალებს,
მიუწვდომელი სანთლები კი ბრწყინავს და ბრწყინავს...
როგორ მაგონებს ის სანთლები ჩემს იდეალებს!
(„სანთლები“)

— კაცი უნდა წაახალისო, გაამხნევეო! ეს ყველას მოვალეო-
ბაა. ამას დიდი მნიშვნელობა აქვს. კიცი, ბაბუაჩემს ვუყვარდი
ძლიერ, უღვაშზე ხელს გადაისვამდა და იტყოდა ხოლმე:

ყველა კაცი კაცია,
გალა სულ სხვა კაცია.

უკეთესად ვერ გალექსავდა, მაგრამ ამას მაინც ხშირად
იტყოდა საწყალი. მახსოვს, სიამაყით ავივსებოდი სულ პატა-
რა ბიჭი... შინაურები ახლაც გალას მეძახიან, ბავშვობიდან
მომწონდა ჩემი სახელი „გალაკტიონი“ და აკი ერთხანს ჩემს
ლექსებს მხოლოდ სახელს ვაწერდი. ზოგს არ მოეწონა ეს —
შოთას, ილიას, აკაკის და ვაჟას ბაძავსო... რა ცუდი პოეტები-
სათვის მიმიბაძავს?! კაცო, აბა ვის მივბაძო-მეთქი, ვეკითხე-
ბოდი. ახლა სახელსაც ვაწერ, გვარსაც, სახალხო პოეტობასაც

— ვითომ ეს უფრო თავმდაბლობაა? ქართველი მკითხველთათვის მანც არ იშლის — მხოლოდ სახელით მახსენებს...

ერთხელ მის კაბინეტში რამდენიმე აფიშა ვნახე. ზედ დიდი ასოებით ეწერა: „გალაკტიონოლოგია“. შევეკითხე, თუ რას ნიშნავდა.

— ეს, ხომ გახსოვთ, ჩვენი ბესო ჟღენტის შექმნილი ტერმინია. გზაზე შემხვდა, გადამკოცნა და მითხრა, დადგება დრო და შეიქმნება ლიტერატურის ახალი დარგი — გალაკტიონოლოგიაო. ეს სიტყვები გულწრფელად იყო თქმული. ერთხელ სტამბის მუშებთან გავიხსენე, ერთმა მათგანმა კი დიდ ქაღალდზე დაბეჭდა: „გალაკტიონოლოგია“ და მომართვა.

— კარგი ნათქვამია. ასეთი დარგი მომავალში მართლაც იქნება. ამის საფუძველია ის თეორიული ხასიათის სტატიები და სადისერტაციო ნაშრომები, სადაც შენი პოეზიის გაშუქებაა მოცემული, — უთხრა მამაჩემმა.

გალაკტიონი წამოდგა, ჩვეულებისამებრ გაიარ-გამოიარა ოთახში, წიგნების კარადაზე მიგვითითა:

— თუ აქ ჩემი ლექსების ძველი გამოცემებიცაა, ზოგს ჩემი სახელი სწორად არ აწერია და ახლაც დასანახად მეჭავრება... „კ“-ს მაგივრად „ქ“ დაუბეჭდიათ ჩემს სახელში!

მართლაც, ამ საუბრიდან რამდენიმე ხნის შემდეგ 1953 წ. 1 ნოემბერს სტუდენტებმა უნივერსიტეტში საიუბილეო სადამო გაუმართეს. გალაკტიონის ბინაზე მოვიდა ერთი სტუდენტი და მოსაწვევი ბარათები მოიტანა. ზედ „გალაკტიონი“ ეწერა.

— არ წავალ! — ყრუდ, სინანულით თქვა გალაკტიონმა და შეწყვეტილი მუშაობა განვაგრძეთ, მაგრამ როდესაც შეხ-

ვედრის დრო მოახლოვდა, თავისი მეუღლისა და ჩემი დაჟინებული თხოვნისა და დაყვავების შემდეგ ჩაცმა დაიწყო.

უნივერსიტეტის სტუდენტებმა გულთბილი შეხვედრა გაუქმართეს. გალაკტიონმა წაიკითხა ლექსი „განჭვრეტა ოცდაათი წლის“.

* * *

მართლაცდა, სიტყვაბტკიცე იყო გალაკტიონი! იტყოდა რამეს და შემდეგ ცხრაკლიტულივით შეუვალი იყო. ეს კაცი, როგორც იტყვიან, ბუზსაც არ დაიფრენდა, თუ საქმე მის პიროვნებას ან მის საკუთარ აზრს შეეხებოდა.

ასე მსურს და ასე იქნება! — ამბობდა მისი თვითებული მოძრაობა, მბრძანებლური გამონხედვა თუ სიტყვა და ამას ვერავინ შელახავდა, ვერც მახლობელი და ვერც გარეშე-სახოგადოებაში სარდლობას იყო მიჩვეული და ეს ჩვეულებრივად მიაჩნდა.

მაგონდება, გალაკტიონმა თავისი მოსაწვევი ბარათი მოკცა და მითხრა:

— შენ წადი. მე პატარა საქმე მაქვს და, ალბათ, დაგვიანებით მივალ!...

მარქსიზმ-ლენინიზმის ინსტიტუტის თბილისის ფილიალის დარბაზში გაიმართა დისკუსია გრ. აბაშიძის „ლაშარელას“ გარშემო. ხალხი დაძაბულად უსმენდა გაცხარებულ კამათს. ტრიბუნაზე ერთ-ერთი ჩვენი მხცოვანი მწერალი იდგა.

მოულოდნელად პრეზიდენტში შევიდა გალაკტიონი და ფეხაკრეფით მიაშურა სკამს. დარბაზი აშრიალდა.

— გაუმარჯოს გალაკტიონს! — წამოიძახა აუდიტორიიდან ვიღაცამ და საერთო ტაშის გრიალში პოეტი იძულეებულად გახდა ყოველი მხრისკენ თავაზიანად მისალმებოდა ხალხს.

რომლის ვაშა პრეზიდენტს და ტრიბუნაზე მდგარ ორატორსაც მოელო.

* * *

ლირიკოსთა ლირიკოსი, პოეტთა მეფე, პოეტი-აკადემიკოსი, საქართველოს სახალხო პოეტი — ასე ახსენებდნენ ძველი და ახალი კრიტიკოსები გალაკტიონს, რომელსაც, ცხადია, ეამაყებოდა თავისი საზოგადოებრივი მდგომარეობა და მუდამ ურყევად იდგა ამ პოზიციაზე. მაგრამ პირად ცხოვრებაში მის მრავალწახნაგოვან ხასიათს ახლდა ერთი დიდი და განუყრელი ნიშანი — უბრალოება... უყვარდა, როდესაც ახსენებდნენ მხოლოდ სახელით — გალაკტიონი.

მთელი თბილისი იცნობდა გალაკტიონს, თვითონაც უამრავს იცნობდა პირადად: მწერლებს თუ მეცნიერებს, სტაჟბის მუშებსა თუ ჟურნალისტებს, არტისტებსა თუ ინჟინრებს, სამხედრო ოფიცრებს, ლიფტის მუშებს, მეპაპიროსეებს, მეყვავილეებს, სტუდენტებს, მოწაფეებს, ექიმებსა თუ მილიციის მუშაკებს, შოფრებსა და ქარხნის მუშებს, აგრონომებსა და სხვ.

უამრავი მოქალაქის ბიოგრაფია იცოდა და ყველა მათგანს სახელითა და გვარით იცნობდა, ხოლო განურჩევლად პროფესიისა აფასებდა მათ პატიოსანი შრომისა და პატრიოტული სულის მიხედვით. იცოდა მათი სევდა-სიხარული და ოჯახური მდგომარეობაც კი.

მაგრამ სტუმრად მისვლა არ უყვარდა. ხშირად იტყოდა: — სხვის სახლში ყოფნა არ მიყვარს. ჩემი მახლობლებიდან თქვენთან, კორნელი კეკელიძესთან და ფედია ჩუდუცკისთან დავდივარ ხშირად...

განსაკუთრებით ფაქიზად ქალებს ექცეოდა.

1952 წლის 11 მაისს გალაქტიონი დაესწრო დიდუბის პანთეონში იოსებ იმედაშვილის დაკრძალვას... შემდეგ ტაძრის ეზო დაათვალიერა. უცებ ორმა მანდილოსანმა მიაბრუნეს თავისკენ. გალაქტიონი დიდი სიყვარულით მიესალმა მათ.

— ექენი ჩემი ყრმობის მეგობრებია — გამაცნო უკვე ქალაქა, მაგრამ ლამაზი დები მარო და ტასო ციციშვილები.

— მაგონდება თქვენი მშვენიერი დაბურული ბალი. რამდენი კარგი სადამო გამიტარებია იქ! — იგონებდა გალაქტიონი.

ნაცნობ ქალიშვილებს შეხვედრისას შუბლზე აკოცებდა, სოლო ასაკოვან ქალებს რომ შეხვდებოდა, სამხედრო კაცავით ქუსლს ქუსლზე მიიდგამდა, ქუდს მოიხდიდა, ოდნავ მოიხრებოდა და ხელზე ემთხვეოდა. თავმდაბლად მოიკითხავდა და მოკრძალებით შეუქებდა სილამაზეს (თუნდაც გარეგნულად შეუხედავი ყოფილიყო!). მანდილოსნებთან საუბარში ოჯახის მოყვარული კაცის შეხედულებებს ავლენდა მუდამ და, ამრიგად, ვერც ერთი ქალი ვერ დაიტრამბახებდა გალაქტიონისაგან განსაკუთრებულ ყურადღებას.

მუდამ გამჭირდავად იცინოდა, როცა მოხვდებოდა ისეთი ნაწარმოები, სადაც ავტორები თვითკმაყოფილი პრანქვიზალწერენ თავიანთ საკუთარ დონეჟანურ ამბებს.

— ნახე, რა დაუწერია ამ უსირცხვილოს! — მითხრა ერთხელ და ვიდაცის მემუარებიდან წამიკითხა ვისრამიანული ეპიზოდი, თან ამბობდა: — ეს კაცი იაფფასიანი სახელისათვის ყველაფერზე თანახმაა, მაგისტანებს თავიანთ ცოლებზეც ალაყბებენ ხოლმე ძმაბიჭები და მერე დასცანიან...

გალაკტიონის ფაქიზი ხასიათი ვერ ეგუებოდა უხამსობას. ზოგს არ ესმოდა ეს და ცუდად სარგებლობდა მისგან თავის გაყადრებით.

მაგონდება, ერთი დრამატურგი მუდამ ცდილობდა „შინაურულად“ შეხვედროდა გალაკტიონს. ხელს პირველი თვითონ გაუწვდიდა, მეორეს მხარზე დაჰკრავდა და რაიმე უახროს იტყოდა ხოლმე ორიგინალურის თქმას მოწყურებული. ერთხელ რუსთაველის პროსპექტზე შეგვხვდა. გალაკტიონს ბეჭებზე დაჰკრა ხელი და მიმართა:

— როგორ ხარ ჩემო გალაკტიონ? ჰა, ხომ ხარ კარგად?!. ერთ ანეგდოტს გიამბობთ. ერთი კაცი მივიდა ექიმთან და... მოყვა რაღაც უკბილო სკაბრეზულ ამბავს, თან ხითხითებდა. გალაკტიონი კი არ უსმენდა და ქუჩას გასცქეროდა. როცა დავშორდით, პოეტმა თქვა: — ვერ ვიტან მაგ ჩიტირეკიას ხითხითს და ნუთუ ვერ გრძნობს!

ვულგარული ყველაფერი სძულდა — ლაყბობაც, სიძლერაც და ტანისამოსიც.

ერთხელ მის კაბინეტში ახალგაზრდა კაცი შემოვიდა და გალაკტიონს ბარათი გადასცა. სანამ პოეტი პასუხს მისცემდა, ჭაბუკი ჩამოჯდა, ბრიოლინით გასლექილ თმებზე ვერცხლის ბეჭდიანი თითები მოითათუნა და ფეხი ფეხზე გადაიდო. სმაჯურის სიგანის შარვლის ტოტებიდან მოჩანდა ჭყეტელა ფერის წინდები, მკერდი ჩაელედა.

როდესაც მოსული გალაკტიონმა ჩვეული თავაზიანობით გააცილა, ჯერ ჩაიცინა, მერე ჩაფიქრდა და სთქვა:

— მძულს, როცა მამაკაცი უშნოდ იკლავება. ბეჭედი... დეკოლტე... ფუ, რა ვაჟაკის საქმეა!

გალაქტიონს გასაგონად სძულდა უშვერი სიტყვა. ამ მხრივ მიუყარებელი იყო. თვითონაც არასოდეს იტყოდა რაიმე უხი-
ავს და სპეტაკი ცნებებით აზროვნებდა და მეტყველებდა.

მუდამ უბრალოდ იცვამდა. შინაურები ამაოდ ცდილობ-
დნენ, რომ პოეტი ელეგანტურად ყოფილიყო ჩაცმული. აჩე-
მებულად უყვარდა ერთი რომელიმე პალტო ან კოსტუმი.

ერთ მშვენიერ დღეს, როცა ჩვეულებრივად ვადარებდით
გამოსაცემად გამზადებულ ერთტომეულის ტექსტს, ოთახში
ქ-ნი ნინო და ნუნუ შემოვიდნენ და გალაქტიონს ორი ახალი
კოსტუმი მოუტანეს — ლურჯი და ნაცრისფერი.

— ოჰ, რა მშვენივრად გივაჭრიათ! — შესცინა გალაქტი-
ონმა.

— უნივერსალში მითხრეს, დაიზომოს და თუ არ გამოად-
გება, გამოვიცვლითო... მიიზომეთ! — სთხოვა ნუნუმ.

— ჩემო ნუნუშკა, ახლა მე ვმუშაობ. ხო-და, უნდა გავი-
ხადო, ჩავიცვა... მერე უნდა მატრიალოთ აქეთ-იქით. თანაც
მე ხომ ვერ დავინახავ, როგორ მომერგება. თუ არ ეზარება.
გოგიმ დაიზომოს.

— მოიტათ! — წამოვიძახე სიცილით და წამოვიჭერი.

— ჩააცვიოთ, მაგას ჩააცვიოთ! — იცინოდა გალაქტიონი.

ყველანი მეორე ოთახში გავედით და სიცილით მოვარგეთ
პოეტს ტანსაცმელი.

სამუშაოს რომ მივუბრუნდით, გალაქტიონმა ღიმღლია
მითხრა:

— მოდი და ელაპარაკე ქალებს... ეგ მინდა ახლა მე?

გუნებაში კი უხაროდა ცოლ-შვილის ყოველდღიური
ზრუნვა და ოჯახური სითბო. თუმცა იმ კოსტუმებს ხშირად

არ ეღირსებოდა გალაკტიონის მხრებზე მორგება, თუ შეხვედრა-სალამოებზე არ მიიწვევდნენ მგოსანს და თუ არ გასკრიბდა მისი მეუღლის დაუღალავი შეგონება.

გალაკტიონი საათის ტარებას ვერ ეგუებოდა. რამდენიმეჯერ იყიდა მაჯის საათი. ან ხშირად უჩერდებოდა და გადააკდებდა, ან ეკარგებოდა, რადგან წამდაუწუმ იხსნიდა და მიადებდა სადმე.

ერთი ძველი პალტო უყვარდა. ახლის ყიდვაზე კატეგორიულ უარს აცხადებდა.

ვაჟას ნათქვამს გაიმეორებდა ხოლმე:

ოღონდ ვაჟაკი ვარგოდეს,
რა უშავ ჩოხის ძველასა!

* * *

როგორ უყვარდა ხალხში ყოფნა! მას ნახავდით ყველა ბაზარზე, კოლმეურნეებთან მოსაუბრეს. გააჩერებდა თავის მანქანას წყნეთის გზაზე. გზისპირას არხთან ჩამომჯდარი მუსაიფს გაუბამდა ჩანთიან მოწაფეს თუ ჩიბუხოსან ბერიკაცს. წვეროსანი კაცი რომ ენახა, გააჩერებდა, მხიარულად შეესიტყვებოდა, ვინაობას გამოჰკითხავდა და ალერსიანად შეახებდა ხელს წვერ-ულვაშზე.

განსაკუთრებული ყურადღებით აკვირდებოდა ხალხის მეტყველებას. ხშირად იტყოდა: — ბაზარში სიარული საჭიროა, ათასნაირ გამოთქმას გაიგონებს იქ კაცი.

სხვადასხვა ხალხის ჩაცმულობის, ქცევის, ადათ-წესების დაკვირვება და შესწავლა მისი ნამდვილი სტიქია იყო და ყველა ჯურის მოქალაქეს გულთბილი უბრალოებით თავისადნი

მეგობრულად განაწყობდა, გულწრფელად მოაქცევდა, სულის სიღრმიდან ნათქვამს მოუსმენდა და ნათესაურად გაიზიარებდა.

აუდიტორიის წინაშე ყოფნა, აქტიური მონაწილეობის მიღება საზოგადოებრივ ღონისძიებებში, ლიტერატურული საუბრები, შეხვედრები, გამოფენები, დილა-საღამოები პოეტის ცხოვრების განუყოფელ ნაწილად ჰქონდა წარმოდგენილი. მუდამ ხალისით მიდიოდა და ყოველთვის მზად ჰქონდა ახალი ლექსი.

პოეტის სახლის წინ, პატარა სკვერში რამდენიმე წიწვიანი ხეა. ერთი მათგანი, ყველაზე მომცრო ნაძვი, გალაკტიონის ხელითაა დარგული.

— ისე ვუვლიდი, როგორც პატარა ბავშვს, მაგრამ მაინც დაჩაგრული ტანისაა! — შემომჩივლა ერთხელ.

მეორე სართულზე გალაკტიონის ბინის კარზე მხოლოდ ელექტროზარის თეთრი დილაკი გამოირჩეოდა, არავითარი წარწერა არ იყო.

აქედან შეიძლებოდა შესვლა პოეტის ბინაში.

მყუდრო კაბინეტს ამშვენებდა უბრალო საწერი მაგიდა, ლითონის რეფლექტორიანი მოძველებული ფორმის, ხანაც პლასტმასის მქრქალ შუქფარიანი ლამპით.

პალეხელი ოსტატების ნახელავ ორიგინალურ საწერ მოწყობილობაზე, რომელიც თბილისის ერთ-ერთი სკოლის მოსწავლეებმა უსახსოვრეს, გამოსახული იყო პუშკინის „ქინკები“.

მაგიდაზე, ტელეფონთან, ელაგა: ხელის ფარანი (სტუდენტ ჰ. კობიძის ნაჩუქარი), ფაიფურის ოთხკუთხედი საფერ-

ფლე. რომელზეც აღბეჭდილი იყო გაზეთ „იზვესტიის“ ერთ-ერთი ნომრის სათაური და რამდენიმე სტრიქონი. ეს საფერ-ფლე პოეტისათვის რუსეთში უჩუქებიათ. იქვე იდო ტარიანი გამადიდებელი შუშა, რომელსაც პოეტი ძველი ხელნაწერების ან გეოგრაფიული ატლასის ამოკითხვისას ხმარობდა.

იატაკზე იდო გელათის ტაძრის სვეტისთავი, დამშვენებული ვაზის მტევნების ორნამენტებით. ეს ჩუქურთმა პოეტს თავისი „პობედით“ ჩამოუტანია ქუთაისიდან. დევის ნასხეპით გალურსულიყო იგი და თითქოს ბუტბუტებდა გალაკტიონის უკვდავ ლექსებს:

ნახე ნანგრევთა ქვები დიადი:
რა სიმაგრეა მასში ჩართული.
ო, ეს ჩუქურთმა, ეს იშვიათი
მშვენება, სიერცით შემოკვართული“.
(„სიძველენი“.)

ქვა, განა ქვაა? ეს რთული
ნიშნები, ჩემთვის ნათელი —
გაცოცხლებული ქვის გული
ჟღერს, როგორც კორიანტელი.
ქვა, მოწყვეტილი აქ კლდეებს,
ქვა კი არ არის — სიმია.
გარდასულ საუკუნეებს
ეტყვი: ეს თქვენი ღიმია.
აქ ბევრი სისხლი დაღვარეს,
მებრძოლი, ბევრჯერ მინახავს,
ჩუქურთმის ნატეხს საყვარელს
ომის ღროს უბით ინახავს.
(„ქართული ორნამენტი“.).

იატაკიდან ჰერამდე აღმართული თაროები სავსე იყო საქალღებით. აქ დაცული იყო გალაკტიონის ხელნაწერთა ფასდაუდებელი კოლექცია: ლექსები, მოგონებები, შთაბეჭდილებანი, ფოტოსურათები, პოეტისა და მხატვრების ჩანახატები, ესკიზები, ეტიუდები, ციტატები და სხვა ჩანაწერები. გალაკტიონის სიტყვით, ქართული კულტურის ამ განძს უბრალოდ „მასალები“ ერქვა.

ერთ კედელზე გაკრული იყო ორი წყრთის სიგანის სახაზავი ქალღი, რომელიც გამოსაცემად წარდგენილი ლექსების მდგომარეობის ერთგვარ კარტოთეკას წარმოადგენდა.

გალაკტიონის დედის სურათი მუდამ ამშვენებდა პოეტის კაბინეტს. სხვა სურათები კი იცვლებოდა. პოეტის შთაბეჭდილება მუდამ სიახლეს მოითხოვდა და მისი კაბინეტის კედლებს სხვადასხვა დროს ახალისებდა სურათები: „დროშები ჩქარა“ — ალისფერ-წითელი დროშების ფონზე ფერწერით ეხატა რევოლუციური სულისკვეთებით გაცისკროვნებული გალაკტიონის სახე... გალაკტიონის პორტრეტი, გრაფიკა — პოეტს დოინჯი აქვს შემორტყმული და ყელზე კაშნე უკეთია. — ხშირად უხუმრია. ამის დამხატავი კარგი მხატვარია, მაგრამ ამ სურათში ყაჩაღს ვგავარო. აქვე იყო ეკატერინე გაბაშვილისა და პოეტის ოჯახის წევრთა ფოტოსურათები.

წიგნების პატარა კარადაზე იდგა თაბაშირის თეთრი ბიუსტი — გალაკტიონი საშუალო ასაკში.

მართალია, გალაკტიონს ბიბლიოთეკა არ ჰქონდა მდიდარი, მაგრამ ჰქონდა მთელი რიგი უნიკალური წიგნები, მათ შორის მაგონდება აკად. კორნელი კეკელიძისგან ნასახსოვარი

ძველი ქართული წიგნი, ნუსხახუცური ხელნაწერი, რომელიც ხშირად მინახავს პოეტის ხელში.

დაალაგებდა ამ ოთახს ქ-ნი ნინო, ყველა ნივთს დააკრია-ლებდა, თავის ადგილს მიუჩინდა.

— ყველაფერი მოვაწესრიგე, შვილო! დაჯდეს ახლა და მყუდროდ იმუშაოს, მაგრამ...

მაგრამ რამდენიმე დღის შემდეგ გალაკტიონის სამუშაო ოთახი ისევ არეული იყო.

ყველაფერი ხელთან ახლოს უნდა ჰქონოდა პოეტს, ყველა-ფერი „მოძებნილი“ უნდა ყოფილიყო, მისი არქივის ყოველი სტრიქონი ხელქვეით უნდა ჰგულებოდა. მერე ჩაიძირებოდა ამ ორომტრიალში, ჩაიფლობოდა ქალღმერთებში, შუბლზე ნათელი მოეფინებოდა და წერდა. წერდა...

ბუმბერაზული შემართებით იჭდა მაგიდასთან, უბრალოდ ჩაცმული, ზაფხულში — ზოლიან პიჟამაში, ზამთარში — მოყვითალო სვიტრით (და არა ისე, როგორც ჩვენმა კინოოპერატორებმა გადაიღეს ერთხელ, როგორც თვითონ იტყოდა ხოლმე, „ჩაპიჯაქებული“). დინჯად მუშაობდა. უცებ თავს ასწევდა, აღელდებოდა, წვერწატეხილ ფანქარს ან დაცლილ ავტოკალამს მიაგდებდა:

— რა იქნა... აქ ერთი წესიერი კარანდაში მქონდა! — დაუწყებდა ძებნას (ფანქარს და კალამს ორივეს ასე უწოდებდა)... იპოვნიდა.

— ოჰ, ეს მშვენიერია! — იტყოდა ღიმილით რომელიმე უშნო ფანქარზე და წერას განაგრძობდა.

— ნინა! — გასძახებდა მეორე ოთახში მეუღლეს, — შენი ჭირიმე, ერთი ის მასალა მომიძებნე, იმ დღეს რომ...

და ნინო ნახევარ სიტყვაზე გაუგებდა, მაშინათვე უპოვნოდა, მიაწოდებდა. მან ხომ ზეპირად იცოდა, სად რა ინახებოდა პოეტის დაწყობილსა თუ აწეწილ არქივში, რადგან თვითონ უვლიდა იქაურობას და დაუღალავად თავს ევლებოდა თვითეულ ფურცელს.

* * *

მხოლოდ კაბინეტში როდი მუშაობდა გალაკტიონი. ის წერდა თავისი ბინის ყველა ოთახში, ყველა მაგიდასთან.

მუშაბანდში ერთი მაგიდა ედგა, ძველისძველი, თითება დაჰკრავდა მასზე გადაკრულ მუშაობას, იტყოდა: რამდენი კარგი ლექსი დამიწერია ამ საცოდავ მაგიდაზე, ძალიან მიყვარსო.

პოეტის საწოლის თავზე მსხვილი ძაფით ფანქარი იყო მიბმული, იქვე სკამზე რამდენიმე ბლოკნოტი ეგდო. გალაკტიონი მწოლიარეც წერდა.

ქუჩაში, ბაღში, მატარებლის ვაგონში, ვაგზალში, ტყეში თუ ველზე პოეტს მუდამ თან ჰქონდა ბლოკნოტი და ფანქარი და ყველგან წერდა.

თუ დიდ თემაზე აპირებდა მუშაობას, წინა დღეებში აღელდებოდა, ერთ ადგილას ვერ ისვენებდა, შფოთავდა. მიუხედავად იმისა, რომ თბილისის თემაზე გალაკტიონს ბევრი ლექსი შეუქმნია, მაინც 1958 წელს 1500 წლის იუბილარი ქალაქისათვის უნდოდა ორიგინალური ნაწარმოები მიეძღვნა.

და მეტად თავისებურად ემზადებოდა ახალი ლექსის (თუ ლექსების ციკლის) დასაწერად. დაიჭირავებდა ავტოს და საათობით სეირნობდა ქალაქის ძველ ნაწილში. ალაგ-ალაგ აჩერებდა მანქანას და აკვირდებოდა ქუჩებს, შენობებს, ხედებს...

ზოგადად თუ იტყოდა, ამა და ამ თემაზე ვწერო, თორემ ნაწარმოების დასრულებამდე არავის წააკითხებდა ხელნაწერს.

ხშირად პოეტი „ისე უსვამდა ფანქარს“ ქალაქებზე და წერდა მხოლოდ რითმებს ან ხატავდა (საკმაოდ კარგად!). იმ წუთებში იგი ფიქრობდა და თან ღიღინებდა ან ესაუბრებოდა ვინმეს... ესეც ერთგვარი სამზადისი იყო ახალი ლექსის შესაქმნელად.

* * *

წერა-კითხვაში გალაკტიონი სათვალეს ხმარობდა. შორ მანძილზე კი უსათვალოდაც კარგად ხედავდა. პაპიროსს, საერთოდ, ეწეოდა („ყაზბეგს“, „საკურორტოს“, ან „რეკორდს“), მაგრამ ხანდახან ორ-სამ კვირაობით შესვენებას გამოაცხადებდა და თამბაქოს არ გაიკარებდა. პოეტს ძალიან მახვილი სმენა ჰქონდა, ჩურჩულით ნათქვამიც კი მკაფიოდ ესმოდა.

დიდ შთაბეჭდილებას ახდენდა გალაკტიონის ხელები. ბეკრი მუსიკოსი ინატრებდა მისებრ ჩამოქნილ თითებს. ვაჟაკური ძალა და ძველქართული ფრესკის ჰეროვნება იყო შეზავებული მისი ხელის მტევანში. იმ დროგამოშვებით მთრთოლვარე თითებში კი იმდენი გრძნობა-განცდა მეტყველებდა, რომ დიდი სიმფონიის ჟღერად იკმარებდა... და ვინც ერთხელ მაინც მისალმებია ხელის ჩამორთმევით, არასოდეს დაავიწყდება გალაკტიონის ოდნავ დაძარღვული, მშრალი და თბილი ხელი.

გალაკტიონი საშუალოზე მაღალი ტანის კაცი იყო. წარმოსადეგი შესახედაობა ჰქონდა და ყველგან ყურადღებას იპყრობდა თავისი ორიგინალური სიარულითა და მიხრა-მოხრით. მიუხედავად ხანდაზმულობისა, საკმაოდ კარგად შენა-

ხულ მუქ წაბლისფერ თმაში მხოლოდ აქა-იქ ჰქონდა გამორეული ჰაღარა. ოდნავ უღალი, ლაწვისთავებთან ჰაღარანარევი წვერი მოხდენილად ფარავდა მის სახეზე ნაყვავილარის ნაშთებს და პატრიარქალურ შეხედულებას აძლევდა პოეტს. წვერ-ულვაში პირველად მაშინ მოუშვა, როდესაც ძმა პროკლე გარდაეცვალა (1947 წ.) და მას შემდეგ სულ ასე ატარებდა ფართო წვერსა და თამბაქოსაგან შეწითლებულ დაფანჩულ ულვაშებს.

ღრმა, შუქიანი და ბრძნული თვალები აგვირგვინებდა გალაკტიონის ღვთაებრივ სახეს, მოხდენილ წარბ-წამწამთა ჩეროდან გამომზიარალი მუქი თაფლისფერი თვალები!.. თუ თვალები სათაურია იმ წიგნისა, რომელსაც ჰქვია ადაშიანი, ეს კანონი განსაკუთრებულად აყო შეზავებული გალაკტიონის პიროვნებაში. სიხარულის წუთებში მისი თვალები ისე აენთებოდნენ, როგორც მოგიზგიზე კოცონი და ცისარტყელად მოეფინებოდნენ სახეს, ხოლო სევდიანობისას მიილულებოდნენ. მიინისლებოდნენ, და ისეთი ზღვა-კაეშანი დაისადგურებდა მათში, რომ მზერას ვერავინ გაუჩერებდა. ხოლო აღმფოთებისა ან გაჯავრებისას ასპარეზზე გასული რაინდის გულისწყრომა იფეთქებდა მათში და გამარჯვებას ჩვეული სარდლის მნუსხველი ძალა.

თუ ჩუმად კითხულობდა, ტუჩებს ოდნავ ამოძრავებდა. უყვარდა დაბალი ხმით კითხვა. ყოველი ათი-თხუთმეტი სტრიქონის შემდეგ შეჩერდებოდა, ჩაფიქრდებოდა და ისევ განაგრძობდა. საოცარი სიღინჯით და დაკვირვებით იცოდა წიგნზე მუშაობა.

ღეკლამაციას იშვიათად მიმართავდა. თავისი ლექსებიდან

ძალიან უყვარდა: „მთაწმიდის მთვარე“, „ლურჯა ცხენები“, „მერი“, „მშობლიურო ჩემო მიწავ“, „ქებათა ქება ნიკორწმიდას“... ამ ლექსებს ორიგინალურად კითხულობდა და მსმენელს ღრმად აგრძნობინებდა.

რბილი, ხავერდოვანი და გულში ჩამწვდომი ხმა ჰქონდა. მისი ორიგინალური სინტაქსით მეტყველება მკაფიოდ რჩებოდა მეხსიერებაში. რამდენჯერ გვიფიქრია მე და ჩემს მეგობრებს, მაგნიტოფონის ფირზე ჩაგვეწერა მისი ხმა, მაგრამ ეს ოცნება განუხორციელებელი დარჩა.

საერთოდ, გალაკტიონი არ იყო ცნობილი პოეტ-დეკლამატორად, მაგრამ მუდამ თავის მოვალეობად მიაჩნდა აუდიტორიებში მასებთან გამოსვლა, ხალხის წინაშე მხატვრული სიტყვის ილუსტრირება, ამ მხრივ იგი ქართული პოეზიის დაუღალავი ტრიბუნი იყო.

* * *

თუ სცენაზე ან ტრიბუნაზე არ იდგა, გალაკტიონს არ უყვარდა თავისი ლექსებიდან ამოკრეფილი ფრაზების წამოძახება. მახლობლებთან არასოდეს „დაიღვრებოდა ლექსად“, შაირ-ლექსაობა, საერთოდ, არ ახასიათებდა. სხვათა ლექსებს კი ხშირად მოიმარჯვებდა მაგალითისათვის. | ხშირად გამიგონია მისგან ხალისიანად თქმული ირ. ევდოშვილის ცნობილი ლექსის დასაწყისი:

მეგობრებო, წინ, წინ გასწით,
ნუ შედრკება თქვენი გული!

ამ ლექსის ხასიათი, ძმობისა და წინსვლის ჰანგი, მაღალი იდეალებისათვის თავდადებული ბრძოლა ხომ მთლიანად ემ-

თხვეოდა გალაკტიონის სიჭაბუკის წლებში რევოლუციურად მობობოქრე ხალხის სულს და პოეტის მაშინდელ გუნებ-განწყობილებას.

განსაკუთრებით უყვარდა აგრეთვე რუსთაველის აფორიზმების თქმა და ძალიან ბევრიც ახსოვდა ზეპირად.

XX საუკუნის რუსული პოეზიიდანაც უამრავი ლექსი იცოდა ზეპირად. კარგად ახსოვდა: კ. ბალმონტი, ა. ბელი, ა. ბლოკი, ი. ანენსკი, ნ. გუმილევი, ვ. მაიაკოვსკი, ნ. ასეევი, გ. შენგელი, ს. ესენინი და სხვ.

რაღა თქმა უნდა, XIX საუკუნისა და ძველ კლასიკურ მსოფლიო პოეზიას ძალიან კარგად იცნობდა და ზეპირად ახსოვდა უთვალავი ლექსი.

რუსული ენა გალაკტიონმა ბრწყინვალედ იცოდა და როდესაც მსჯელობა ეხებოდა ლექსის თეორიას, რომელსაც იგი შესანიშნავად ფლობდა, უმეტესად რუსულად საუბრობდა (თუ უშუალოდ ქართულ ლექსზე არ იყო ლაპარაკი!). თუ თანამოსაუბრე რუსულში მოიკოჭლებდა, ბოდიშივით ეტყოდა: „რა ვქნა, რუსულ შკოლაში ვსწავლობდი და ასე მემარჯვება!“

გალაკტიონმა საკმაოდ კარგად იცოდა ფრანგული ენა. შესანიშნავად იცნობდა საფრანგეთის ისტორიას და ხშირდაც უამბია ჩემთვის საფრანგეთის რევოლუციისა და ლუდოვიკოების ცხოვრების შესახებ. ყოველთვის იცინოდა, როდესაც ვეტყოდი, ფენომენალური მეხსიერება გაქვთ, რომ იმ ლუდოვიკოების ნუმერაცია ასე გახსოვთ-მეთქი.

სცენიდან ან ვიწრო წრეში საუბრის დროს გალაკტიონი ლიტერატურული ქართულით მეტყველებდა. მოხდენილად და ზომიერად ხმარობდა ნარ-თანინი მრავლობითის ფორმას.

შინაურულ „საყველპურო“ საუბარში კი პოეტი არ პუ-
რისტობდა. თბილისურად მოუქცევდა სიტყვას, ხანაც იმე-
რულ დიალექტს მოიმარჯვებდა. ასეთ მომენტებში მის ხმას
განუმეორებელი იუმორი და ხშირად წინააღმდეგობებით
სავესე ფრაზები ახასიათებდა. აი, ეს გამოთქმანიც:

„მე, ბიძიკო, ერთი საწყალი პოეტი ვარ!“

„ზოგიერთი საწყალი პოეტი კი არ გეგონო!“

„ჯანმრთელობა არა მაქვს, თორემ“...

„რაცხა გრიპი დამეტაკა, თვარა ჩემისთანა ჯანმრთელი კაცი არ მინახავს!“

„გული არ გეიტეხო... მაი აფერია — სთქვა გურულმა“.

„ეს ოხერი, ყველამ კი არ უნდა წეროს ლექსი!“

„ლექსი ყველამ უნდა წეროს, ვისაც ეწერება!“

„ყველა პოეტი საპატიო კაცია — ერის განძია!“

* * *

— გალაკტიონი გეძებდათ!.. — ორჯერ შემოიარა... აუცი-
ლებლად დამირეკოსო, გთხოვათ, — გაბრწყინებული თვალე-
ბით მეუბნებოდნენ ჩემი თანამშრომლები რკინიგზელის სახლ-
ში*.

სასწრაფოდ გავემგზავრე.

ტროლეიბუსიდანვე დავინახე, გალაკტიონი თავისი სახლის
ფანჯრიდან გასცქეროდა ქუჩას.

პოეტის ბინაში ქაოსი სუფევდა. დიქტის დიდი ფურცლე-
ბი, სქელი ქაღალდები, სასურათო ჩარჩოები, სტენდები და
სხვა საგამოფენო ექსპონატების მოსაწყობი მასალა ერთმა-
ნეთში იყო არეული და აფორიაქებული. მათი მფლობელიც

* 1955 წ. სექტემბერი.

აფორიაქებულიყო — სოკის მატარებლით აპირებდა გამგზავრებას ზოხუმში და თუმცა მხნედ და მხიარულად გამოიცილებოდა, მაინც ღელავდა, რადგან ოჯახი წყნეთში ჰყავდა და ყველაფრის თადარიგს ველარ იჭერდა.

— როგორ გამეზარდა შენი მოსვლა. ბევრი რამ უნდა დაგავალო, — მითხრა და სკამი შემომთავაზა, მაგრამ მალე ისევ აღელდა, აბობოქრდა. მივხვდი, მოთმინება არ ჰყოფნიდა — ადრე უყვარდა სადგურზე გასვლა, როცა სადმე მიემგზავრებოდა.

— გზადაგზა ვილაპარაკოთ, — ვუთხარი.

ხუთი წუთის შემდეგ ტროლეიბუსში ვისხედით და ხმადაბლა ვსაუბრობდით. ყველა თანამგზავრი სიყვარულით და მოწიწებით შესცქეროდა გალაკტიონს. მეზადებოდა სურვილი, მეთქვა:

— მოდით, დაელაპარაკეთ, ეს კაცი ხომ უბრალოებაშიც ისეთივე დიადია, როგორც — პოეზიაში!

სადგურის ბაქანზე რომ გავედით, მორიგე ქალს ძველი ნაცნობივით მხარზე ხელი დაჰკრა და შეესიტყვა:

— Ну, как живёте, припеваючи? А? — მერე მითხრა, ანეთი შეკითხვა ძალიან მიყვარსო, ისევ ქალს მიუბრუნდა და მატარებლის გასვლის დრო ჰკითხა. შემდეგ კი მეორე რკინიგზელ ქალსაც გაუმეორა იგივე შეკითხვა და მხიარული საუბარი დაუბა.

სადგურის მოსაცდელ დარბაზში ვიცდიდით.

— ეჰ, ეს ათი წელიწადია, მოუსვენრობას ვგრძნობ, ამბობდა წყნარად გალაკტიონი, — მყუდროდ სამუშაო პირობები არა მაქვს... მართალია, ნინა ხელს მიწყობს, მაგრამ

როცა ახალგაზრდა ვიყავი და დედა ცოცხალი მყავდა, მეტი შემოქმედებითი სიხარული და აღტაცება მქონდა. როცა ვმეცადინეობდი, დედაჩემი ფეხაკრეფით სიარულს აიძულებდა ყველას და სტუმრებს იმ ოთახში, სადაც ვწერდი, არ უშვებდა...

ცხადია, პოეტის ამ სიტყვებში მთავარი იყო: „როცა ახალგაზრდა ვიყავი“, თუმცა ზოგიერთივით არ სჩვეოდა თავის ხანდაზმულობაზე წუწუნი, რადგან, საერთოდ, არ იყო მოწუწუნე.

თვალწინ წარმომიდგა გალაკტიონის დედის მაკრინე ადენიშვილის სურათი, რომელიც წყრთის სიმალლის შავ ხის ჩარჩოში ჩასმული იდგა პოეტის კაბინეტში კარადაზე. ძაძებით შემოსილი მანდილოსნის სახე ჭკვიანი და ნალვლიანი თვალებით იმზირებოდა. გარდასულ ჟამთა დიდი ზრუნვისა და ქვრივ-ობლობის მძიმე ბეჭდად გაწოლილიყვნენ უბღბღზე მკრთალი ნაოჭები.

— თბილისში ჩვენი ბინა არ არის სამუშაოდ მარჯვე, — წუხდა პოეტი, — მასალები ვერ დამიგუფებია წესიერად. ხომ ნახე, რა არეულობა იყო დღეს. რუსეთიდან ჩემი მეგობარი მწერლები ჩამოდიან... სახლში ვერ მიმიპატიჟია, მერიდება...

— ახალ ბინაზე იზრუნეთ, თქვენთვის არ იქნება ძნელი...

— დრო და ხლავოროთი უნდა... ისე კი მაინც ვფიქრობ...

მატარებელში მგზავრების ჩასხდომა დაიწყო. გალაკტიონს რბილ ვაგონში აყვავი, კარგახანს. მესაუბრა, რამდენიმე დავალება მომცა და მითხრა:

— ახლა გული მშვიდად მაქვს... დაბრუნდი შინ. აბა, გამარჯვებით გნახე!

გადავკოცნე და კეთილი მგზავრობა ვუსურვე.

* * *

ვახუშტი ბაგრატიონის ქუჩაზე ცხოვრობდა ძველი საზოგადო მოღვაწისა და მწიგნობრის შვილი მბექდავი-მემანქანე. ნინო მელიტონის ასული კელენჯერიძე. ეს იყო განათლებული მანდილოსანი, რომელიც მშვენივრად ბეჭდავდა ქართულად კალაქტიონის ხელნაწერებს თუ რუსულად — პწკარედებს. პოეტი კარგად იცნობდა ნინოს ოჯახს და ნინოს გადაბეჭდილი ტექსტები მოსწონდა.

კარგად უბეჭდავდა აგრეთვე ქართულ ნაწერებს მარინე ტოგონიძე (ყურნალ „საბჭოთა ხელოვნების“ რედაქციაში), რომელთანაც სასწრაფოდ გადასაბეჭდ მასალას გამატანდა ხოლმე. იცოდა, რომ ახალგაზრდა ქალი ყველა სამუშაოს გადასდებდა და პირველ რიგში გალაქტიონის ლექსებს მოუფლიდა.

— ახლა ჩავუსხდეთ და ჩავასწოროთ!.. მერე ნიკო შველიძეს ჩავაბაროთ, — მეტყოდა პოეტი, როდესაც გადაბეჭდილ „ხელნაწერს“ მიუტანდი შინ და ჩავუსხდებოდი ხოლმე... გადიოდა დღეები, საღამოები და ერთ მშვენიერ დღეს სახელმწიფო გამომცემლობაში შევივლიდი. ნიკო შველიძე მუდამ გულთბილად მიიღებდა გალაქტიონს, დასაბეჭდად გამზადებულ მის წიგნს ჩაიბარებდა, კარადაში დააბინავებდა და ღიმილით ეტყოდა: „პატივცემულო გალაქტიონ, არ მოვაკლებ ცდას, რომ თქვენი წიგნი დროზე გამოვიდეს“.

— ნიკოს ტიპიური ქართული სახე აქვს, აბა, დააკვირ-
დი!.. საქმითაც კარგი ქართველია, ღირსეული და საიმედო
კაცია — მეტყოდა, ქუჩაზე რომ გამოვიდოდით.

✓ კაცის შექებაში გალაკტიონი ძუნწი იყო. იშვიათად მოე-
წონებოდა ვინმე, უფრო იშვიათად დაუახლოვდებოდა. პრესის
მოდერნიზაციის ახლო დამოკიდებულებაში იყო აგრეთვე „ზა-
რია ვოსტოკას“ გამომცემლობის მუშაკ მარკ ზლატკინთან.
პატივისცემით ახსენებდა და მეგობრობდა. ამავე გამომცემ-
ლობაში რუსულ პუბლიცისტურ დაკავშირებით რამდენიმეჯერ
მომიხდა შეხვედრა და საუბარი ჩვენს ცნობილ კრიტიკოს ბე-
სარიონ ჟღენტთან. გალაკტიონი მისი სიჭაბუკის მეგობარი
იყო და ბესარიონი განსაკუთრებული ყურადღებით ეკიდებო-
და პოეტის ლექსების რუსულად გამოცემას.

საქართველოს მწერლების კავშირში გალაკტიონს, რა თქმა
უნდა, ჰყავდა მეგობრები. მათგან შედარებით ახლოს გაცნო-
ბა მომიხდა ლიტერატურულ კონსულტანტ თამარ ანდლუ-
ლაძესთან. მასთან მიმავალს პოეტი გულითად მოკითხვას და-
მაბარებდა და ყოველთვის მოწინებით ახსენებდა, როგორც
საქმის მცოდნესა და პოეზიის პატრიოტ მანდილოსანს.

ახალგაზრდებიდან გალაკტიონთან ახლო დამოკიდებულე-
ბაში იყვნენ ფ. ნიშნიანიძე, ვ. გურგენიძე და რამდენიმე პოე-
ტი და მწერალი. ნიშნიანიძის ქალი ბშირად გამოდიოდა გა-
ლაკტიონის შეხვედრა-საღამოებზე და კითხულობდა მოხსენე-
ბას თემაზე — „ცნობილი ადამიანები გ. ტაბიძის შესახებ“,
ხოლო ვახტანგ გურგენიძე საქართველოს რამდენიმე კუთხეში
მოგზაურობისას თან ახლდა პოეტს და უამრავი ფოტოსურა-
თი გადაუღო.

გალაკტიონის თავისებურ ხასიათს შეიძლება მივაწეროთ ის გარემოება, რომ ზოგ რედაქციაში არასოდეს შეუვლია, ბევრ რედაქტორს არც იცნობდა პირადად. მაგრამ რედაქტორებს შორის მეგობრებიც ჰყავდა. მათთან უბრალო და გულახლდილი იყო, ყველაფერზე საუბრობდა და რჩევასაც ეკითხებოდა.

შორეული მეგობრებიც ჰყავდა ჩვენს გალაკტიონს. მახსოვს, 1957 წლის ზაფხულში ავტოთი მოქროლდა ჩვენსას და სწრაფად ამოვიდა კიბეზე. მთელ ოჯახს გვახარა, ჩეხოსლოვაკიის რესპუბლიკის პრეზიდენტის ანტონინ ზაპოტოცკის (აწ განსვენებულის) წერილი გადმომცესო ჩვენმა ტურისტებმა. ეს იყო საპასუხო წერილი გალაკტიონის ბარათზე, რომელიც თან ახლდა პრეზიდენტისათვის გაგზავნილ ლექსების კრებულს. გალაკტიონმა გვიამბო, თუ როგორ გაიცნეს ერთმანეთი მან და ა. ზაპოტოცკიმ მოსკოვში 1927 წ. კომინტერნის მეექვსე კონგრესის დღეებში, როგორ დამეგობრდნენ და ერთად იმოგზაურეს საბჭოთა კავშირის მნიშვნელოვან რაიონებში, ხოლო შემდეგ: პრეზიდენტი მეუღლითურთ ჩამოვიდა საქართველოში და პოეტის თანხლებით დაათვალიერა თბილისის მიდამოები.

* * *

სიჭაბუკის წლების მეგობრებიდან გალაკტიონს აგონდებოდა ხოლმე თავისი პირველი კრებულის რედაქტორი ტუტკუ გვარამია, რომელმაც 1914 წ., ქალაქ ქუთაისში, გამოსცა ეს წიგნი. გალაკტიონის გადმოცემით, დასაბეჭდად გამზადებული ხელნაწერები მოპარეს პოეტს და ორ-სამ დღეში ჩავუჯექი და ახალი ვარიანტებით წარვადგინეო. ტ. გვარამიას

მოწიწებით ახსენებდა, როგორც მისი გზის პირველ გამკვლევსა და დიდ მოამაგეს.

პოეტის მოგონებათა არეს არ სცილდებოდა ქუჩუ ქავთარაძისა და თედო სახოკიას სახეები. ეს უკანასკნელი, უკვე ღრმად მოხუცებული მწერალი, გალაკტიონმა პოეტ იასამანის — მიხეილ კინწურაშვილის დაკრძალვისა¹ გამაცნო.

მოდმე ერების პოეზიას გალაკტიონი მუდამ თვალს ადევნებდა. სომეხი პოეტებიდან საამაყო მეგობრად მიაჩნდა ავეტიკ ისააკიანი.

ს. ესენინი, მ. გორკი, ბ. პასტერნაკი — აი, გალაკტიონის რუსი მეგობრების არასრული სია. აქვე უნდა ვახსენოთ ნ. ტიხონოვი და ი. ერენბურგი, რომლებთანაც პოეტს ხშირი შეხვედრები და ამხანაგური მიმოწერა ჰქონდა.

ამგვარი იყო მთაწმიდაზე უმომლამება

ერთ დილას გალაკტიონმა თავისი ახალი პოემა მოიტანა ჩვენსას¹. ნაწყვეტები წავიკითხეთ. გალაკტიონი მხნედ გრძნობდა თავს და კარგახნის საუბრის შემდეგ მითხრა:

— წყნეთში წავიდეთ, ჩემს აგარაკზე.

რამდენიმე წუთში მზად ვიყავი.

ჩვენი სახლის წინ გალაკტიონის „პობედაში“ ჩავსხედით. გზაში უბის წიგნაკი ამოიღო, მაჩვენა თავისი ახალი პოემის სტროფების სტრუქტურა და ამიხსნა წინამდებარე ჩვენი სამუშაო.

წყნეთამდე ვისაუბრეთ მარჯანიშვილის თეატრზე, გავიხ-

¹ 1955 წ. 20 მარტს (კვირას).

სენეთ მცხეთის არქეოლოგიური გათხრები... შემდეგ სიმღერაც შემოვძახეთ.

გზადაგზა გალაკტიონი მიხსნის:

— ეს ჩვენი გოგლა ლეონიძის სახლია, ეს... — ჩამოთვალა რამდენიმე, — აქ შარშან არ იყო სახლები, ხედავ ახლა რამდენია.

მანქანა წყნეთის ორღობეებს მიჰყვება.

— კარგი ჰაერია!

— ჩემს აგარაკზე უკეთესია! — თქვა ღიმილით. — მე ერთი უბრალო ქოხი მაქვს აქ, ხისაა, მაგრამ კარგ ადგილზე დგას.

აი, მივედით კიდეც! პოეტის „უბრალო ქოხი“ ხის ორსართულიანი შენობაა.

სახლის გარშემო ბაღია. ბილიკებზე ფხვიერი აგური მოუბნევიათ.

— მომავალ კვირასა ე მანდა ვენახს ჩავყრით, — მიხსნის იქაური მოხუცი ქალი, რომელიც პოეტის სახლ-კარს უვლის და მაჩვენებს დამუშავებულ ფერდობს.

კუთხეში გამომწვარი ნაკელი ყრია, სახლის ყურეში — ჩალა. იქვე აგურით ნაგები გარაჟია. წინ ონკანით წყაროს წყალი მოდის.

სახლის უკან იწყება შერეული ტყით დაფარული მთები, გამორჩევა უძო.

ბილიკს შევეყვით ტყეში. დინჯად შევეუდექით აღმართს.

— უძოზე მინდოდა ერთხელ ასვლა. შუამდე მივედი, დავიბრუნე და დავებრუნდი, — მოწყენით მითხრა გალაკტიონმა.

— ტალახია, თორემ დღეს ავიდოდით, — ვუპასუხე.

უძო! მთა, რომელზეც აღიოდნენ უწინ უძეო მანდილოს-
ნები და სალოცავად მიჩნეულ ერთ ხეზე სტოვებდნენ შესა-
წირავს იმედით, შვილი შეგვეძინებაო:

ამ ოდესმე მხიარული
გზით უყვარდათ სიარული;
აწ გზა მიტოვებულია,
როგორც ძველი სიყვარული.
მაგრამ ყველაფერი ძველი
ამოა და სასურველი:
ძველი პური, ძველი ღვინო,
ძველი სტუმარ-მასპინძელი.

(ტ. VIII, გვ. 155)

უძო! მისი მწვერვალიდან დღეს სულ სხვა სურათი იშლე-
ბა: საქართველოს ამღერებელი მიდამოები:

სამგორის მთას სულ სხვაგვარი
ამოძრავებს დრო და ხანა,
მიჰქრის ავტო, გავიარეთ
აზეულა, ოქროყანა...
მივიჩქარი: მე მახარებს,
რომ ეს მთაა ასაღები
და დავცხრები, როცა ვიტყვი:
ხელთ მაქვს უძოს გასაღები.

(„უძო“, რჩეული, 1954 წ.)

მზიანი დღე იყო, მაგრამ ნაწვიმარი... წყნეთში კი ისეთი
ტალახი იცის, რომ გალაკტიონს აქ მუდამ ჰქონდა ჩექმები
და ნაბადი.

ისევ სახლში შევედით. პირველ სართულში ტახტზე ჰყრია გაზეთების დასტები და არქივის ნაწილი. დგას ჩალის მოძველებული საქანელა-სავარძელი, რკინის საწოლი, კიდევ ერთი ხაკისფერი სამხედრო საწოლი. ყველა ოთახს ფანჯარა აქვს.

— გასარემონტებელია! — მეუბნება მასპინძელი.

მეორე სართულიდან მოჩანს ვრცელი ჰორიზონტი: დედაქალაქის მიდამოები, თბილისის ზღვა, შორს კი — ლურჯად მოკამკამე კავკასიონი.

ამ სახლში იწერებოდა ლირიკული ლექსების კიდევ ერთი წიგნი (ტ. VIII). აქაურობაზე ითქვა:

ჩვენი იფნის ტყიდან ისმის
ხმაურობა უძოს ხევის,
გადმოსმის, გადაისმის
ხმა ზვირთების მიმორხევის.
რალაც ნაცნობ სიხარულს მგვრის,
უძოს ხევო, ეღერა შენი,
შინდისიდან ნიავი ჰქრის
ტყის ფოთლების ამაზრზენი.
მოსვენებას შესთხოვს ვისმე?
კი, მაგრამ ვის? ჰე, ვის? ჰე, ვის?
აივანზე ტყიდან ისმის
ხმაურობა უძოს ხევის.

— იცი, ძალიან მომეწყინება ხოლმე. ბოლო დროს მართოკა ველარ ვაქლები სამუშაოდ. ორნი უფრო ხალისიანად ვიმუშავებთ. საბეჭდი მანქანა გვაქვს. ერთ მბეჭდავ ქალს ავიყვან და ხან აქ ვიმეცადინოთ, ხან ქალაქში. — თქვა გალაკტიონმა.

— როგორც თქვენ გემარჯვებათ, ისე მოვაწყოთ.

— ჩემი ახალი პოემა სექტემბერში უნდა ჩავაბარო... დღე-ში ორი-სამი საათი რომ ვიმუშაოთ, საკმარისია, შემოქმედებითი მუშაობა რთულია და კაცს ღლის...

ჭიშკართან მდგარ მოძველებულ „პობედას“ მივაშურეთ. პოეტის შოფერმა, წყნეთელმა ბიჭმა, საჭესთან მოიკალათა და გვიცდიდა.

შარაგზიდან კიდევ შევავლე თვალი იქაურობას: უბრალო ეზო, უბრალო სახლი, პატრონიც იქაურობისა უბრალოდ ჩაცმული წვერმოშვებული კაცი, რომელსაც 10-15 წლის წინათ ნაყიდი პორტფელი ეკავა ხელთ. იგი ოხუნჯობს, ბავშვივით ხითხითებს და წუთით მავიწყდება, რომ ჩემ გვერდით დგას გენიოსი და... ასე გულუბრყვილოდ თავს იწონებს უბრალოებითა და ასაკოვნებით:

შემოდგომავე, მოდი, გელი, მომაწოდე შენი ხელი,
მიყვარს ყველაფერი სადა, მიყვარს ყველაფერი ძველი!

შემდეგ ისევ ნათლად ვგრძნობ, რომ ქართველი ერის დიდებას ვესაუბრები და ვფიქრობ, ყველა ის, რაც ზემოთ ჩამოვთვალე, ბაჭაღლო ოქროსიც რომ იყოს, ამ ადამიანის ღირსებას ვერაფერს შემატებდა.

ავტოში ჩავსხედით და გალაკტიონი ისევ მიხსნის:

— აქვე ჩემს ჭიშკართან ავტობუსი ჩერდება... აი, აქ, სამი ხე იყო. ახლა ერთი-ღა დარჩა, ამას ღვთისმორწმუნე მოხუცები უძოს ნიშს უწოდებენ. მოდიან ხოლმე, ლოცულობენ, ქეიფობენ... აქ მაია წყნეთელის სახელობის მოედანი უნდა მოვაწყოთ. გმირი ქალი იყო, ეკუთვნის ხომ?

...სხვა ქალი კერად ღვა ღღე-ღამითა,
ან მიუძლოდა მშრომელ მამითაღს
მშვიდობიანი დღის საშაია.
სხვა ისევე ჩნდა ლალ-მარგალიტად.
რა ძვირფასია სხვათ მაგალითად
შენი უკვდავი ხმალი, მათა!

(ტ. VIII)

ასე მთავრდება გალაკტიონის ერთი სონეტი, რომელშიც კვლავ გაცოცხლდა სახე ამხედრებული, ამორძალივით შეუპოვარი ქართველი ქალისა.

მანქანა გააჩერებინა. ჩამოვედით. მდინარე ვერეს ხევეს გადავხედეთ.

— აი, იქ ცხრა კუნძულია მდინარე ვერეზე. მოდი, ერთხელ დავიაროთ ეს მიდამოები. მერე შევყვეთ ვერეს აღმა და ვიაროთ სანამ დავიღლებით... ერთხელაც ბეთანიაში წავიდეთ. კიდევ სადაა კარგი ადგილები? — შეკითხება პოეტი.

— ვარძიაში.

— იქაც წავიდეთ! უსათუოდ წავიდეთ როდისმე. წავიყვანოთ მამაშენი და ერთიც ფოტოაპარატიანი ვინმე.

ისევ მივქროდით დაღმართზე.

* * *

კვლავაც ხშირად ვყოფილვარ წყნეთში.

გალაკტიონის ეზოში თანდათან გაჩნდა გაზონები, ხეხილი, პატარა ვენახი... ერთ ადგილას კვარცხლბეკზე იდგა პუშკინის თეთრი ბიუსტი.

სახლიც დასრულდა და გალამაზდა.

შესვენების დროს აივნიდან გავცქეროდით მომხიბლავ სანახებს, ვოცნებობდით, „როცა დრო გვექნება“, ერთად გვენახა ახლომანლო მდებარე ყველა ისტორიული ძეგლი, პირველ

ყოვლისა — ბეთანიის ტაძარი, რომლის მიდამოებს პოეტმა ასეთი გზნებით უმღერა:

წამყე ბეთანიისაკენ! იქ სადღაცა ახლო-მახლო
იყო ორბელიანების და ირაკლის სამოსახლო.
გზაზე, სადაც ცაცხვებია და მუხნარი უმეტესი,
არსად ქვეყნად არ მინახავს ადგილები უკეთესი
ადგილები ასე მშვენი ვარდისაგან, იისაგან...
სანადირო ადგილები... წამყე ბეთანიისაკენ
მოდ, სადმე უდაბური ვპოვოთ კუთხე ქედმომადლო,
გადმოვხედოთ მალლით თბილისს — მე აქ უნდა დავესახლო!
წამყე ბეთანიისაკენ! იქ, სადღაცა ახლო-მახლო
იყო ორბელიანების და ირაკლის სამოსახლო.
(„წამყე ბეთანიისაკენ“).

საღამოხანს! შინიდან გავდიოდ. კარის ზღურბლზე გა-
ლაქტიონი გადამეხვია:

— გოგი, ქუჩაზე ავტომობილში ერთი საწყყალი კაცი ზის.
ჩემი მეგობარია. თუ ძმა ხარ, ამოიყვანე...

კაცი, რომელიც შინ ამომყვა, იყო „ქართველი მხატვარი.
აწ განსვენებული თედორე ჩუღეცკი, რომელმაც თავისი შე-
სანიშნავი ტილოების მეტი წილი სვანეთში მოგზაურობის შე-
დეგად შექმნა“², მამამისი მეფის დროს ლეჩხუმის მაზრის ექი-
მი ყოფილა. ფედიას განათლება პეტერბურგში მიუღია, სამ-
ხატვრო აკადემია დაუმთავრებია.

1 1953 წ. 15 იანვარს.

2 იხ. ქ. ქიქოძე. „უმაზე პირველი ქართველ ალპინისტების ასვლის გამო“,
ეურ. „საბჭოთა ხელოვნება“, 1960 წ., № 2, გვ. 79.

გალაკტიონმა გააცნო ჩემს მშობლებს ახლადმოსული და სიცილით აგვიხსნა თავისი მდგომარეობა:

— მედიკომბინატში¹ ვიწექი... სეირნობა მომინდა და ექიმებს გამოვეპარე. შინ არ მინდა მისვლა ლამემდე, თორემ ჩვენებს ეწყინებათ, მკურნალობა რატომ შეწყვიტეო... ეს ჩემი მეგობარი ფედია შემხვდა და თქვენკენ წამოვედი.

დედაჩემი სუფრის გაწყობას შეუდგა. გალაკტიონმა განაცხადა, ღვინოს აღარ ვსვამო, მაგრამ თითო ჭიქა შამპანურზე დაგვეთანხმა.

სუფრასთან სიმხიარულის მეთაური და თამადა გალაკტიონი იყო. შუშხუნა ღვინოს ოდნავ მოსვამდა, ლაღობდა და საკმაოდ კარგად მღეროდა...

— მე სულ ორიოდ მეგობარი მყავს.... შენ ხომ იცი, ბენო. აქ ისე მოვდივარ, როგორც ჩემს ოჯახში. სიხარულით ვარ მთვრალი, თორემ გულის ტკივილი მაწუხებს და ღვინოს ვერ ვსვამ. ვიმღეროთ, გოგი, ფედია, ვიმღეროთ! მრავალჯამიერ!.. — და გალაკტიონმა „საეკლესიო მრავალჯამიერი“ შემოსძახა.

ხელოვნებაზე ჩამოვარდა ლაპარაკი, ჩუდეცკიმ, ცოტა არ იყოს, მკაცრად გააკრიტიკა ლადო გუდიაშვილის ნახატები.

მე შევეკამათე.

გალაკტიონი მომემხრო. მამაჩემმა კი ჩუდეცკის ზოგი აზრი გაიზიარა და გაჩაღდა დისკუსია...

— გოგი, ერთი ის ლექსი წამიკითხე, „განჭვრეტა ოცდაათი წლის“, — მითხრა გალაკტიონმა. მაშინვე მოვნახე ტექსტი და დავიწყე კითხვა.

¹ სამკურნალო კომბინატს ეძახდა ასე.

როდესაც რვეულიდან ვკითხულობდი უკანასკნელ სტრიქონებს:

როგორც სპილენძის საყვირის ხმა, გაფრინდნენ დღენი.
ეს მოწოდება აერთებდა მთელ ქვეყნის ხალხებს,
ქუხდა სიმართლე და მსოფლიო უსმენდა ლენინს,
შტურმით იღებდნენ მშრომელები ზამთრის სასახლეს,
ოცდაათი წლის დიდებულთა მანძილთ განჭვრეტით
ბევრი შევქმენი ლექსი ლალი და სასიძლერო,
ყველაში ისმის მძლავრ საბჭოთა სამშობლოს ხმები,
შენი ქუხილი და გუგუნი, მძლე ოქტომბერო!

გალაკტიონი მხნედ გაიმართა ბეჭეებში, შესძახა:

— ფედია, გახსოვს, იმ დროს ხელით დავყავდი ხალხს?!
ჰა, ხომ გახსოვს?

„ოზურ-გე-თი და მერია!“ — წამოიწყო გალაკტიონმა...

კედლიდან გიტარა ჩამოიღო. თვითონ არ უკრავდა. რალაც ვიმღერეთ რუსულად. მგონი, «Я вас любил...»

— მიხარია აქ ყოფნა, პედაგოგები რაინდულ საქმეს ემსახურებით და როდესაც თქვენთან ვარ, მაგონდება ჩემი სიჭაბუკე, 1910-იანი წლები. იმერეთში, ერთ სოფლის სკოლაში, მასწავლებლად ვმუშაობდი რამდენიმე წელს, ჩემი ძმაც, საწყალი პროკლე¹, პედაგოგი იყო, მამაჩემიც... — გვიამბობს გალაკტიონი.

— შენ რეჟისორიც იყავი, ხომ, გალაკტიონ? — ეკითხება ფედია.

¹ პროკლე (აბესალომი) ტაბიძე საქ. სსრ დამსახურებული მასწავლებელი, ქართულ ენასა და ლიტერატურას ასწავლიდა თბილისის რეინიგზის № 7 საშ. სკოლაში. მან დააახლოვა ერთმანეთს გალაკტიონი და მამაჩემი.

— მართალს ამბობ! — შეესიტყვა გალაკტიონი — 1917 წელს, პეტერბურგში ყოფნისას, სარეჟისორო გამოცდები ჩავაბარე. მახსოვს, სადიპლომო შრომად მქონდა აღ. ოსტროვსკის პიესა „მეც“. „ხუთზე“ შემეფასეს. ოვაციები გამიმართეს. ასე რომ... თუ პოეტობას ამიკრძალავენ... რეჟისორი გავხდები... ვათამაშებ არტისტებს და ვიქნები რეჟისორი... — გულუბრყვილოდ ჩაიხიბითა, დაფანჩულ წვერზე ხელი ჩამოისვა და მომმართა:

— გოგი, ბიძიკო, ჩემი იუბილე იქნება მალე. სადიპლომონაშრომზე გამახსენდა, შენი სადიპლომო ხომ ჩემი პოეზიის შესახებ არის. თუ სიტყვად¹ გადააკეთებ ზოგ ადგილს და სცენიდან წაიკითხავ, კარგი იქნება. ამას გარდა, ჩემი შემოქმედების გამოფენის მოწყობა უნდათ. უნდა დამეხმარო მასალების დაჯგუფებაში.

— მეც დაგეხმარებით, — ჩაერია მამაჩემი, შემდეგ გამომატანინა გალაკტიონის წიგნი, რომ წამეკითხა ზოგი ლექსი.

— აჰა, არა, ბენო, შენი ჭირიმე... რად გინდა ჩემი ლექსების კითხვა?.. აჰ, არა, მაგას ჯობია, ვიმღეროთ, კარგი?

მოხვეის ქალო თინაო,
ჩემთან წამოდი შინაო...

— დაიწყო პოეტმა სიტყვების თამაშით...
პაპიროსი მივაწოდე, არ გამომართვა.

¹ წაეკითხე 1957 წ. 25 მაისს თბილისის საფინანსო ტექნიკუმიში.

— წავიდეთ, ავტოთი ვისეირნოთ ქალაქში! — გვთხოვა გალაკტიონმა, როდესაც სუფრიდან ავიშალეთ.

მამაჩემმა სამუშაო მოიმიზეზა. მე და ჩუღეცკი წავყევით. ქუჩაზე გალაკტიონმა ჩაიღიღინა, მე და მხატვარს ჩაგვაველო ხელები მკლავებში და... გავისეირნეთ. ავტოს ძებნაში კარგა ხანს ვისაუბრეთ და ვიარეთ ღამეში ჩაძირულ ქუჩებში. საიდანღაც ტლანქი მუსიკა და თბილისური საღალღობო სიმღერა მოისმა. გალაკტიონმა სიცილით გვთხოვა, „ლათაიები“ მოვისმინოთო და... სასაუზმეში შეგვიყვანა.

კაბინეტში მოგვათავსეს. ნაცნობი (და ვინ არ იცნობდა გალაკტიონს!) მომტანი, იერით ტიპიური ქართველი, დათიკო ლაშხი დატრიალდა, „თავი მოიქაჩლა“, შამპანური მოგვართვა და შამფურებიდან მწვადები ჩამოხსნა.

— ისევ ჩვენსას გაგვეგრძელებინა, რაღა აქ მოვედით? — ვუსაყვედურე გალაკტიონს.

— ხანდახან ასეთ ადგილსაც უნდა ეწვიოს კაცი, — გამიცინა მან, — მოვისმინოთ ასეთი მუსიკაც: ხომ ხედავ, რა დღეშია ეს ჩვენი მედოლე. ხო-ხო-ხო, რას მღერის! გადასარევი პირდაპირ! არ მოგწონს?

თამადა დამარქვეს და დოლ-გარმონის ჭყვილში დავიწყეთ საუბარი... გალაკტიონი ისევ ეთამაშებოდა სასმისს. მიატანდა ტუჩებთან, ცოტას მოსვამდა.

მხატვარი თანდათან ბრუვდებოდა. უცბად გამოფხიზლდა და ორიოდ სიტყვით ახსენა მაიაკოვსკის შემოქმედება. გალაკტიონი შეედავა.

— რა გწყინს, შე კაცო? გეუბნები, შენ მაიაკოვსკის ოდენა პოეტი ხარ და შენი პოეზია ძალიან ჰგავს იმის ლექსებს-კეთქი. შენ კი ამაყობ და ყოყოჩობ! — უტევედა ფეღია.

— შენ რა გესმის, ლენჩი ხარ! — გაგულისდა პოეტი, ღონივრად დაჰკრა მუშტი მაგიდას და ამაყად განაგრძო, — მე ქართველი კლასიკოსების ტრადიციებს ვაგრძელებ. მაიაკოვსკიმ კი რუსული ლიტერატურის ტრადიციები უარყო. მე ვამბობ, რომ ის დიდი პოეტია, მაგრამ ჩემი და მისი შემოქმედება სულ სხვადასხვაა.

ისევ შეუტიეს ერთმანეთს და თუმცა ორივენი მომმართავდნენ ხოლმე თავთავიანთი აზრის დასტურისათვის, ნეიტრალიტეტს ვიცავდი, რადგან მაიაკოვსკიზე ჩემი შეხედულების გამოთქმა კიდევ უფრო გაართულებდა პაექრობას. გარდა ამისა, მიტაცებდა მოსმენა ყმაწვილკაცობის მეგობართა მოურიდებელი კამათისა, რომელშიც სიცოცხლეშივე გენიოსად აღიარებული პოეტი ტოლსავით უცქეროდა ძველი დუხჭირი ცხოვრებისაგან ხელმოცარულ უასპარეზო მხატვარს.

ფედია მ ჩათვლიმა.

ნაცნობმა ახალგაზრდებმა დაგვლოცეს, შემდეგ უცნობი რუსი ოფიცრები მოვიდნენ, გალაკტიონის ლექსები თქვეს რუსულად, თხოვეს დაეღია მათთან, მაგრამ ავუხსენი, შეუქლოდ არის-მეთქი.

გალაკტიონს ჩემი ნაცნობებიდან მიშა გოკიელი მოეწონა. გვერდით მოისვა. მერე ჩაძინებულ მხატვარს შეხედა და თქვა:

— საწყალი ფედია, უფალმა მიიღო!

— სახელითა მამისათა და ძისათა... უფალო. შეიწყალეე!

— წავიმდერე.

— აამინ! — ჩაიბუბუნა გალაკტიონმა.

— ჰა, ფედია! გესმის?.. არ გესმის?.. როგორ სძინავს საწყ-

აღს... იცი, ეგ მარტოკა ცხოვრობდა ბაღდადში... ცალკე ბინა ჰქონდა, ახალგაზრდობაში ამხანაგები თავს ვიყრიდით იქ, ვკითხულობდით, ვხატავდით, ვჭეიფობდით, — სიცილით მიამბობდა პოეტი.

დოლ-გარმონი აიბარგა. ხალხიც თანდათან გაიკრიბა. მყუდროება დასადგურდა. ღრიჭედ დარჩენილი კარიდან იანვრის საღი ჰაერის ჭავლი შემოიღვარა.

ლამის პირველ საათზე ელექტროშუქი ჩაქრა. ოფიციალტებმა ორი სანთელი აანთეს. კედლებზე და ჭერზე ორიოდე ლანდი დალოდავდა. სიჩუმე დაგუბდა.

ფედიას სძინავს. გალაკტიონი ჩაფიქრდა. მე უგემურად ვაბოლებ უკანასკნელ პაპიროსს. შევცქერა დიდი პოეტის სახეს და უნებურად მაგონდება მისი სიტყვები:

ახლა, როცა ამ სტრიქონს ვწერ, შუალამე იწვის, ღნება,
სიო, საკმლით მონაქროლი, ველთა ზღაპარს მეუბნება...

დაქანცული ფიქრებით ვეძებ დღევანდელ თარიღს. იბადება კითხვა, რომელი საათია? და ვიდრე საათს დავხედავდე: უხმოდ გუნებაში ვამბობ მეორე ლექსსაც:

ახლა, რა თქმა უნდა, ძლიერ გვიანაა.
გულში მწუხარებამ ღამე გაათია...
მაინც არ მასვენებს მწარე სინანული,
რომელი საათია? რომელი საათია?
იყო შარლ ბოდლერი: „მწარე და ძვირფასი
თრობის საათია, ღვინის საათია!“
ასე იძლეოდა პასუხს შეკითხვაზე:
რომელი საათია?

— „ამგვარი იყო მთაწმიდაზე შემოღამება!“ — წარმოსთქვა გალაკტიონმა ნ. ბარათაშვილის ტაეპი. — ჰა, რას იტყვი? ხომ დიდი პოეტი იყო! გენიოსი, Чудотворец в поэзии!

* * *

გალაკტიონი ამაყობდა, რომ მისი შემოქმედება ქართული კლასიკური ლიტერატურის საძირკველზე იდგა.

— ევროპელი ფორმალისტების უშნოდ მიმდევარი ერთი პოეტი ჩამაცივდა, ლექსში ფორმა უპირველესი რამ არისო! მაშინ, მახსოვს, დავწერე ლექსი „აი, რა მზის სიზმარია“... და ვუთხარი იმნაირ პოეტებს, აბა, თუ ბიჭები ხართ, მეორე ასეთი ლექსი თქვენ დაწერეთ-მეთქი! — მიამბობდა გალაკტიონი. — აქ სიტყვები წალმა-უკულმა იკითხება:

აი, რა მზის სიზმარია,
აირევი ივერია,
აი, ღროშა, აშორდია,
აერების სიბერეა.

ეს ლექსი მხოლოდ ფორმისათვის დავწერე, ისე, სათამაშოდ. მერე კი ზოგმა კრიტიკოსმა ჩემი მსოფლმხედველობის განსახიერებად, საპროგრამო ნაწარმოებად, ლამის შემოქმედების მთავარ ძარღვად ჩამითვალა სიტყვების ეს უბრალო ზმათამაშა და ისე შემომიტია, თათქოს აზრიანი არაფერი დამეწეროს ამ ქვეყანაზე.

...და არ ეპიტნავებოდა ყველა ისინი, ვინც ცდილობდა „ორ პერიოდად“ დაეყო მისი შემოქმედება და მისი რევოლუ-

ცამდელი ლექსები სიმბოლისტურად მოენათლა. მაგრამ იყვნენ ისეთი კრიტიკოსებიც, რომლებმაც სათუთად გააანალიზეს გალაკტიონის ჩანგის ნაჟღერი, არაერთხელ აღუნიშნავთ პრესაში, რომ „მის ადრინდელ ლექსებში გამოხატული მწუხარებისა და სულიერი ობლობის დრამას თავისი წარმომშობი და მასაზრდოებელი ფაქტორებით საერთო არაფერი აქვს დეკადენტური პოეზიისათვის დამახასიათებელ სკეპსისთან და ანტიხალხურ, ანტირეალისტურ მისწრაფებებთან“¹, ხოლო მკვლევართა ნაწილმა მეცნიერულ ნაშრომებსა და სტატიებში კატეგორიულად უარყო პოეტის შემოქმედების დაქუცმაცების ცდა და საკითხი პირდაპირ დააყენა, რომ „გ. ტაბიძის გზის ორ საპირისპირო პერიოდად დაყოფისას იჩქმალება პოეტის „გაუტეხელი სულისკვეთება“, რომლითაც იგი მიჰყვებოდა „ახალ ეპოქის საფეხურებს მძლე იდეათა“².

ძართალია, გალაკტიონი ლექსის უმაღლესი ფორმების შემქმნელი პოეტია, მაგრამ მხოლოდ ფორმისათვის შექმნილი, შემეცნებითს ღირებულებას მოკლებული ნაშრომები მას შემოქმედების სრულფასოვან ნიმუშად არ მიაჩნდა. ამიტომაც მისი ლექსები ესოდენ ღრმავარგანი, განზოგადებული იდეებისა და პრობლემების შემცველი. სწორედ ბევრი მისი ნაწარმოების ფილოსოფიურმა სიმაღლემ დააფრთხო ნაწილი კრიტიკოსებისა. მათ დეკადენტური უწოდეს და გააპრიმიტიულეს იმ ლექსების გაგება, რომლებშიც, ბესარიონ ჟღენტას

¹ ბ. ჟღენტი. „საქ. სახალხო პოეტი გ. ტაბიძე“, 1953 წ. (ბროშურა).

² ა. ჩაჩიბაია. „გ. ტაბიძის ორი ლექსის დათარიღებისა და სწავლების საკითხისათვის“, გაზ. „სახალხო განათლება“. 4 მაისი. 1960 წ.

სამართლიანი თქმით, არის ერთგვარი ქვეტექსტი — ფარული, ამოსაცნობი აზრი, რომელიც ალეგორიების ბურუსშია გახვეული და... ხშირად სწორედ აქ ჩანს ხოლმე გალაკტიონი, როგორც მხატვრული სახეების დიდოსტატი და პოეტი-მოაზროვნე.

* * *

გალაკტიონ ტაბიძეს თავისებური შეხედულებანი ჰქონდა პოეზიაზე, პოეტიკაზე, წერის სტილსა და მანერაზე.

განსაკუთრებით საინტერესო იყო მისი აზრები იერსახეებით აზროვნების შესახებ...

ერთხელ გვიან ღამით, ჩვეულებისამებრ, გავაცილე ჩვენი საწლიდან „დინამოს“ სტადიონამდე. გალაკტიონი წყნარად მიაბიჯებდა მდუმარე ქუჩაზე, ხშირად ჩერდებოდა და ხელების გაშლით მესაუბრებოდა.

— რა კარგი იქნება, რომ დაწეროთ წიგნი, რომელშიც ახალი იქნება თქვენი შეხედულებანი იერსახეებით აზროვნების, ჟანრებისა და ნიუანსების შესახებ, რომ მკითხველისათვის და ახალგაზრდა პოეტებისათვის ცნობილი გახდეს გალაკტიონის მიერ ახალ სალექსო ფორმათა ძიების ზოგიერთი პროცესი მაინც, — ვუთხარი პოეტს.

— იმ დღეს შენ წიგნი მაჩვენე, ა. ბელის «Поэзия слона»... იმდაგვარი რომ დაეწერო, ხომ? — შემეკითხა პოეტი.

— დიახ, ან უფრო ვრცელი.

გალაკტიონი ჩაფიქრდა და მოწყენით მიპასუხა: — ამ იდეის განხორციელება ცალკე მუშაობას მოითხოვს. უჩვეულო სამუშაოს განსაკუთრებული მყუდროება სჭირდება... მე კა, აბა, სადა მაქვს ასეთი, სულ გაწამაწიაში ვარ, ხომ ხედავ!

ბოლოს თითქოს დამეთანხმა კიდეც, რომ ნელ-ნელა იმუ-
შავებდა ასეთ წიგნზე და იმ ჩანაწერებსაც გამოიყენებდა,
რომლებიც თავის არქივში ეგულებოდა.

* * *

ხშირად, ტექსტზე მუშაობის დროს, გალაკტიონი ქალა-
ლებში ჩაფლულ კალმისტარს მოიძევდა, ვერ იპოვნიდა... ჩემ
ავტოკალამს მივაწოდებდი. რაც უნდა „მაგარი“ სამუშაო
გვქონოდა, გამიღიმებდა, მეასეჯერ შემეხუმრებოდა: „პოეტმა
თავისი კალმისტარი მხოლოდ პოეტს უნდა ათხოვოს, ან იმას,
ვინც ძალიან უყვარს და პატივს სცემს, თორემ სხვა დაუთარ-
სავს, მაგრამ... ერთი ძველი ჩვეულებაა კიდეც — არაპოეტმა
პოეტს არ უნდა სთხოვოს კალამი“. ისე იტყოდა, თორემ,
ცხადია, კალმისტრები და ფანქრები არასოდეს მიუჩნევია ფე-
ტიშად. ხშირად კარგავდა, აქა-იქ გააბნევედა და არც აგრე-
რიგად ფატალისტი კაცი იყო, რომ „თარსი ხელი“ სწამე-
ბოდა.

დაუმთავრებელ ნაწარმოებს ძე-ხორციელს არ წააკითხებ-
და. არც რჩევას ჰკითხავდა ვინმეს, როგორ წარემართა ლექ-
სის შინაარსი თუ იდეა. ვიცოდი მისი ეს ჩვევა და მართოც
რომ ვიყავი ხოლმე ოთახში, მის დაუმთავრებელ ხელნაწერს
არასოდეს არ წავიკითხავდი, არც გავეკარებოდი — გუნებაში
ტაბუდ მქონდა მიჩნეული.

ახლად დამთავრებულ ნაწარმოებს ორი-სამი დღით „მი-
აგდებდა“, მერე გაჩაღხავდა, გადაათეთრებდა და მხოლოდ

ამის შემდეგ წააკითხებდა მახლობლებს, ისმენდა მათ რჩევას. დაბეჭდვა კი არასოდეს არ ეჩქარებოდა.

* * *

1958 წლის 21 იანვარს გალაკტიონი ავადმყოფი იწვა. შესრულებული ნამუშევარი ჩავაბარე, ბლოკნოტში ჩავიწერე შენიშვნები და წასვლა დავაპირე, მაგრამ არ გამიშვა, ვისაუბროთო...

საუბარი ექიმის მოსვლამ შეგვაწყვეტინა. იგი გალაკტიონის ძველი ნაცნობი აღმოჩნდა. დიდხანს სინჯა ავადმყოფი, რომელიც ჭრელი პიყამას შარვლით, წელს ზევით გახდილი იდგა შუა ოთახში, ირონიულად იღიმებოდა, თვალს მიკრავდა და ექიმზე ისე მიმითითებდა, რომ მთელი მისი სახე ამბობდა: „საქმეშია, რაღა!“ თან მარმარილოსავით პიტალო მკერდი ექიმისაკენ მიეშვირა.

— კიდევ მაჩვენე მაჯა!.. სიზმრები გქონდა?

— კი!

— რას ხედავდი?

— ავდიოდი მალლა-მალლა, მთაზე, სოხუმში. ავდიოდი დიდი ტანჯვით, ვაი-ვაგლახით და... ვერ მივალწიე. — ჩაფერფლილი ხმით თქვა გალაკტიონმა.

იმ წუთში ეს პატრიარქალური წვერით დამშვენებული კაცი, დიდი პოეტი და ჩვეულებრივი ავადმყოფი, მომაგონებდა რაფაელის ცნობილ ნახატს, რომელზეც ასახულია მაცხოვრის მსვლელობა გოლგოთაზე.

ექიმმა ბევრი შეკითხვა მისცა, რეცეპტები დაწერა და ურჩია, სხვა ექიმებსაც მიმართო.

ნინომ კარებამდე მიაცილა მკურნალი, რომელმაც გასამრჯელოს მიღებაზე კატეგორიული უარი განაცხადა.

— ხომ გაიგონე, რა გითხრა? თავს უნდა გაუფრთხილდე, წამლები უნდა მიიღო... ასე არ შეიძლება, არა! — გულისტკივილით მიმართა ნინომ. გალაკტიონი სდუმდა, ოხრავდა:

— ეხ, ექიმი მიშველის მე? წამ-ლე-ბი!.. რა იცის ექიმმა, რა მიშველის?..

— ექიმს თუ არ დაუჯერებთ... — ვერ დავაბოლოვე, რადგან ისეთი მწუხარე თვალებით შემომხედა, რომ გაეჩუმდი.

როდესაც ნინო მეორე ოთახში გავიდა, გალაკტიონმა დაიკვნესა და ჩუმად მითხრა:

— იცი, ისეთი საწყენი რამ შემხვდა... ველარ მოვითმინე... სხვა დროს გეტყვი, აუცილებლად გაგიმხელ.

შევცქეროდი მის მოწყენილ სახეს, და გალაკტიონთან მუშაობის ამ ხნის მანძილზე მხოლოდ იმ ერთხელ გამახსენდა ზოგი მკითხველის მიერ ყბადაღებული მისი სტრიქონები:

სადაც უნდა შევიარო,
ღვინოს დამაძალებენ,
მწუხარება ვერ დავფარო,
ღვინოს დააბრალებენ...

თებერვალში გალაკტიონი მომჯობინდა. სახლიდან იშვიათად გადიოდა. მეცადინეობამ გაიტაცა. ხშირად ერთადაც გვიხდებოდა მუშაობა მის ბინაზე, ან მის ლაბორატორიაში, სადაც ვსაუბრობდით ხელოვნებაზე, ვწერდით პასუხებს კორესპონდენციებზე, ვღებულობდით სტუმრად მოსულ ორიო-

დე მეგობარს. ასე გადიოდა დაუფიწყარი დღეები, რომლებსაც ამშვენებდა გალაკტიონის მოგონებანი წარსულისა, მსუბუქი იუმორის კილოთი რომ მიაგებოდა ხოლმე.

...და იმ თებერვლის სისვიან საღამოებში, როდესაც ტელეფონში მის ხმას გავიგონებდი, ლამაზი ავეჯით მოწყობილ ლაბორატორიას სითბო და სინათლე ემატებოდა.

— ხომ არ მოგიწყენია, ბიძიკო? მოვდივარ... ახლავე მანდ გავჩნდები! ახალ ამბებს გეტყვი! — იძახდა შინიდან ყმაწვილურად ხალისიანი და რამდენიმე წუთის შემდეგ დერეფანში ზარის წკრიალზე ვცდილობდი, დიასახლისისათვის დამესწრო კარის გაღება.

გალაკტიონი კრაველის ქუდს მოიხდიდა, პალტოს მოიშორებდა და იმდენ სიახლეს შემოიტანდა ზამთრის უფერულ საღამოში, რომ განცვიფრდებოდით, სად მოასწრო დღის განმავლობაში ამ კაცმა ამდენის ნახვა, წაკითხვა, გააზრება, დაწერა!

...10 თებერვალს, მთავრობის სახლში მშენებლობის სამინისტროში ვიყავით. იქიდან საქმის წარმართვით კმაყოფილნი გამოვედით, გალაკტიონი გაჩერებასთან დაძრულ ავტობუსს შეახტა. დროზე მივაშველე ხელი, თორემ... კარგახანს ვიმგზავრეთ.

სადღაც ჩამოვედით და დიდხანს ვიარეთ ფეხით. მოგვშივდა. ქაშუეთის ეკლესიის პირდაპირ მდებარე სარდაფის „კაბინეტში“ მოვთავსდით და სადილი მოვითხოვეთ.

როცა შევნაყრდით, თვალი თვალში გამიყარა და მკითხა:

— რატომ არ შემეკითხე, იანვარში როგორ გავხდი ავად, კინალამ რომ მომკლა?.. ხომ დაგპირდი, სხვა დროს ვიამბობ მეტქი?

— შეხსენება მომერიდა...

— ჩემი არ უნდა მოგერიდოს. პირიქით, აზრს რომ გაგიზიარებ, გულზე მომეშვება ხოლმე, მამაშვილობას გეფიცები!

! უხერხულემა დამეუფლა. თურმე ამოდენა კაცი ელოდა ჩემს თანაგრძნობას, ელოდა ერთ უბრალო შეყითხვას, რა გაწუხებსო და მე კი...

როდესაც გამოვერკვიე, ის თვალცრემლიანი მიაშობდა თავისი ცხოვრების წარსულს.

შემდეგ გაიხსენა ძველი მეგობრები: ტიციან ტაბიძე, მიხეილ ჭავჭავიძე, პაოლო იაშვილი...

დიდხანს იჯდა თავდახრილი და ცრემლიანი, როგორც ნამდვილ ჭირისუფალს შეფერის. მე კი ერთხელ კიდევ ჩავმარცვლე სმადაბლა: „ჭირსა შიგან გამაგრება ასრე უნდა, ვით ქვიტკირსა“. თავი ასწია...

ოფიცინტს დაუძახა და ძველი ნაცნობობა შეახსენა. წინათ იმ კაცს¹ თურმე რესტორან „ქიმერიონში“ უმსახურია, სადაც ხშირად იკრიბებოდა ლიტერატურული ბოჰემა, მხატვრები და არტისტები. ხნიერმა ოფიცინტმა ახალგაზრდობის წლები გაიხსენა, კინაღამ ატირდა, ჩამოთვალა ძველი მოღვაწეები და დაილოცა.

გალაკტიონს გუნება შეეცვალა. წელში გაიმართა და წამოიძახა:

— მოდი ვიქეიფოთ! მე მინდა ბევრი სიმღერა და მხიარულება!

¹ ლაპარაკია გრ. მირიანაშვილზე.

„მოკლათ წარსულ ღრობებზე დარდი...
ჩვენ უნდა ვსდიოთ ახლა სხვა ვარსკვლავს!

— დრონი მეფობენ... დაე, იმეფოს დიდხანს დღევანდელ-
მა და ხვალინდელმა დღემ! — წუხილი აღარ განმეორდება!
გაუმარჯოს სიხარულის დღეებს, ჩვენი ქვეყნისა და ხალხის
ბრწყინვალე მომავალს! — სთქვა გალაკტიონმა... ჩემ ჭიქაში
ჩარჩენილ ღვინოზე მიმითითა და თავისი საყვარელი სიმღერა
მომიმღერა:

გეშვია, გეშვია,
ახალი დო ჯვეშია,
უჩარდია, უჩა კოჩი,
ვაშუნდიდა, მუშა მორთი?!
1

დამაცლევინა და მეგრულად გამესაუბრა. ისევე თავისუფ-
ლად მეტყველებდა, როგორც მღეროდა. სუფთად, ყველა ინ-
ტონაციის დაცვით.

— კიდევ ვიმღეროთ! — თქვა გალაკტიონმა და დაიღო-
ლინა:

ორთავ თვალის სინათლევ,
რაზედ მოგიწყენია?!
2

ხმადაბლა, წყნარად, გულის სიღრმიდან მღეროდა, არავის
ვაწუხებდით, არც თავს ვაწონებდით ვისმე. ქართული სიმღე-
რის წყურვილს ვიკლავდით, მშობლიურ ჰანგებს ვეთაყვანებო-
დით...

— „ამგვარი იყო მთაწმიდაზე შემოღამება!“

რუსთაველის გამზირზე გამოხუთ, მართლაც, თებერვლის თბილისური შემოდამება გვეფინებოდა მხრებზე. პალტოს საყელოები ავწიეთ. გალაკტიონი დინჯად მიდიოდა.

სახალხო პოეტი ხალხში

ხანში შესული პოეტის ცხოვრებაში მეტად დიდი ადგილი ეკავა შეხვედრა-სალამოებს. ცხადია, ამას დიდი საზოგადოებრივი მნიშვნელობა ჰქონდა, მაგრამ ხალხით საესე მიტინგებზე და აუდიტორიებში ყოფნა ხშირად დამლელად მოქმედებდა გალაკტიონზე, ურღვევდა შემოქმედებითი შრომისათვის აუცილებელ ხანგრძლივ მყუდროებას და... ჯანმრთელობასაც. დღე არ გავიდოდა, რომ სადმე არ ყოფილიყო მიწვეული: თათბირზე აკადემიაში ან მწერლების სახლში, სტუდენტებთან, მოწაფეებთან, მუშებთან, კოლმეურნეებთან და სხვ.

გალაკტიონის მთელი ცხოვრება გენიალური შემოქმედისა და დაუღალავი ტრიბუნის რევოლუციური ტრიუმფი იყო. სიტყვამძიმე ორატორი, მაგრამ წარმოსადგეი გარეგნობის პოეტი, ორიოდ ლექსს წაიკითხავდა ხოლმე მოხსენებებითა და მისაძალმებელი სიტყვა-ლექსებით გამოხუთა საპასუხოდ და მის მთრთოლვარე ხმაში ჩაღვრილი სიტბო, სილაღე, უშუალობა და მუსიკა ერთ რიტმში მოაქცევედა ათასობით ადამიანთა სუნთქვასა და გულისტგერას.

ხშირად იგი მიწვეული იყო საქართველოს სხვადასხვა კუთხეში, ქალაქებში, სოფლებში და იქ სტუმრად ჩასვლა მისი ეთნოგრაფიის მოყვარული ბუნებისათვის ნამდვილ ზეიმს წარმოადგენდა. საქართველოს ისტორიისა და ყველა კუთხის

ქართველთა ტრადიციების მცოდნე და მოტრფიალე პოეტმა ასეთ მოგზაურობებში არაერთი საინტერესო პატრიოტული გზნებითა და ლირიკული სიტბოთი აღსავსე ლექსი შექმნა...

1948 წლის 18 სექტემბერს თბილისი-ფოთის მატარებლით ქ. ცხაკაიაში ჩასულ გალაკტიონს ტრიუმფალური შეხვედრა მოუწყვეს რკინიგზის სადგურში. ნანატრ სტუმარს უამრავი თაიგული უძღვნეს მოწაფეებმა და მშრომელებმა.

„პოეტმა სასტუმროში შეისვენა და ქალაქის ბაღს მიაშურა გიორგი ჭალადიდელის საფლავის სანახავად, რომელიც ყვავილებით შეამკო. აქვე მოიგონა აკაკი წერეთლის სიტყვები გ. ჭალადიდელის შესახებ.

იმ ღამით საზაფხულო თეატრში გალაკტიონს მოუწყვეს შეხვედრა... პოეტმა მგზნებარე პათოსით წაიკითხა ლექსები: „ორი ლელო“ და „მადლობა, დიდი მადლობა“, რომლებიც ჩამოსვლის დღესვე დაეწერა. ხალხმა პოეტი კვლავ მქუხარე ტაშითა და ყვავილების თაიგულებით დააჯილდოვა. ქალაქის ერთ-ერთ ქუჩას გალაკტიონ ტაბიძის სახელი მიეკუთვნა... კონცერტზე რემა შელეგიას ეთნოგრაფიული გუნდი გამოვიდა.

მოულოდნელად ვარსკვლავებით მოკენჭილ ცას ღრუბელი გადაეფარა და შხაპუნა წვიმამ ხალხი დაასველა, მაგრამ ფარდის დაშვებამდე ადგილიდან არავინ დაძრულა, სიყვარულით ადევნებდნენ თვალს დიდ პოეტს.

დიდი სუფრა გაიშალა შალვა ალანიას სახლში. გალაკტიონის მოსალხენად საუკეთესო მომღერალ-მომცეკვენი, მეჩონგურენი, დაირასა და სხვა ხალხურ საკრავებზე დამკვრე-

ლი ქალაქის მშრომელი მოვიდნენ... დადლილმა პოეტმა მცირედი ხანი დაჰყო სუფრასთან, მეღხინეთ მადლობა გადაუხადა და დასასვენებლად გაეშურა.

მეორე დღით ქალაქის თეატრში პიონერებმა და მოსწავლეებმა მიიწვიეს, საპატიო პიონერად აირჩიეს და კონცერტი გაუმართეს.

იმავე დღეს პოეტი მრავალსაუკუნოვან ნოქალაქევს ათვალიერებს. ძველის-ძველი „ციხე-გოჯის“ გაღვანი, უამთა ქარბორბალათი შეღეწილი ბურჯები, ქონგურები, საიდუმლო გვარაბები, ახლაც რომ ინახავენ ძველ ქართველ რაინდთა საბრძოლო ყიყინის ექოს, ტახურის ლეგენდარული ხეობა — პოეტის მეოცნებე თვალს უაღერსებს.

გალაკტიონმა კურორტი მენჯიც მოინახულა... ცხაკაიას რაონულმა გაზეთმა „ავანგარდმა“ სპეციალური გვერდი მიუძღვნა პოეტს, ადგილობრივმა რადიომ სპეციალური გადაცემა მოაწყო, სარაიონო ბიბლიოთეკაში მოეწყო გალაკტიონის წიგნების გამოფენა. (დაწვრილებით იხ. ბორის შენგელიას წერილი „მადლობა, დიდი მადლობა“, გაზ. „ავანგარდი“, 1959 წ. 16 დეკემბ.).

ცხაკაიაში დაწერილი ლექსებიდან „ორი ლელო“ პოეტის თხზულებათა VI ტომშია შეტანილი, ხოლო მეორე ლექსი პირველად დაიბეჭდა „ავანგარდის“ 1948 წ. სექტემბრის ნომერში, მეორედ — ამავე გაზეთის 1959 წ. 16 დეკემბრის ნომერში, სადაც აღნიშნულია, რომ „ამ პატარა ლექსმა თავისი ადგილი უნდა დაიკავოს სახალხო პოეტის ლიტერატურული მემკვიდრეობის დიდ საუნჯეში“. აი ის ლექსიც:

მადლობა, დიდი მადლობა!

კაცს უგულობა შეაკრთობს, როგორც დღეს უსინათლობა,
გულწრფელი ყვავილებისთვის, მადლობა, დიდი მადლობა!
მადლობა ახალგაზრდობას, ვაჟკაცებსა და ხნოვანებს,
მე თქვენი სიხარულის გზა მარადის აღმაფრთოვანებს.
დღეს ჩემი ჩანგი, თქვენი ხმა საქართველოა მზიანი,
იმისი წინსვლა მედგარი, იმისი ადამიანი.
აღმშენებლობის ხანაში ჩანგის ხმა არ გვიანდება,
ჩემი ჩანგი და თქვენი ხმა აქ მტკიცედ ერთიანდება.
სიძარტლის ნათელს დიდება, ძირს ბნელი უსამართლობა,
კოლხიდის მზეო მგზნებარე, მადლობა, დიდი მადლობა!

* * *

პოეტის გამოსვლას მუდამ თან ახლდა გულწრფელი ტა-
ში, თვით ისეთ ტრაფარეტულ და უღიმღამო სადამოზეც კი,
როგორც 1953 წელს მოუწყვეს თბილისის ოპერის თეატრში.
იმ ერთხელ ვნახე გალაკტიონი თავისი „შეხვედრით“ უკმა-
ყოფილო.

— მაიაკოვსკისაც ასე აღიზიანებდნენ პოეზიის მტრები და
ბოროტი ადამიანები. — ამბობდა მეორე დღეს წუხილით.

— ხალხისთვის მთავარი იყო თქვენი ბრწყინვალე გამოსვ-
ლა, — ვანუგეშე პოეტი, — აი, ნახავთ, მომავალ შეხვედრებს
მშვენივრად მოაწყობს ჩვენი საზოგადოება. თუმცა...

— რა, თუმცა?

— თუ არ გეწყინებათ...

— სთქვი, კაცო!

— რა, და... გაცდენენ, თავიანთი ტრაფარეტული მოხსე-
ნებებით და ბავშვური ლექსებით. მიგიწვევენ და... წინა დღე-
ებშიც ვერ მუშაობთ, იმ სადამოზეც ღელავთ, განიცდით, დრო

გიცდებათ. დადგებიან ტრიბუნაზე და ამბობენ, გალაკტიონი ყველაზე დიდი პოეტიაო. ვის სჭირდება ეს? — მივუგე ნერვიულად.

— თითქოს მართალი ხარ, — მითხრა ჩაფიქრებით, — მაგრამ ჩემი ხნის რომ იყო, ასე არ იმსჯელებდი. იცი, რა უხერხულია უარის თქმა, როდესაც ხალხში ხარ მიწვეული? მართალია, მომაცდენენ მეცადინეობას, მაგრამ ხომ ხედავ, ყველაფერს თავს ვანებებ ხოლმე... რომ არა სთქვან, უკადრისიაო. . მე ხომ, მართლაც მიყვარს ხალხში ყოფნა!

გულთბილი საღამო გაუმართეს 1953 წ. პირველ ნოემბერს გალაკტიონს უნივერსიტეტში, სტუდენტური ორიგინალური ლექსები წაუკითხეს. გალაკტიონმა წაიკითხა ლექსი „განჭვრეტა ოცდაათი წლის“. შემდეგ კარგად შედგენილი პროგრამით ჩაატარეს კონცერტი.

მეორე დღეს რკინიგზის მხატვრული აღზრდის სახლში, სადაც იმ დროს ლიტურებს ვხელმძღვანელობდი, ჩავატარეთ გალაკტიონისადმი მიძღვნილი გრანდიოზული საღამო.

წინა დღეებში გალაკტიონმა დაათვალიერა ახალთახალი თეატრალური დარბაზი და მიწვევისათვის მადლობა უთხრა დირექციას. ამ საღამოს ჩასატარებლად ორი თვის განმავლობაში ვემზადებოდით.

ბავშვების გულწრფელი გამოსვლებით აღტაცებულმა გალაკტიონმა ტრიბუნიდან სამი ლექსი წაიკითხა. შემდეგ პარტერის პირველ რიგში ჩაჯდა ბავშვებში, ხელი გადახვია პატარებს და სიამოვნებით ისმენდა ნიჭიერი ბავშვების მონაწილეობით გამართულ დიდ კონცერტს.

მხატვრული აღზრდის სახლის უფროსის კაბინეტში ახლაც

სათუთადაა დაცული გალაკტიონის საიუბილეო საღამოს მასა-
ლები, მოსაწვევი ბარათი პროგრამით, რომელსაც ამშვენებს
პოეტის პორტრეტი და ავტოგრაფი:

მშობლიურ ჩემო მიწავ,
შენს საყვარელ სახელს ვფიცავ,
რომ დავიცავ ხალხთა ძმობას,
მეგობრობის ფიცს დავიცავ!

11 ოქტომბერს პოლიტექნიკურ ინსტიტუტში მოუწყვეს
შეხვედრა პოეტს.

ერთი წლის შემდეგ, 1955 წ., ჩემი ლიტწრის წევრი ბავ-
შვები მიიწვია შინ, კარგახანს ესაუბრა და იმდენად დაინტე-
რესდა მათი შემოქმედებითი მუშაობით (განსაკუთრებით ლექ-
სებით), რომ ორჯერ გვესტუმრა რკინიგზელის სახლში, ერ-
თხელ პოეტურ საღამოზე, რომელსაც ერქვა „ჩვენი პირველი
ლექსები“ (20 თებერვალი) და მეორეჯერ ვაჟა-ფშაველას შე-
მოქმედებისადმი მიძღვნილ საღამოზე, სადაც მოულოდნელად
შემოვიდა დარბაზში. ტაშმა იქუხა, აუდიტორიამ გალაკტიონს
მიაპყრო მთელი ყურადღება. პოეტი დინჯად მიესალმა ხალხს
და პარტერში დაჯდა. ამ დროს ტრიბუნაზე იდგა მოსწავლე
რევაზ მალლაფერიძე, რომელმაც ვაჟასადმი მიძღვნილი ლექსი
დაამთავრა, და თავმჯდომარის დასტურით, ლექსით მიესალმა
გალაკტიონს. მთელი დარბაზი ფეხზე წამოდგა და ტაშითა და
შეძახილებით აიტაცა ეს მისალმება.

ამავე წელს შესრულდა 1905 წლის რევოლუციის 50 წლის-
თავი. გალაკტიონმა მოაგროვა პირველი რევოლუციისადმი
მიძღვნილი ლექსები და ცალკე წიგნად გამოცემას აპირებდა.

პროექტისა და კრებულის შედგენაში ვეხმარებოდი და რამდენიმეჯერ მესტუმრა მხატვრული აღზრდის სახლში. ჩვენს სამუშაოს რომ დავასრულებდით, ენერგიულად ჩაერეოდა ხოლმე ლიტერატურის წრის მუშაობაში, კითხულობდა მოსწავლეთა ლექსებსა და რეფერატებს, საუბრობდა მათთან, რჩევას აძლევდა და უამრავ საინტერესო ამბავს უყვებოდა თავისი თაობის მწერალთა ცხოვრება-შემოქმედებიდან.

* * *

— მეც მყავს ლიტერატურის წრე, — მითხრა ერთხელ გალაკტიონმა და ა. წერეთლის მოსაგონარი საღამოს მოსაწვევი ბარათები მომცა.

იმ დროს გალაკტიონი მწერალთა კავშირის პოეტთა სექციის გამგე იყო. არაერთხელ მიამბობდა, თუ როგორი სიცხოველით ჩაატარა „ერთი ლექსის“, „ერთი ბალადის“ და სხვა საღამოები, სადაც ძველი და ახალი ქართველი პოეტები თითო-თითო ახალ ნაწარმოებს კითხულობდნენ და შემდეგ განიხილავდნენ. ეს იყო უაღრესად საინტერესო, გულთბილი საღამოები, რაც დიდ როლს ასრულებდა ქართველ პოეტთა „ძმობის ორდენის“ რაინდული სულისკვეთებით განმტკიცების, შემოქმედთა შორის სამშობლოსა და ჩვენი საუკუნის 30-იან წლებში შერყეული ურთიერთპატივისცემის აღდგენისა და, რაც მთავარია, ახალთაობის საბჭოთა რომანტიკის სულით აღზრდის დიად საქმეში. ამ სალონური სიმყუდროვით გარემოცულ შეხვედრებში მონაწილეობდნენ აგრეთვე მხატვრები და მუსიკოსები, კინოსა და თეატრის მუშაკები, ხელოვნების ყველა დარგის წარმომადგენელი. ერთი სიტყვით, ეს

იყო თანამედროვე კულტურის ერთ-ერთი ძვირფასი კერა-
რომელსაც დევიზად ჰქონდა არჩეული გალაკტიონის აზრი:

— არ ვარგა მომღერალი, რომელსაც ჰგონია, რომ მის მეტს
არავის ეძლევა სიმღერის უფლება. არც პოეტი ვარგა, რომე-
ლიც ხელს უშლის პროფესიით არაპოეტს, ლექსები წეროს.
წეროს ყველამ, იმღეროს ყველამ... მაშინ უფრო მეტად ეყვა-
რება თვითუფს სამშობლო, ხალხი და შრომა, ხოლო უკე-
თესთა შემოქმედება გამოვაქვეყნოთ კიდევ, სახალხო გავხა-
დოთ.

აკაკი წერეთლის შემოქმედებისადმი მიძღვნილ საღამოზე
გალაკტიონთან ერთად მივედი (1955 წ. 2 ივლისს). მწერალთა
სახლის სხდომათა დარბაზის გვერდით სალონში, კართან, ჩვენ-
მა სასიქადულო პოეტმა ი. გრიშაშვილმა ხელი ჩამომართვა,
გალაკტიონს თვალი აარიდა (უმძრახად იყვნენ!) და გვერდის
აქცევა დააპირა, მაგრამ ისე მაგრად ჩავავლე ხელი, რომ ორი
კაცი ვერ წამართმევდა. მეორე ხელი გალაკტიონს მოვხვიე
წელზე და ორი პოეტი დამნაშავე მოწაფეებივით დავუპირის-
პირე ერთმანეთს. მხოლოდ ერთი ფრაზა ვთქვი აღელვებით:

— სირცხვილია, მთელი საქართველო შემოგცქერით, თქვენ
კი...

— ჩემო სოსო, ჩემო სოსო! — გულში ჩაიკრა გალაკტი-
ონმა.

აბა, რა ფიქრი უნდა, გრიშაშვილს ცრემლები წამოუვიდა.
ბუტბუტებდა:

— გალაკტიონ, ჩემო ძვირფასო, როგორა ხარ?

მაშინვე საუბარი გააჩაღეს. შეუძმჩნევლად გავინაპირე და
მოშორებით სავარძელში ჩავეშვი.

გალაკტიონის თაოსნობით აკაკის საღამო მეტად პოეტურად ჩატარდა.

წამოსვლის წინ ვილაცამ ლარნაკიდან დიდი თაიგული ამოიღო და გალაკტიონს მიაართვა.

გალაკტიონმა მანქანით მიმიყვანა შინ. თაიგული გადმომცა და თავისი ხავერდოვანი ხმით მითხრა:

— ეს შენს პატარა ქეთინოს მიაართვი გალაკტიონისაგან!

* * *

იმავე თვეში გალაკტიონი გაემგზავრა ვანში. თავისი დედის გარდაცვალებიდან ოცი წელი იქნებოდა გასული, რაც იქაურობისთვის არ მიეკითხა. სამტრედლიდან ვანამდე ყვავილებს უფენდნენ, ტაშითა და სიმღერით ხვდებოდნენ პოეტს ყოველ სოფელში. ზღვა ხალხის გამო კლუბში ჩასატარებელი თემატური საღამო ღია ცის ქვეშ ჩატარდა და მიტინგად გადაიქცა... შემდეგ სოფელი სალხინო, ფერადი ელნათურები პ. ლორთქიფანიძის ეზოში, ძველთაძველი ჭადრის ტოტებს ქვეშ გრანდიოზული ბანკეტი და ვარსკვლავეთში გაგორებული მოქათქათე სავსე მთვარე.

მოგონებები ცვლიან მოგონებებს. ამ მიდამოებში გატარებულმა ბავშვობისა და ყრმობის წლებმა კინემატოგრაფიის ლენტივით გაირბინეს გალაკტიონის თვალწინ. მის ხელში გიტარა აქდერდა და მეზობლებისა და მეგობრების ხილვით აღტაცებულმა პოეტმა წყნარად წამოიწყო სიმღერა: „მახსოვს პირველად სასწავლებელში“. შემდეგ გიტარა გადადო და სადღეგრძელო წარმოსთქვა:

მეორე დღეს გალაკტიონის და მისი თანამგზავრების ავტომანქანებმა სოფელ შუამთის მიაშურეს, გეზი პოეტის მშობლიურ სოფელ ჭყვიშისკენ ჰქონდათ აღებული.

შუამთაში მანქანების ქარავანს პიონერებმა თაიგულები და შეძახილები შეაგებეს... სასოფლო-სამეურნეო ტექნიკუმის, ეზოში მიტინგი, ლექსების კითხვა და ცეკვა გაიმართა. შემოიტანეს წინადადება, იმ სახლში, სადაც პოეტი დაიბადა, სახლ-მუზეუმი მოეწყოს, ხოლო შუამთის კულტურის სახლს გალაკტიონ ტაბიძის სახელი ეტარებინა. პოეტმა აქაც თავისი მგზნებარე ლექსებითა და გულითადი მადლობით უპასუხა საზოგადოებას.

ჭყვიში. გალაკტიონის კარ-მიდამო. გულში იკრავენ, კოცნიან პოეტს მნ წლის ბიძა დიმიტრი ტაბიძე, ბიძაშვილი — ტიცვიან ტაბიძის ძმა, სიმონ ტაბიძე და უამრავი ნათესავი და მეზობელი. მხიარული ყიყინით ჩაუარეს მდინარე რიონს და ისევ პოეტის ეზოში დაბრუნდნენ. აქ ისევ მეგობრები და ნათესავებია, მათ შორის პოეტის ღვიძლი ბიძაშვილი, ხნიერი მანდილოსანი ეთერი, რომელიც ცრემლიანი სიცილით უამბობს დამსწრეთ „პატარა ბუთხუზა გალაკტიონის“ ბავშვობაზე.

ალვის ხეები აშოლტილა ჭყვიშის გზაზე. ბროწეულებში ჩაფლული იმერული ოდა-სახლები და ყანები გასდევს რიონის ნაპირს.

გალაკტიონის სახლის გვერდით ძველი სასაფლაოა. იქ, ათასწლოვანი მუხის ძირას, წერდა სიჭაბუკეში იგი ლექსებს: „რიონის პირად“, „მესაფლავე“... ახლაც ხალხის შეუმჩნეველად განმარტოვდა და თვალცრემლიანი დიდხანს იდგა დედის საფლავთან.

ცაცხვის, მსხლისა და თუთის ხეებითაა დაბურული ტაბიძეების კარ-მიდამო. დაბალ ფიცრულ სახლს აივანი ამშვენებს.

უნაპირო სუფრა გაიშალა პოეტის ეზოში. მხიარული მასპინძელი გალაკტიონი მამაპაპურად ილხენდა მახლობლებში.

თბილისელმა კინოოპერატორებმა გალაკტიონის მოგზაურობის საყურადღებო მომენტში გადაიღეს და შექმნეს დოკუმენტური ფილმი „გალაკტიონი ვანის მშრომელებთან“. ქართულმა უურნალ-გაზეთებმა აღნიშნეს გალაკტიონის მოგზაურობა მშობლიურ კუთხეში.

* * *

1955 წლის 30 ივლისს გალაკტიონი ახალქალაქშია, კულტურის სახლში მოუწყვეს შეხვედრა, სცენა ყვავილებში ჩაეფლო... გალაკტიონი კითხულობს ლექსებს. მომდევნო დღეებში მოგზაურობს მესხეთ-ჯავახეთში, ფარავნის საძოვრებზე ესტუმრა კახელ მწყემსებს, ფარავნის ტბის შემოგარენი მოიარა და დაწერა ლექსი „მესხეთ-ჯავახეთი“. მწყემსებს დაუმეგობრდა, ნაბადი მოიხურა, კომბლით ხელში გაჰყვა ცხვარს, ცხენზე ამხედრდა, ჭაბუკივით გააჯირითა...

ჭობარეთის ტყეში პიონერთა ბანაკმა მიიწვია, პიონერთა რაზმში ჩარიცხეს პოეტი, ლექსები და თაიგულები მიაართვეს.

დაულალავი იყო გალაკტიონი იმ დღეებში. ახალქალაქში პურის აღება-გალეწვას დაესწრო, კოლმეურნეებში გაერია, ბევრი ისაუბრა. კუმურდოს ტაძარი მოინახულა, სოფლებში ისეირნა, ასპინძაში დაბრუნდა და 4 აგვისტოს, სოფელ საროში მიწვეული, იქაური სკოლის შენობაში მიესალმა ხალხს. ერთი დღის შემდეგ ადიგენში ჩაფიქრებული ათვალეირებდა ზარზმის მონასტერს. შემდეგ ისევ გაუმართეს შეხვედრა. პოეტმა წაიკითხა მოგზაურობის დღეებში დაწერილი ლექსი:

„...ხარობდეს და დღეგრძელობდეს ვინმე მესხი ახალ ხანის,
მესხი მესხეთ-ჭავჭავეთის, მესხი „ვეფხისტყაოსანის“.

აბასთუმანი... ბორჯომ-ბალი. იქაური კულტურის სახლი,
კვლავ ყვავილები, გრძნობით სავსე მისალმებანი და პოეტის
მადლობით აღსავსე ლექსი „ბორჯომის მუხა“:

...სალამი სიმღერას! ის მრავალძალია
იქ, სადაც განთქმული ბორჯომის წყალია... |
სალამი ბორჯომის თვალწარმტაც ხეობას,
მის ტურფა ბუნებას და მოსახლეობას!

ძველი ლექსებიც წაიკითხა...

ბორჯომ-ბალის სადგურზე ხალხმა ხელში აიტაცა გალაკ-
ტიონი, ისე შეიყვანეს მატარებლის ვაგონში. (ზოგი შეხვედრა
დაწვრილებით იხ. ფ. ნიშნიანიძის „გალაკტიონის რამდენიმე
შეხვედრა საქართველოს მშრომელებთან“, ბროშურა, 1960 წ.).

* * *

აგვისტოს ბუღში გახვეულ თბილისში, მთაწმინდის პანთე-
ონში*, ვაჟა-ფშაველას გარდაცვალებიდან 50 წლისთავს დაეს-
წრო გალაკტიონი, დიდებული გვირგვინით შეამკეს მან და გი-
ორგი ლეონიძემ ვაჟას საკრძალი. დიდხანს დადიოდა ღრმად
დაფიქრებული გალაკტიონი პანთეონში. სევდიანი თვალებით
უშხერდა ნიკოლოზ ბარათაშვილის საფლავს. ამბობენ, კაეშ-
ნიანი ღიმილით მიმართა მახლობლად მყოფ ლიტერატორებს::

* ეს იყო 1955 წ.

— როდესაც ამქვეყნად აღარ ვიქნები, ნეტავ აქ ახლოს გამითხარონ სამარე.

ხელი ჩაიქნია და მარტოკა დაეშვა დაღმართზე.

* * *

რამდენიმე დღის შემდეგ გალაკტიონი წყნეთის (რკინიგზელთა ბავშვების) პიონერთა ბანაკმა მიიწვია. ბანაკი მისი აგარაკის გვერდით იყო განლაგებული. პიონერები სასულე ორკესტრით მიადგნენ პოეტის ეზოს და ქართული მარში დაუკრეს. გალაკტიონი სიცილით გამოეგება ყმაწვილებს და მათ შორის ჩადგა. ბანაკის ეზოში პოეტი საპატიო პიონერად აირჩიეს და წითელი ყელსახვევი გაუკეთეს. პატარები ეალერსებოდნენ მგოსანს, მისალმებანი და ლექსები წაუკითხეს. გალაკტიონმა რამდენიმე პატრიოტული და თემატურად საყმაწვილო ლექსი წაიკითხა, მათ შორის ამ შეხვედრისათვის სპეციალურად დაწერილი ლექსიც:

ბევრი რამ მაქვს მე თქვენთან
საძმო, საამხანაგო,
რკინიგზელთა შვილების
პიონერთა ბანაკო!

(იხ. ტ. VII)

„ცხადია, „იმ რკინიგზელებში“ პოეტი გულისხმობდა თავს თანამოაზრეებს, ძველი რევოლუციური კერის, თბილისის დეპოს მუშებს, რომელთა ბრძოლა ცარიზმის წინააღმდეგ ოქროს ასოებითაა აღბეჭდილი ისტორიაში.

* * *

განსაკუთრებით უყვარდა გალაკტიონს მუშები. მეტად გაუხარდა, როდესაც 1956 წლის სექტემბერში ტყიბულის მეშახტეებმა მიიწვიეს. გზადაგზა ისევ შეხვედრები და ოვაციები... სოფლები ორპირი და ხრესილი, ბოლოს ტყიბულსაც ეწვია.

გულისცემით ათვალეირებს მოხუცი პოეტი ტყიბულის მიდამოებს. აჰ, ტყიბულის ერთ-ერთ სოფელში, დიდახნის წინათ, მასწავლებლად მუშაობდა პოეტის მამა, ვასილ ტაბიძე, რომელიც გალაკტიონის დაბადებამდე ორი თვით ადრე გარდაიცვალა. გალაკტიონი მანამდე არასოდეს ყოფილა ტყიბულში და ამ კუთხის ნახვა მეტად ესიამოვნა. იგი ცნობისმოყვარეობით ათვალეირებდა მალაროებს. ერთ-ერთ მალაროში მუშებმა ნათურით დამშვენებული მოვერცხლილი მესახტის ქუდი უსახსოვრეს წარწერით.

* * *

არანაკლებ უხვი იყო შეხვედრებით 1957 წელი. 22 მაისს გალაკტიონი თბილისის მუშა-ახალგაზრდობის მე-19 სკოლამ მიიწვია, შემდეგ ზედიზედ მიიწვიეს სკოლებსა და ტექნიკუმებში. განსაკუთრებული სიყვარულით გაუმართა შეხვედრა თბილისის საფინანსო-საკრედიტო ტექნიკუმმა. თავმჯდომარე ი. ადგიშვილის შესავალი სიტყვის შემდეგ მთავარი მოხსენება „ბელოვნების საკითხი გ. ტაბიძის შემოქმედებაში“ წაიკითხა ამ სტრიქონების ავტორმა. მისალმებებითა და ლექსებით გამოვიდნენ გ. ტაბიძის სახელობის ლიტერატურული წრის წევ-

რები (ტექნიკუმში დღემდე არსებობს ეს წრე). ფოიეში მოწყობილი იყო პოეტის წიგნების, ხელნაწერების, პორტრეტების და ქანდაკებების გამოფენა.

მახსოვს, შეხვედრის შემდეგ გალაკტიონმა ნაყინზე მიგვიწვია. კაფეში გალაკტიონი ოხუნჯობდა, შინაურულად იქცეოდა, უცნობებს ესაუბრებოდა. ხალხი ალერსიანი ღიმილით მისჩერებოდა პოეტს და თავაზიანად პასუხობდა შეკითხვებზე.

იმავე წლის 8 ივნისს ა/კ თბილისის რკ. გზ. კლუბმა (რკინიგზელის სახლში) მოაწყო პოეტთან შეხვედრა. ბესარიონ ჟღენტმა წაიკითხა მოხსენება: „დიდი ოქტომბრის სოციალისტური რევოლუცია გალაკტიონ ტაბიძის შემოქმედებაში“ და იმდენი ლექსებიდან მოიტანა ზეპირად ვრცელი ციტატები, რომ აღტაცებული აუდიტორია დიდხანს უკრავდა ტაშს. მე, პოეტის გვერდით ვიჯექი პრეზიდენტში. გალაკტიონმა გაბრწყინებული სახით გადმოიხედა და თქვა:

— ხედავ, რა ბრწყინვალე მესხიერება აქვს ბესოს?!
სხვათა შორის, ამ საღამოზე გამოვიდა აწ გარდაცვლილი

პოეტი გიორგი ლეჟავა (რომელიც წარმოშობით გალაკტიონის სოფელ ჭყვიშიდან იყო) და წაიკითხა ჯერ გალაკტიონისადმი მიძღვნილი, ხოლო შემდეგ გალაკტიონის ლექსები.

ფოიეში აქაც მოწყობილი იყო გალაკტიონის შემოქმედების ამსახველი გამოფენა.

* * *

ახლოვდებოდა ქართული ხელოვნების დეკადა, რომელიც მოსკოვში უნდა ჩატარებულიყო. ეს იყო 1958 წელს. 10

მარტს გალაკტიონი ვინახულე. იწვა, კანკალებდა, კბილს კბილზე აცემინებდა, ხელ-ფეხი უთრთოდა, არიტმულად უცემდა გული. ექიმს გაუსინჯავს. უთქვამს, კოჯორში წაიყვანეთო დასასვენებლად.

— მოსკოვში ერთად უნდა წავიდეთ... როგორც მოვილა-პარაკეთ... ხომ წამოხვალ? — ნაწყვეტ-ნაწყვეტად მეუბნებოდა გალაკტიონი. დიდბანს არ გამიშვა სახლიდან. ჩათვლემდა და მეორე ოთახში გავდიოდი. ისევ გაახულდა თვალებს, დამიძახებდა, მელაპარაკებოდა, ათას რამეს მეკითხებოდა, მგზავრობისათვის გეგმებს აწყობდა...

გამგზავრების წინდლით მე გავხდი ავად, მაგრამ გავრისკე და ჩემოდანს მოვკიდე ხელი. გალაკტიონის ძმისწულმა ნოდარმა დროზე შემატყობინა, რომ მატარებელი 19, 40-ზე გადიოდა და არა 20, 20-ზე როგორც ეს ტალონზე იყო აღნიშნული. სანწრაფოდ დავიჭირე ავტო... ამრულ მატარებელს შევახტი... აღელვებული გალაკტიონი ადვილად ვიპოვნე კუპეში (ის ხომ ყოველი მგზავრობისას ერთი საათით მაინც ადრე გადიოდა ხოლმე სადგურში), რომ დამინახა, გაუხარდა, გადაამკოცნა.

არც ერთი სიტყვა ლიტერატურაზე! მთელი საღამოს განმავლობაში საოხუნჯო ამბებს ვყვებოდით, რადიო გვქონდა ჩართული და ჯაზურ სიმღერებს ვისმენდით.

როდესაც რადიომიმღები მიყუჩდა, ზემო საწოლზე მოვიკალათე და გამადიდებელი შუშით სარკინიგზო რუქას ვათვალიერებდი. გალაკტიონმა ნელ-ნელა ტანთ გაიხადა და პიჯამაში დარჩა. ქვემო საწოლზე მიწვა და მამინ-სიბირაჟის სქელი წიგნი გადაშალა. ჩამოვხედე და ხმამაღლა გამეცინა.

— რას იცინი? — მკითხა გალაკტიონმა.

— მგზავრობაში უფრო მსუბუქი წიგნი ჯობია, ამხელას რა წაგაკითხებთ? — ვუპასუხე.

მან ბავშვურად გაიღიმა, წიგნი გადადო, წამალი და წყალი მომაწოდა და მითხრა:

— აბა, ეს აბი გადაყლაპე!.. მე რომ მაძალებდით წამლებს შენ და ნინა... ახლავე დალიე, თორემ... ხომ იცი, ექიმები რა ბრაზიანი ხალხი ვართ?!

წამალმა ვერაფერი მიშველა. ავადმყოფობამ დამძლია. ყრუდ მესმოდა გალაკტიონის ძილის წინ ნელი ოხვრა, მატარებლის ბორბლების დაგადუგი და საკუთარი მაჯის აჩქარებული ცემა...

საუზმის შემდეგ გალაკტიონმა ისევ მამინ-სიბირიაკი გადაშალა.

კუბეში შემოვიდა ჟურნალ „ნიანგის“ მხატვარი-კარიკატურისტი გ. ფირცხალავა და პოეტის ხატვას შეუდგა.

სოჭში მატარებელი დიდხანს იდგა რკინიგზაზე ჩამოწოლილი ზვავის გამო. გულდაწყვეტილი გალაკტიონი დავარწმუნე, რომ მარტოდ მგზავრობას შევძლებდი და სოხუმს მივაშურე მეგობარი ექიმების იმედით.

* * *

ქართული ხელოვნებისა და ლიტერატურის მეორე დეკადანამდვილ ზეიმად გადაიქცა. მოსკოვის თეატრებში 1958 წლის 21 მარტს დაიწყეს გამოსვლა საქართველოს ხელოვნების მუშაკებმა, მწერლებმა, პოეტებმა.

დეკადა შესავალი სიტყვით და ლექსით-გალაკტიონმა გახ-
სნა. წაიკითხა ამ დღისათვის საგანგებოდ დაწერილი ლექსი.
„დეკადის დროშები“:

ხელოვანი ვართ,
და სწორედ ახლა,
ცხრაას ჩვიდმეტმა
რომ განაახლა
სამშობლო —
ვემართებს
კვლავ ვასახელოთ.
ამხანაგებო,
დროშები მალლა!..

პოეტს ჰქონდა დეკადისადმი მიძღვნილი კიდევ ერთი ლექ-
სი, რომლის ხელნაწერი მატარებელში წამიკითხა, მაგრამ რა-
ტომღაც იმ ხანებში არ გამოაქვეყნა.

მომდევნო დღეებში გალაკტიონი შეხვდა თავის ძველ
მეგობრებს რუსი პოეტებისა და ლიტერატორების წრიდან,
დაათვალიერა რამდენიმე გამოფენა, დაესწრო კრებულში გა-
მართულ ბანკეტს, სადაც პირადად გაეცნო საბჭოთა ქვეყნის
ხელმძღვანელ ამხანაგებს. უამრავმა ფოტორეპორტიორმა აღ-
ბეჭდა ფირზე გალაკტიონის კოლორიტული გარეგნობა.

მოსკოვში გალაკტიონი ისე შინაურულად გრძნობდა თავს,
როგორც თბილისში. მოინახულა რევოლუციის ბობოქარი
დღეების ამსახველი მემორიალური დაფებით „მკერდდამშვე-
ნებული“ ძველი შენობები, პოეტისათვის ახალგაზრდობიდან
ნაცნობი წმიდა ადგილები. გზადაგზა ახალი ლექსებიც გაჩნდა
გალაკტიონის უბის წიგნაკში. ხშირად სეირნობდა ქართველ

ბელოვან ჭაბუკებთან და ქალიშვილებთან, აღტაცებით უაზრობდა მეხსიერებაში გაღვიძებული რევოლუციური ბრძოლების შესახებ და სასტუმროსკენ დინჯი ნაბიჯით მიმავალი დაჯიხრვებით უჭკვრეტდა ელნათურებით გაბრწყინებულ უნაპირო მოსკოვს.

იმ დღეებში ქართველ მწერალთა შორის ლიტერატურული პაექრობის მოწმე გამხდარა პოეტი, თვითონ კი გადახდენია თავს ორიოდე კურიოზული ამბავი, რასაც შემდეგში არაერთხელ მოუთხრობდა სიცილით თბილისელ მეგობრებს...

* * *

7 აპრილს მოსკოვის დეკადიდან ჩამოსულმა გალაკტიონმა მინახულა. თავს უკეთ ვგრძნობდი, მაგრამ მაინც წოლა მიჩიეს ექიმებმა. კარგახანს მესაუბრა და გამამხნევა...

ერთ დღეს (10 მაისს) ტაბიძეებთან შევიარე. გალაკტიონი შინ არ დამიხვდა. ქ-ნმა ნინომ მიამბო გალაკტიონის მოსკოვიური ეპიზოდების, კრემლში გამართული ბანკეტისა და სხვა შეხვედრების შესახებ. რალაცას წუხდა, შფოთავდა... ვანუგეშე და რომ გამემხიარულებინა, პიანინოს მივუჯექი.

უცებ ხმაურით შემოვიდა გალაკტიონი, რიხიანად მოგვესალმა და თავისი კაბინეტიდან გამოუშვა ორი მტრედი, რომლებიც წინა საღამოს იურისტებს ეჩუქებინათ რესტორან „თბილისში“ ჩვენი პოეტისადმი მიძღვნილ ბანკეტზე. მტრედები ჭერთან დასხდნენ ლავგარდანზე. კარგახანს ამაოდ ვეწვალეთ სიცილ-ხარხარით, ვერ ჩამოვიყვანეთ იქიდან.

— გაუშვით, იფრთხილონ თავისთვის!.. ახლა კი ვისადილოთ, — წამოიძახა გალაკტიონმა.

ნასადილევს რუსთავიდან ჩამოსულმა მწერალმა კარპე

მუმლაძემ და კომკავშირის საქალაქო კომიტეტის წარმომადგენელმა „ზიმი“ მოაყენეს გალაკტიონის სახლს. რუსთავის მეფოლადეების სახელით გალაკტიონი მიიწვიეს... რამდენიმე წუთს ვისაუბრეთ და რუსთავისაკენ გავქროლდით.

რუსთავის ქარხნის მოგუგუნე საამქროებში ბევრი მუშა და ინჟინერი გააცნეს გალაკტიონს. გიგანტურ ღუმელებში კაშკაშებდა სითხედ ქცეული ფოლადი. ყურთასმენა არ იყო. იქ მომუშავენი კი სასტვენებით „ელაპარაკებოდნენ“ ერთმანეთს. გალაკტიონმა რაღაცის თქმა დააპირა, ხელით მიმითითა გავარვარებულ ღუმელზე, მაგრამ თავისი ხმა თვითონვე რომ ვერ გაიგონა, გაიცინა და ხელი ჩაიქნია. ერთ საათს ვათვალიერებდით საამქროებს. გარეთ რომ გამოვედით, პოეტი მომიბრუნდა:

— იმას გეუბნებოდი... ისეთი ცეცხლი იქნებოდა ალბათ დანტეს ჯოჯოხეთშიც.

ქარხნის ადმინისტრაციის წარმომადგენლებთან ერთად სასტუმროში წავიხემსეთ. შემდეგ ქალაქში გავისეირნეთ. რამდენიმე ფოტორეპორტიორი დაგვყვებოდა და ყოველ ნაბიჯზე სურათებს უღებდნენ პოეტს.

იმ საღამოს რუსთავის კულტურის სახლში ამავე სახლის წრეებისა და სტუდენტების ძალებით გალაკტიონს გრანდიოზული შეხვედრა გაუმართეს. პრეზიდიუმში პოეტთან ერთად ვისხედით გ. გელაშვილი (იქაური გაზეთის რედაქტორი), ფ. ნიშნიანძე (რომელიც სიტყვითაც გამოვიდა), მე და სხვ.

ტრიბუნაზე ასულმა მოქალაქეებმა საკმაოდ კარგი მოხსენებები წაიკითხეს. ერთმა მათგანმა კი გალაკტიონის სიჭაბუკის დროინდელ ლექსებზე კრიტიკაში აწ მოძველებული შეხე-

დუღობაში გადმოაფხიხა და პოეტის ადრინდელი შემოქმედება ახსენა როგორც დეკადენტურ-სიმბოლისტური და რეალისტურ ნიადაგს მოწყვეტილი ხელოვნება.

გალაკტიონს ჩვეულებისამებრ მსხვილი ფანქარი ეკავა ხელში და ნიკაპთან იტრიალებდა. კარგახანს ნაწყენად, მაგრამ დამცინავად იქნევდა თავს.

საკონცერტო ნაწილის დაწყებამდე ფოიეში გამოსული ხალხი გალაკტიონის ცხოვრება-შემოქმედების ამსახველ, მართლაცდა, კარგ გამოფენას ათვალიერებდა. სტენდებზე გამოფენილი იყო გალაკტიონის თხზულებათა თითქმის ყველა გამოცემა და უკანასკნელი წლების პერიოდული პრესის ფურცლები, რომლებზეც პოეტის ლექსები ელვარებდა.

კონცერტის შემდეგ ისევ სასტუმროში წაიყვანეს პოეტა. გულუხვი მასპინძლები თავს ევლებოდნენ სტუმარს. ბანკეტზე თავი მოიყარეს მუშებმა და ინტელიგენციამ. რუსთაველებმა დიდი შთაბეჭდილება მოახდინეს გალაკტიონზე. თითქოს საგანგებოდ შეუჩრჩევიათო, ერთი-მეორეზე უკეთესი ჭაბუკები და ქალიშვილები შემოსხდომოდნენ სუფრას და მამაპაპური სიღარბისლით თქმულ სადღეგრძელოებს ფოლადივით წკრი-ალა ხშიერი „მრავალყამიერი“ და სხვა სიმღერები აგვირგვანებდა.

გალაკტიონი გახალისდა.

ღამის ორი საათი იქნებოდა, თბილისისკენ რომ გამოვე-შურეთ. მანქანაში ექვსნი ვისხედით და ხმამაღლა ვმღეროდით. ალბათ ამიტომ გავგაჩერეს თბილისში შემოსულნი ავტონისპექტორებმა, მაგრამ იცნეს გალაკტიონი და გზა დაგვალოცეს.

ერთხელ ისევ მშენებლობის სამინისტროში წავყევი გალაკტიონს. იქ გველოდებოდა ჩემი ნათესავი პეტრე ფალავა. მან აგვიხსნა, თუ რომელი ინსტანციებისათვის უნდა მიგვემართა და გულისხმიერი დახმარება გაუწია პოეტს (ეს იყო 1957 წ. 7 მაისს):

სამინისტროს მუშაკები მოწიწებით ხვდებოდნენ გალაკტიონს და მეგობრულ რჩევა-დარიგებას აძლევდნენ...

წყნარი ნაბიჯით გავყევით გალაკტიონი და მე რუსთაველის პროსპექტს. იმ დღეს განსაკუთრებით სასიამოვნო შესახედი იყო პოეტი. მოხდენილად იყო ჩაცმული და ჭაბუკური სილადით მიაბიჯებდა. დიდ-პატარა მას შესცქეროდა და ესალმებოდა.

ვ. გურგენიძე შეგვხვდა, გაზონებისკენ გავინაპირეთ და კარგახანს ვისაუბრეთ. გალაკტიონს გადასცა მოსკოვში დეკადაზე გადაღებული ფოტოსურათები. გალაკტიონმა წიგნების მალაზიაში „ნიკორწმიდის ბარელიეფების“ ორი ეგზემპლარი და რამდენიმე სხვა წიგნი იყიდა და მისი სახლისკენ გავეშურეთ.

გალაკტიონის ბინაზე მისი მეუღლე და ზეინაბი დაგვხვდნენ. ახალი ამბები ვუამბეთ ერთმანეთს.

სალამოს სამუშაოს მივუხსენდით.

შესვენებისას პოეტმა შორეულ ფიქრებს გააყოლა თვალი და მიაშბო:

— დიდი სამამულო ომის წლებში საქართველოს ცენტრალური კომიტეტის აგიტაცია-პროპაგანდის განყოფილებამ შექმნა რუსულ-ქართული პოეტური ტექსტების, საბრძოლო ლოზუნგებისა და ფაშისტების წინააღმდეგ მიმართული მძაფრა-

სატირით აღსავსე კარიკატურების პლაკატი, რომელსაც ეწოდებოდა „ხიშტით და კალმით“. ამ 500-1 000 ტირაჟიანი მებრძოლი ფურცლების შედგენა და ბეჭდვა ღამის საათებში ხდებოდა. გარიყრაჟზე თბილისის ქუჩებში უკვე გაკრული იყო „ცხელი“ პლაკატები, სადაც ჩვენი მებრძოლების ლეგენდარული გამარჯვებები იყო არეკლილი... ასახული იყო საბჭოთა ქალაქების გათავისუფლების უახლესი ამბები, მომდევნო ხანებში კი — ფაშისტური ბნელი ძალების საბოლოო განადგურების საკვანძო მომენტები... 'ომის მძიმე წლებში „კომუნისტის“ რედაქციაში დამიდგეს მაგიდა: ფრონტელებისაგან მიღებულ ლექსებსა და წერილებს ვასწორებდი. სხვათა შორის, სამხედრო პოეტებიდან ზოგს მშვენიერი ლექსები ჰქონდა და ვაქვეყნებდით. ამავე დროს სხვა პოეტებთან და მხატვრებთან ერთად მიმიწვიეს და ჩამაბეს ჩემს საყვარელ მუშაობაში. პლაკატში თანამშრომლობამ ახალგაზრდული ძალ-ღონით ამავესო და ბევრი ლექსი დავწერე.

ენერგიულად იბრძოდა გალაკტიონი მახვილი კალმით ფაშისტური ურჩხულის წინააღმდეგ. ჩემ წინაშეა უამთა ვითარებით ოდნავ მოოქროვილი საბრძოლო ფურცლები, რომელთა შორის მრავალს ამშვენებს გალაკტიონის სტრიქონები. აჰ, დონის ბასეინთან წითელი არმიის გამარჯვების სიხარულით ფრთაშესხმული სიმღერა:

დონის ბასეინი

დანდობა არ იყოს,
ბასეინო დონის,
ჩვენს გულმართალ ხალხთან
ომის გამომგონის.

ბასეინო დონის,
დღეს რადიო ქუხდა,
რომ კვლავ გამარჯვების
ცეცხლი ამოდუღდა!...
(„ხიშტიო და კალმიო“ — 1943 წ. 8 სექტ.)

აქვეა ჰიტლერელებისაგან დნეპროპეტროვსკის გათავისუფლების დღეებში აელვარებული სიტყვები:

დნეპროპეტროვსკი

ამ შემოდგომის გრიგალი —
დნეპროპეტროვსკის გრიგალი,
ხვალ თუ ზეგ ჰიტლერისათვის
სამარის ქვაა ფიქალი.

მტერი უბედურ დღეებს სთვლის,
მტერი თავისთავს იმეტებს
და ცეცხლში ნასროლ სიცოცხლის
სწევას უკანასკნელ იმედებს.

...დნეპროპეტროვსკი ჩვენია,
ჩვენს კუნთებს უშენებია,
სინათლით აღუდგენია,
ბაღები უმშვენებია.

მის მოდარაჟე მხნე თვალებს
რული არ მოეკიდება —
მამულის ხსოვნას ავალებს
სამარადისო დიდება!

(„ხიშტიო და კალმიო“)

ვერაგი მტრისადმი ასეთი მომაკვდინებელი სიძულვილის

გრძნობით უღერდა იმ წლებში გ. ტაბიძის ჩანგი. მისი ლექსის ყოველი სტრიქონი საბჭოთა ადამიანების უმაღლეს იდეალად, არსებობის უმაღლეს დანიშნულებად სახავდა თავდადებულ ბრძოლას მტრის საბოლოოდ გასანადგურებლად. მან ხომ ჯერ კიდევ სამამულო ომამდე (1941 წ. თებერვალში) დაწერა პატრიოტული მგზნებარებით აღსავსე ლექსი „მშობლიურო ჩემო მიწავ“, რომელშიც მოახლოებული ძნელი ბრძოლებისა და დიადი გამარჯვების წინათგრძნობა ჩააქსოვა:

მშობლიურო ჩემო მიწავ,
შენს საყვარელ სახელს ვფიცავ,
რომ დავიცავ შენს მიღწევებს,
შენი ღროშის ფერს დავიცავ!
ქარმა მიანგრ-მოანგრათა
ძველი ქვეყნის საბუღარი,
აწ სხვაგვარნი ქარნი ქრიან,
ჩვენ მხარე გვაქვს საკუთარი.
ის ვერ ითვლის გმირთა მხარ-მკლავს,
ვერც სიუხვეს გენიისა,
და ბრწყინვალეს ანთებს ვარსკვლავს —
ვარსკვლავ აკადემიისა.
მშობლიურო ჩემო მიწავ,
შენს საყვარელ სახელს ვფიცავ,
რომ დავიცავ ერთა ძმობას,
მეგობრობის ფიცს დავიცავ!

„ყოველდღიური პრესის ფურცლებიდან, ლექსთა საგანგებო კრებულებიდან თუ დედაქალაქის ქუჩებში გაკრული საბრძოლო პლაკატებიდან გ. ტაბიძის ლექსი დიდების შარვანდედით მოსავდა წმიდა სამამულო ომის გმირულ დღეებს“
(ბ. ულენტი):

ძალით, სიცოცხლით, ვატაცებით,
მკლავით, გონებით,
ადამიანთა მღელვარებენ მილიონები.

პოეტს ღრმად სჯეროდა საბჭოთა ხალხის გამარჯვება მტერ-ზე, რომელსაც „საწამლავით ხელში მოსულს მას სიკვდილი მოსდევს მხლებლად“ და სწორედ ამიტომ მოუწოდებდა თანამოძმეთ, რომ „ახლა არის ყველაფერი — მასთან ბრძოლა, მასთან ბრძოლა“.

ომის გავარვარებულ ქურაზე გამოჰქედა პოეტმა გორდას ხმალივით ფოლადური ლექსები: „მფრინავი“, „გმირს გამარჯვება“, „სიმართლის დროშა“, „დიდო არმია“, „ჩვენ შევქმენით, ჩვენი არის“, „მიაგდებს მერანს მხედარი“ და სხვ.

ამ ლექსებში აირეკლა წითელი არმიის ლეგენდარული ბრძოლების ცოცხალი სურათები, საბჭოთა ხალხის გამირულა ეპოპეის ძლევამოსილი შუქი.

წითელი არმიის ჯარისკაცი „წინ მიიწევდა სწორუბოვარა“ და ფრონტული ცხოვრების სასტიკ ჟამს ასე მიმართავდა სამშობლოს:

არ გიღალატებ სანამ
მზე გვინათებს და მთვარე,
ყოველ მხარეზე კარგო,
ჩემო სამშოლო მხარე.

(„არ გიღალატებთ“).

კავკასიონის მისადგომებთან მოსულ ფაშისტურ ურჩხულს სასტიკად შეერკინა წითელი არმია და თვალუწვდენ კლდეთა ტინებზე გადაუმსხვრია ხერხემალი ჩვენი ხალხისა და მიწა-

წყლის დაპყრობის მოსურნეთ. დაიწყო ახალ გამარჯვებათა დღეები და ვალაკტიონის ჩანგიც კვლავ ახლებურად აქლერდა.

მე კავკასიის ქედები მთხოვენ,
მე მთხოვს მუსიკა თერგის ხმაურის,
ვესმინო ყაზბეგს, ხევის ბეთჰოვენს,
აგუგუნება კაიშაურის.

(„ღრუბლები ძაუგთან“)

ამ სტრიქონებში ნათელია ის მაღალჭუმანური გრძნობა, რომლითაც აღსავსეა დიდი ქართველი პოეტი ბეთჰოვენისა უკვდავი მუსიკისადმი. მას ღრმად აქვს შეგნებული, რომ წითელი ჯარი გოეთესა და შილერის, მოცარტისა და ბეთჰოვენის გერმანიას კი არ ებრძვის, მილიონობით პატიოსან მშრომელ გერმანელთა და მათი მრავალსაუკუნოვანი კულტურის წინააღმდეგ კი არ ლაშქრობს, არამედ შინ მომხდურ ბილწ ფაშისტურ ურდოებს ანადგურებს.

ახლაც მაგონდება: ომის ბოლო დღეებში საბჭოთა ჯარი რომ მისსავე ბუნაგში, ფაშისტურ ბერლინში. ანადგურებდა მტერს, ჩვენი ქალაქების რადიო სწორედ ბეთჰოვენის სიმფონიებს გადასცემდა — ეს იყო დიდი სიმბოლო იმ მაღალი ინტერნაციონალური გრძნობისა, რომელიც ესოდენ მკაფიოდ ახასიათებს ჩვენი ქვეყნის ადამიანის კეთილშობილურ ბუნებას, მის მისწრაფებას, თვით ბრძოლის დროსაც კი ხელი გაუწოდოს ყველა ქვეყნის მუშასა და გლეხს, დემოკრატიულად მოაზროვნე ინტელიგენციის.

ზემოთ მოყვანილ ლექსში არანაკლებ საყურადღებოა

სტროფი, სადაც გალაკტიონს თავის უშუალო მოვალეობად
მიაჩნია: პოეტური სიტყვის ისტორიაში უკვდავი ძეგლის აღ-
მართვით შემოუნახოს შთამომავლობას სამშობლოს მიწა-
წყლის დამცველი რაინდების ბუმბერაზული შემართება:

იმ დღეებს ძეგლი უნდა ავუგო,
უნდა აღვმართო წყებათა-წყება,
ვით აღიმართა შენთან, ძაუგო,
გამარჯვებათა ჩვენთა დაწყება!

(„ღრუბლები ძაუგთან“)

განზოგადებულ სახეთა გარდა, გალაკტიონის ამ ლექსებში
ვხვდებით კონკრეტული გმირების სახელებსაც. ამის საუკე-
თესო ნიმუშს წარმოადგენს ლექსი „აჭარელი მფრინავი“, სა-
დაც პოეტი ქებას ასხამს საბჭოთა კავშირის გმირს ჭინჭარაძეს:

ვინ იყო, რომ ოცდაათი
საოცარი გაფრენით
ყოველი დღე და საათი
აანთო აღმაფრენით?
...ვინ დაესხა თავს, რომელმა
მტერს სიკვდილი არგუნა?
— ჭინჭარაძემ! — ჯარმა მთელმა
ერთხმად დაიგუგუნა.

ბრძოლების ქარცეცხლი პოეტის შემეცნებაში წარუშლელ
მოვლენად დარჩა სამუდამოდ: სწორედ ამიტომ მისმენდა
თვალანთებული, როდესაც ომის დამთავრებიდან შვიდი-რვა
წლის შემდეგ ვუამბობდი: თუ როგორ აიტანეს მამაცმა საბ-

ჭოთა ალპინისტებმა და ჯარისკაცებმა დაშლილად საზენიტო არტილერია და ტყვიამფრქვევები ყაზბეგზე და კავკასიონის სხვა მწვერვალებზე, შემდეგ ააწყეს ეს მრისხანე იარაღები და აღმოდებული ფაშისტური თვითმფრინავები უფსკრულებსა და ხეობებში ჩაასამარეს.

— ეს მე არ ვიცოდი... საგმირო თემაა, ამაზე უნდა დაიწეროს რამე! — წამოიძახებდა ხოლმე გალაკტიონი.

1943 წლის ნოემბერში, სამამულო ომის ვითარებაში, საზეიმოდ აღინიშნა გ. ტაბიძის დაბადებიდან 50 წლისა და პოეტური მოღვაწეობის 35 წლისთავი. იმავე წელს პოეტი არჩეულ იქნა საქართველოს მეცნიერებათა აკადემიის წევრად, ხოლო 1944 წელს აქტიური მონაწილეობა მიიღო მოსკოვში გამართულ ქართული ლიტერატურის დეკადაში და ტრიბუნებიდან წაიკითხა თავისი ახალი ლექსები, რომლებიც იმავე დღეებში თარგმნეს რუსულსა და სხვა ენებზე.

* * *

ავვისტოს მცხუნვარე დღეებში ორი კვირით ქობულეთში ჩავიდა პოეტი დასასვენებლად (1944 წ.). მაგრამ თითქმის ყოველდღე ახალგაზრდები შეხვედრებს უმართავდნენ კლუბებში, დაწესებულებებში, მოსვენებას არ აძლევდნენ პოეტს ახალი სიტყვის მოსმენის მოსურნენი.

ზღვის სანახები ახალ-ახალ ასოციაციებს იწვევდნენ მგონის ფიქრებში. დაულალავად წერდა ახალ სტრიქონებს, სადაც ყოველდღიური განცდის კაშკაშა ანარეკლი სახიერდებოდა...

— ოქრო ლაევარდში, ეს არის ოქრო ლაევარდში, გესმის. ნინა, ეს არის ოქრო ლაევარდში! — აღტაცებით ეუბნებოდა გალაკტიონი თავის მეუღლეს ზღვის სანაპიროზე და შავი პიჯაკის ჯიბეში სათუთად ინახავდა ლურჯი ტალღების „ნაეშმაკარ“ ნავისებური მოყვანილობის აქატისფერ ქვას, რომელიც ქალიშვილებმა უსახსოვრეს.

...ამ ამბიდან ერთი წლის შემდეგ გამოცემულ გალაკტიონის ლექსთა კრებულს სათაურად ამშვენებდა „ოქრო აქარას ლაევარდში“.

დაუვიწყარი საიუბილეო საღამო მოუწყვეს გალაკტიონს ქუთაისის თეატრში 1945 წლის თებერვალში. ასეთივე საღამო განმეორდა ქალაქის პედინსტიტუტში, სადაც პოეტისადმი მიძღვნილ ნაწარმოებთა შორის გამოირჩეოდა ახალგაზრდა ლიტერატორის სერგო (ნინელ) ჭეიშვილის ლექსი „გალაკტიონი ზღვასთან“, რომელიც დაწერილი იყო 1944 წელს და ზღვის პირად, აქატისფერი ქვით პოეტის აღფრთოვანებას შეეხებოდა.

ქუთაისურმა ნიავმა სიჭაბუკის ფრთები შეასხა გალაკტიონს. ერთ თოვლიან დღეს იქაურ ახალგაზრდა სტუდენტ პოეტებს განუცხადა:

— ახლა ჩვენ უნდა ვნახოთ ადამიანი!

„მწვანე ბაზარში“ გალაკტიონმა ლეჩხუმური ლობიოიანი მჭადი, მწვანილი და რამდენიმე ბოთლი ღვინო იყიდა და ახალგაზრდების ამალით წმ. გიორგის ტაძრისკენ გაემართა „ქვეითად“.

გზად სურათი გადაიღეს ფოტოგრაფთან გალაკტიონმა, მისმა მეუღლემ და სტუდენტებმა.

მიდიოდა აღმართში თოვლის ფიფქებით მხრებშევერცხ-
ლილი გალაკტიონი, თითქოს სიმბოლურად მიუძღოდა ქაბუ-
კებს აღმართის დასაძლევად, მაღლა ასასვლელად, მაგრამ უფ-
რო რომანტიკული იყო ის მომენტი, როდესაც ტაძრის გარშე-
მო მიმოფანტულ საფლავებს შორის ერთ-ერთს მიუახლოვდა.
სევანური ქუდი მოიხადა, ქვიდან თოვლი გადაწმინდა, ერთი
ჭიქა ღვინო გადააღვარა და ემთხვია, ეამბორა. ყურძნის წვე-
ნი და პოეტის ბაგე თბილ ლოცვად დაეფინა სამარეს, სადაც
განისვენებს პოეტი მამია გურიელი.

ვილაცამ წყნარად წარმოსთქვა გურიელის ცნობილი ლექ-
სი „ადამიანი“... შემდეგ ისევ ლექსები...

ამბობენ: შეიქმნა ტრადიცია — ყოველი წლის თებერვალს,
იმავე რიცხვში ქუთაისელი პოეტები და ლიტერატორები მა-
მია გურიელის საფლავთან მიდიან, პოეტური სიტყვის კოცონა
ანთებენ და სვამენ მამია გურიელის მოსაგონარს... ახლა კი
გალაკტიონისასაც.

ქუთაისი ხშირად აგონდებოდა პოეტს. ამ ქალაქთან იყო
დაკავშირებული გალაკტიონის ბავშვობა და ყრმობა, მისი სი-
ქაბუკე და მრავალი ლექსი; ერთი მათგანი კი დღესაც ამშვენ-
ებს ქუთაისელი მოქალაქის მიხეილ კაკიტელაშვილის ოთახს.
იქ გაათია ერთი ღამე (1944—45 წლებში) გალაკტიონმა და
რამდენიმე სტრიქონი მიაწერა ფანქრით კედელს, რომელსაც
სახლის პატრონი არასოდეს არემონტებს — ეს ხომ მისი ოჯა-
ხის რელიქვიაა.

* * *

ამ სტრიქონების ავტორმაც დიდი სამამულო ომის დღე-
ებში გავიცანი გალაკტიონი. საქართველოს მწერლები კავშირ-

ში შევიარე. თან მახლდა ჩემი სტუდენტობის მეგობარი გიკი ხუნდაძე. როდესაც ქუჩაზე გამოვედით, დავინახეთ გალაკტიონი და ვილაც კაცი. დინჯად სცემდნენ ბოლთას შენობის ფასადის წინ. ჩვენ შევჩერდით და მორიდებით ვადევნებდით თვალს.

გალაკტიონი მოგვიახლოვდა. მოგვესალმა, ხელი ჩამოვვართვა და გვკითხა:

— სტუდენტები იქნებით? რაზე გარჯილხართ, დახმარება ხომ არ გქირდებათ? — კარგახანს გვესაუბრა.

ეს იყო ჩვენი პირველი საუბარი (1944 წ. 29 თებერვალს), რომელიც არასოდეს დამავიწყდება.

გალაკტიონი მაშინ წვერმოპარსული დადიოდა, თავს მხნედ გრძნობდა და ბევრს წერდა. მისი ლექსები ხშირად ქვეყნდებოდა პრესაში თუ კრებულების სახით.

მეორეჯერ იმავე წლის 4 მარტს ვნახე გალაკტიონი, გაზ. „კომუნისტის“ რედაქციაში, ლიფტიდან ხელი დამიქნია, გამარჯობა ჩამომძახა და თავისი უბადლო ღიმილით ამავსო.

რას ვიფიქრებდი ომის იმ მძიმე დღეებში, რომ დადგებოდა დრო, როდესაც ქართული სიტყვის ამ გოლიათის მახლობელი გავხდებოდი.

გალაკტიონი უინ და საავადმყოფოში

როგორც ადრე მოგახსენეთ, გალაკტიონის დაუშრეტელი ოცნება იყო შორეულ ქვეყნებში მოგზაურობა. ამაში თავს იყრიდა პოეტური, ეთნოგრაფიული და სპორტული ინტერესი. საათობით მიაშობდა მოსკოვში, ლენინგრადში და

პარიზში, მსხვილსა და მცირე ქალაქებსა და სოფლებში მიღებულ შთაბეჭდილებებზე, მიზიარებდა ვარძიით, ნიკორწმიდით, ნარიყალას ბურჯებითა თუ ბაგრატის ტაძრის ნანგრევებით მიღებულ პოეტურ ზემოაგონებას და ნაოცნებარ ასოციაციებს. მაგრამ გალაკტიონი მარტოოდენ ნანგრევთა სურნელებას როდი ეალერსებოდა. პოეტის გულში აღტაცების გამოძახილად გუგუნებდა ყოველი ახალი ნაგებობა, ახალი მანქანა და ტექნიკის უახლესი მიღწევანი. ყველაფერში სიახლის მაძიებელ მის ფიქრებს ფრთებს ასხამდა მოტორების რიტმული გუგუნი, მეტროპოლიტენის მატარებლის სრბოლა, რეაქტიული თვითმფრინავის ცაში სრიალი, ატომური ენერჯის ზღაპრული ძალა, დედამიწის ხელოვნური თანამგზავრი, ელექტრონიკა თუ კიბერნეტიკა. ადამიანის შრომის შემსუბუქება მანქანების საშუალებით, გალაკტიონის, როგორც თავისი საუკუნის პოეტ-ტრიბუნის თხზულებათა უპირველესი თემა იყო.

ზაფხულობით ხშირად საღამოებს მის აივანზე ვატარებდით, გაცეკეროდით მარჯანიშვილის ქუჩას, მტკვრისა და მთაწმიდის მიდამოებს, პაპიროსს ვაბოლებდით და ვსაუბრობდით... მუხლის გასაშლელად პლენანოვის პროსპექტზე გავისეირნებდით, ფერადი ნათურებით გაშუქებულ ვიტრინებს ვათვალიერებდით, თითო ჭიქა ლუდს დავლევდით და ნაცნობ-მეგობრებთან ვლაღობდით.

ისევ პოეტის სახლში დავბრუნდებოდით, გადავიკითხავდით ჟურნალ-გაზეთებს და ვსაუბრობდით.

გალაკტიონთან საუბრების მუდმივი თემა იყო ლიტერატურული მიმართულებანი, პუშკინი, სევერიანინი, ბელი, ბალ-

მონტი. პიუგო, უაილდი, გოეთე, ბალზაკი, მეტერლინკი, ფრანგული ბალადის უანრობრივი თავისებურებანი, სიტყვის მუსიკა და პოეტური სახეები. მის მოტანილ ციტატებში წუთით ცოცხლდებოდნენ რემბო, ვერლენი, გოტიე და მალარმე, ქართველი კლასიკოსები და ფოლკლორის შედეგები...

* * *

მუდამ როდი ეცალა საუბრისათვის. წერას რომ შეუდგებოდა, ცეცხლის ხაზზე გასულ გმირსავით აენტებოდა თვალეზი და მისი პოეტური სამყაროს შეხება სიტყვას კი არა, ბგერასაც არ შეეძლო.

როდესაც ტექსტების რედაქციაზე ერთად გვიხდებოდა მუშაობა, უმეტესად მხოლოდ საქმეზე ვლაპარაკობდით და... ასე გაფრინდებოდა მთელი დღე.

ხოლო იშვიათად შევისვენებდით და გალაკტიონი გატაცებით მიამბობდა რევოლუციის, ძველი მოღვაწეების, ლიტერატურული დისკუსიების, სალონებისა და ოცდაათიანი წლების პარიზის ამბებს:

— ერთხელ კონგრესის დელეგატმა მწერლებმა ბალმონტი ვნახეთ. ეტლით ჩავვიქროლა და შორიდან ქუდის მოხდით მოგვესალმა.

ვფიქრობ, პოეტის ეს სიტყვები აბათილებს არასწორ ვერსიას, თითქოს პარიზში (1935 წლის ანტიფაშისტურ კონგრესზე ყოფნისას) გალაკტიონს პირადად ესაუბროს ბალმონტთან.

ზაფხულობით დილის საათებში ვმუშაობდით. შემდეგ დასიცხულ ქალაქში გამოვიდოდით და ცივი სასმელით მოვითქვამდით სულს. ერთხელ ტექსტების შედარება მოვათავეთ და მაჩუქანიშვილის მოედანზე გამოვედით სასეირნოდ (1953 წ.

11 ივნისს). უურნალისტი ჰენრიხ კობიძე შეგვხვდა. გალაკტიონმა გრილ სარდაფში ჩაგვიყვანა, ლუდი და საუზმე მოითხოვა. გამხიარულდა პოეტი. დაიჩემა, ვიმღეროთო და თავისი საყვარელი სიმღერა „ოზურგეთი და მერია“ წამოიწყო...

ბოლოს გალაკტიონმა ოფიციალტი გააფრთხილა:

— ამ სტუდენტებისაგან ფული არ მიიღო! დღეს მე ვხარჯავ!

— სტუდენტობა ორი წელია მოვათავეთ! — თავი გამოვიდეთ მე და ჰენრიხმა.

— ვიცი, ვიცი, ჩემო კარგო! — გაიცინა პოეტმა და დანახარჯი გადაიხადა.

* * *

მაღალი გრძნობების მესაიდუმლე და დახვეწილი გემოვნების პოეტი პირად ცხოვრებაში რიგითი მშრომელი კაცის ფსიქოლოგიით ხასიათდებოდა. უფრო მეტიც, ზოგი თვისება ძალიან უბრალო ჰქონდა: უბრალო ტანისამოსი მოსწონდა და საკმელ-სასმელში კი ეკალა, სალათა, მაწონი, „ბლინჩიკები“ და ლიმონათი უყვარდა. ქართული სიტყვის ექსტაზში შესულს და კალმით ამღერებულს კი, საერთოდ ავიწყდებოდა ჭამა-სმა.

როგორც ყველა გულკეთილ ადამიანს, გალაკტიონს ცხოველები უყვარდა და შინ ყოველთვის ჰყავდა კატა. მახსოვს, ერთხელ ჩვეულებისამებრ მოვეფერე მის ხატაურას. პოეტმა სიცილით მითხრა:

— იცი, ეს იმერული ჯიშის კატაა, გაგიგონია?

— მე ციმბირის ჯიშისა გამიგონია, — ვუპასუხე.

— ჰო-და, გეუბნები, იმერული ჯიშისაა მეთქი, მაგას მკა-

დი ურჩევნია რძეს და ხორცს... ერთი შეხედვით, რა ამაყად გამოიციქვრება. სახალხო პოეტის კატა, უბრალო ვინმე არ გეგონოთ! — ჩაიხიოთხითა გალაკტიონმა, კატას ხელი გადაუსვა და ადამიანსავეით დაუწყო ლაპარაკი.

* * *

დიდუბის პანთეონში პოეტ ალექსანდრე აბაშელს კრძალავდნენ (1954 წ. 3 ოქტომბერს). გალაკტიონს, რომ იტყვიან, დანა პირს არ უხსნიდა.

— საწყალი საშა, საბრალო საშა! — ჩაილაპარაკებდა მწუხარედ და ცას მიაპყრობდა მზერას.

იქიდან სადღაც შევიარეთ, გზად ნაცნობებს ვესაუბრეთ. შემდეგ ჩვენსას წავედით.

იმ დღეს გალაკტიონმა და მამაჩემმა დიდხანს ისაუბრეს პოეტის ახალი წიგნის გამოცემის გამო. გალაკტიონი ნაწყენი იყო გამომცემლობაზე, კიცხავდა და დასცინოდა ზოგ მუშაქს, წიგნის ფორმატსა და ტექსტებს მიმახინჯებენო. პატივისცემით ახსენებდა აკად. გიორგი ჯიბლაძეს, რომელმაც დახმარება გაუწია „რჩეულის“ გამოცემაში როგორც გალაკტიონს, აგრეთვე მამაჩემს, იმ წიგნის შემდგენელს.

გვიანობამდე ისაუბრეს, რამდენიმე ლექსის ტექსტი დააზუსტეს და გალაკტიონის ახალი ლექსები წაიკითხეს.

* * *

თავისი ასაკისათვის გალაკტიონი საკმაოდ მაგარი ფიზიკური აგებულების კაცი იყო, მაგრამ თავის მოფრთხილება

არ იცოდა და ხან გაცივდებოდა, ხანაც სხვა რამ სატკივარი ჩაგრავედა.

ავადმყოფობის დღეებში შინ ჩაწვებოდა ლოგინად ან სამკურნალო კომბინატში მიიყვანდნენ. იქაც პატარა მაგიდა ედგა სამუშაოდ, ხშირად კი მწოლიარე წერდა. იმ საავადმყოფოში წერდა გალაკტიონი თავის პოემას „აფეთქება“, როდესაც მე და მამაჩემმა ვინახულეთ (1950 წ. 20 ნოემბერს).

1954 წლის 10 იანვარს პოეტი ისევ კომბინატში იწვა. დაწმენდილ სახეზე ვარსკვლავებივით კამკამებდნენ მისი თვალები.

მაგიდაზე ხელნაწერები და ორიოდ ფანქარი ედო...

გაჩაღებული საუბარი შემოსულმა ექთანმა შეგვაწყვეტინა, გალაკტიონს ილღიაში თერმომეტრი გააკეთებინა, წაიბუზღუნა და გავიდა. პოეტმა კი მაშინვე მოიშორა თერმომეტრი და მაგიდიდან ხელნაწერები აიღო.

რამდენიმე ლექსი წამიკითხა და იქვე შეცვალა ტექსტში ზოგი სიტყვა.

ნაწყვეტების კითხვა დაიწყო თავისი პოემიდან „მშვიდობის წიგნი“. კარგახანს მიკითხავდა.

— აქედან განაგრძე! — მიმითითა სტრიქონზე, — თორემ რაცხა დავიღალე!

როდესაც კითხვა დავამთავრე, ზოგი ადგილი გავარჩიეთ...

იმ დღეებში რამდენჯერმე ვინახულე გალაკტიონი. იგი ძნელად ეგუებოდა საავადმყოფოს კედლებში ყოფნას. მართალია, ცალკე ოთახში იწვა, მაგრამ უნებურად უხდებოდა სხვა ავადმყოფებთან მეზობლური ურთიერთობაც.

— რა მინდა აქ? აქ რა გამაჩერებს? — წუხდა პოეტი.

სიკაბუკეში ჯანმრთელობას ნაჩვევი პოეტი, სიბერეშიც ვერ ეგუებოდა საავადმყოფოს ატმოსფეროს. ერთხელ ძეხვიო მოწამლულიყო. შინიდან ფეხი ვერ გაადგმევინეს, შინაურულად უწამლეს. მეორე დღეს უკეთ გამოიყურებოდა (1958 წ. 3 ოქტ.), მაგრამ ოთახიდან არ გადიოდა და კითხულობდა.

იმ საღამოს ნადსონის ლექსებს მიკითხავდა ზეპირად. იგორ სევერიანინზე მიაშობდა, ეს პოეტი პედაგოგიურ მოღვაწეობას ეწეოდა, მასწავლებლად მუშაობდაო.

ახალ პრესას გადავხედეთ. ლექსები წავიკითხეთ. გალაკტიონმა გამიზიარა თავისი გეგმა:

— ჩემი შემოქმედების მუდმივი გამოფენისთვის უნდა ავაშენო დარბაზი. იცი, სადმე მეცნიერებათა აკადემიის ახლოს ავაშენებ... ჩემ საყვარელ წიგნებსაც იქ დავაწყობ... აფს-უა, რა მდიდარი ბიბლიოთეკა მქონდა სოფელში! მთლად გაცამტვერდა. აჰ კი ცოტა მაქვს წიგნები.

თავისი მახლობლების ავადმყოფობას გალაკტიონი მუდამ გულით განიცდიდა, ინახულებდა, ანუგეშებდა და გაახალისებდა.

პოეტი, თეატრი და მუსიკა

სანახაობითი ხელოვნებიდან გალაკტიონი თეატრალური ცხოვრებით იყო გატაცებული. ჯერ კიდევ ახალგაზრდობის წლებში ქუთაისურ ურნალში „თეატრი და მუსიკა“. (მგონი, 1919 წ.) პოეტმა გამოაქვეყნა ჰამლეტისა და ოფელიას შორის დიალოგის პაროდია, რომელშიც თეატრის შესახებ თა-

ვისი მოსაზრებანი გამოხატა. არაერთხელ აირეკლა თეატრის შტრიხები მის პოეზიაში:

დღეს ნოტრ-დამთან (სნებიან
ფანტაზიის ნახატი)
კალენკორის ფრთებიან
ანგელოზებს ნახავდი
(„მისტერია წვიმაში“)

ან კიდევ:

გახსნილი არის კრება, ოპერა, ცირკი, კინო,
ხელთ აულია თეატრს უზარმაზარი ქნარო
(„ო, ნანა, ნანა, ნანა“).

ჭაბუკობიდანვე ოცნებობდა გალაკტიონი, დაეწერა დრამატული ნაწარმოები თეთრ ლექსად, მჭიდრო კავშირში ყოფილიყო დრამატურგებთან და თეატრთან. 1949—50 წლებში მარჯანიშვილის თეატრის კოლექტივმა მეტად ორიგინალური (სალონური) საღამო მოუწყო პოეტს. ასე დაიწყეს: ბნელით მოცულ სცენაზე გაჩნდა წითელი შუქწერტილი, რომელიც თანდათან გაიზარდა და სხივი მოჰფინა გალაკტიონის სახეს. აქეთ-იქით პოეტს მხარს უმშვენებდნენ დასის ლამაზმანები. განათდა ავანსცენაც და მონაწილეებმა წაიკითხეს მისალმებანი და ლექსები. ბოლოს გამოსვლა სთხოვეს გალაკტიონს. აუდიტორია მისგან ახალი ლექსების თქმას მოელოდა, შორეულ ფიქრებში წასულმა პოეტმა კი ჯერ წყნარი ხმით, შემდეგ კი აღფრთოვანებით გაუზიარა დამსწრეთ თავისი აზრები თე-

ატრალური ხელოვნების შესახებ. გაიხსენა პეტერბურგი 1917 წელს, მის მიერ დადგმული სპექტაკლი (პიესა „ტყე“), რომელიც მეტად მოსწონებია მაქსიმ გორკის.

* * *

შესანიშნავი მუსიკალური სმენა ჰქონდა გალაკტიონს. ხშირად საათობით უსმენდა საოპერო მუსიკას, კარგადაც იცნობდა და ხმადაბლა ლილინით აჰყვებოდა რადიოგადაცემას. სწორედ ამიტომ ვხვდებით ხშირად მის სტრიქონებში ოპერიულ გამოწვეულ ასოციაციებს:

იყო გრიგალი, იყვნენ ნგრევანი,
მაინც გადარჩა ჩრდილი ამხელა...
იქ ერთადერთი გრძნობა შიშველი
ალარ გაჰკივის სარაჯიშვილი.
(„ოპერის თეატრთან“)

როგორც ვხედავთ, ეროვნული საოპერო მუსიკა გალაკტიონის პოეზიის ერთ-ერთი მამოძრავებელი ძალაა და ეს კიდევ უფრო ნათლად ჩანს მის ლექსში „ის ღირიყორი“:

იყო უბრალო, მაგრამ მართალი
მისი სიმღერა და სიარული,
და სამუდამოდ იყო ქართული
მისი ჰიმნები გენიალური.
ის ახლობელი იყო სულ შორი,
გამბედაობით სავსე, ძლიერი,
უნდა გენახათ ის ღირიყორი
უღარებელი და მშვენიერი.

ამ ორ ლექსში მძაფრად ყლერს ქართული მუსიკის გარდასულ ქურუმთა სიმადლე და მშვენიერება, მათი წვა და მებრძოლი ხასიათი. გალაკტიონის ლექსებში ბეთჰოვენისა და ვაგნერის, მოცარტისა და შოპენის ქმნილებებით ალტაცებასთან ერთად გვხვდება ბურჟუაზიული ქალაქის საოპერო სპექტაკლის დაპირისპირება მშობლიური ქვეყნის ოპერასთან, სადაც იდგმება თუნდაც „ლაკმე“. ლექსში „ჭიანურები“ პოეტი კიდევ ერთხელ იგონებს პარიზს და მუსიკის რიტმით ექსტაზში შესული აცხადებს:

მიდის ოპერა „ლაკმე“,
ბუტაფორიის შეხლა

ხშირად ვიგონებ პარიზს...
ნახე იგი და დაგმე!
ნისლის, სულის და ქარის
ლაკმე, სადა ხარ ლაკმე!

მუსიკა რომ გალაკტიონის პოეზიის მძლავრი წყაროა, ეს აშკარაა მისი ლექსებიდან, სადაც ნახსენებია ლეგენდარული პინდარი, ორფეოსი და სხვ. განსაკუთრებით მძაფრ შთაბეჭდილებებს იწვევდა პოეტში სიმფონიური კონცერტები. მისი აზრით, ბეთჰოვენის მეცხრე სიმფონიაში ბევრია ქართული მელოდია:

სად ზღვის ქავლებია,
ყვავილთა მთოველი,
კვლავ ვხვდებით ერთმანეთს
მე და ბეთჰოვენი.
ოცნება მგონია,
სიზმარი მგონია...

ქართული მოტივი —
მეცხრე სიმფონია!...
(„მეცხრე სიმფონია“)

ასე პოულობდა სულიერ ნათესაობას მუსიკის მეტესთან, ბეთჰოვენთან, პოეზიის გვირგვინოსანი — გალაკტიონი.

სიმფონია, როგორც მუსიკალური ჟანრი, გალაკტიონის ლექსებში ხშირადაა ნახსენები. თავის ერთ-ერთ პოემასაც ხომ „ოქტომბრის სიმფონია“ უწოდა. საერთოდ, კლასიკურ მუსიკაში ხშირად პოულობდა გამოძახილს პოეტის ფიქრები და გუნებ-განწყობილება.

სამუსიკო ხელოვნების მკაცრი კონსერვატორების საყუარდლებოდ უნდა ითქვას, რომ გალაკტიონი დიდი სიამოვნებით ისმენდა ჯაზურ (თუ გნებავთ — საესტრადო) მუსიკას. საკმაოდ კარგადაც იცნობდა მის ჟანრებს და ქალაქის რიტმის ეპოქალურ გაგებასთან ერთად იუმორსა და გამამხნეველ ოპტიმიზს პოულობდა ამ ჰანგებში.

რამდენჯერ ვიყავი მოწმე, პოეტი რომ სიამოვნებით ისმენდა ძველებურ რომანსებსაც, ხანდახან თვითონაც მოსინჯავდა კლავიატურას ან გიტარის სიმებს, თან იტყოდა:

— საწყალი დედაჩემი უკრავდა კარგად გიტარაზე, თან საამური ხმით დამღეროდა.

სუფრული და საღალღობო ხალხური სიმღერები პოეტის ფიქრებს განუყრელად თან სდევდა: „დელი-დელა“, „მრავალ-ჟამიერი“, „გეშვია“, „ორთავ თვალის სინათლე“... მის ლექსებშიც ხომ ხშირადაა ჩართული ამ სიმღერების სახელები.

მაგრამ მკითხველმა ისე არ გაიგოს, თითქოს გალაკტი-

ონს ყოველგვარი მუსიკა და ან საკრავი მოსწონდა. პოეტს მეტად თავისებური შეხედულებანი ჰქონდა ამ მხრივ. დოღარმონისა და ზურნა-დუდუკის ხმები პოეტის ბაგეზე გაშქირდავ ღიმილსა და სატირულ თქმებს იწვევდა, სამიკიტნო მუსიკას ეძახდა. განსაკუთრებით ვერ იტანდა ბაიათის მოსმენას; უთუოდ სიცილი აუვარდებოდა და თუ რადიო იყო ამაში „დამნაშავე“ — გამოთიშავდა.

* * *

მუსიკა გალაკტიონის ლექსთა განუყოფელი ნიშანია, მისი პოეზია ჰანგებით სუნთქავს:

ვმლეროდი დამთვრალ ყვავილთა მტვერში,
ვმლეროდი ტრფობის ან მტრობის ხმაზე —
მსურდა ყოველში და ყველაფერში
მუსიკა, გრძნობა და სილამაზე.
მუსიკა, იგი! პოი, მგოსნებო...
(„მიყვარდა ჰანგი“).

აგერ ჰაგანინის აჩრდილი აბორგებულა ლექსში „ისევ ეფემერა“:

და ჰაგანინიც... ორგის ბადეს...
მესტრო თასით გადაჰკრავს ღვინოს;
ესტრადა ნათელ იმედად ბადებს
აშლილ ვალტორნებს და პიანინოს.
ის დანდობილი იღებს კიანურს
და სასახლეებს ჰაერში მოდებს,
რომ მხარეები შეაქიანოს
და ლეგენდები შორით ისმოდეს...

პარმონიულობა, ჰანგების სიახლე, მეტყველი აკორდები, ნოვატორული რიტმები და რითმები, რითაც ესოდენ მღ-დარია გალაკტიონის შემოქმედება, ეფუძნება ერთ დიდ ფაქტურას — მუსიკას.

მუსიკალური ჰანგების განსახიერებაა გალაკტიონის ლექსები: „ლურჯა ცხენები“, „ატმის ყვავილები“, „მუსიკა უეცარი“ და მრავალი სხვ. მუსიკის მელოდიით გამოწვეული პეიზაჟის ნათელხილვას განგვაცდევინებს — „მუსიკა უეცარი“, სადაც ახალი ხმის ჯადოსნური ძალა ვარსკვლავების, ყვავილების, ღრუბლიდან გამონაკრთობი მთვარის შუქისა და იღუმალეების ასოციაციებს იწვევს, შემდეგ კი:

ლავეარდოვან ტბის სარკეზე გასრიალდა ვერცხლის ნავი,
ოღნავ დასწვდა წყალს ნიჩაბი, ვით ნიავი, ვით ნიავი...
მთიდან ნისლი ჩამოცურდა, ნისლი ბნელი, ნისლი შავი,
და გაშალა ტბის სივრცეზე თმა—გიშერი, თმა—ნაწნავი.

მწველი იყო ის სიმღერა, ვით შუადღის ბრწყინვალება,
სადაც გრძნობა გზას პოულობს, სადაც ცეცხლი იმალება.

სხვათა შორის, ეს ლექსი რუსულად ვთარგმნე, გალაკტიონმა მომიწონა, ხელნაწერი დაიტოვა და მითხრა:

— ასეთი სახის ლექსი ძნელი სათარგმნია. მშვენივრად გაგიკეთებია, ჩანს, დინჯად მუშაობდი. იცი, მხოლოდ ის ნაწარმოები უნდა თარგმნოს კაცმა, რომელიც შეუყვარდება. მაშინ შედეგიც ასეთი კარგი იქნება.

გალაკტიონის ლექსებში გამეფებული მუსიკალობა ჯერ კიდევ ელოდება მძლავრი კომპოზიტორის მზრუნველ ხელს.

მართალია, პოეტის ზოგი ლექსი უკვე გადაღებულია ნოტებზე: „მერი“ (რომანსი), „უცნაური სასახლე“, „წყალტუბოდან ქუთაისში“, „მშობლიური ჩემო მიწავ“... მაგრამ ეს მხოლოდ ცდებია.

პოეტის ბიოგრაფიიდან

ქმნიდა თუ არა გალაკტიონ ტაბიძე პროზას, პუბლიცისტურ წერილებს, ნარკვევებს, თარგმანებს? ამ კითხვას ხშირად სვამენ ლიტერატურულ საუბრებში ჩვენი თაობის მკითხველები. დიახ, ქმნიდა! გალაკტიონის მრავალფეროვანი მოღვაწეობის უკეთ წარმოსადგენად გავიხსენოთ მისი ბიოგრაფიის ზოგი მომენტი:

გალაკტიონ ტაბიძე დაიბადა 1891 წ. (და არა 1892 წ., იხ. ფ. ნიშნიანიძე — „როდის დაიბადა გ. ტაბიძე?“ — გაზ. „თბილისი“, 19 ივლ. 1961 წ.) სოფელ ჭყვიშოში, ქუთაისის მახლობლად. ექვსი წლისამ დედისაგან ისწავლა წერა-კითხვა. ათი წლის ასაკში მომავალმა დიდმა პოეტმა ბაგრატის ისტორიული ტაძრის ნაშთებს მიუძღვნა ლექსი „ნანგრევთა საიდუმლო“.

1900—1908 წლებში პოეტი სწავლობდა რევოლუციით აბობოქრებულ ქუთაისში, სადაც მოსწავლე ახალგაზრდობა აქტიურ მონაწილეობას იღებდა მუშათა დემონსტრაციებში, მიტინგებში. ბაგრატის ტაძრის ნანგრევებში მოწყობილ შეამბოხეთა ერთ-ერთ შეკრებაზე გალაკტიონმა წაიკითხა თავისი ლექსი „პირველი მაისი“.

1908 წელს პოეტმა დატოვა ქუთაისი. საყვარელ ქალაქთან

განშორება გამოხატა ლექსით „ციხის ნანგრევები“ და თბილისში ჩამოსულმა ეს ნაწარმოები გამოაქვეყნა ჟურნალში „ფასკუნჯი“ (1909 წელს). ამ პერიოდის მის ლექსებში მკვეთრად აისახა 1905 წლის რევოლუცია და მისი დამარცხებით გამოწვეული სევდა.

ჯერ კიდევ მოწაფეობის წლებში, თბილისის სასულიერო სემინარიაში (1908 წლიდან) პოეტი ლექსებთან ერთად („გადანახული დროშები“ და სხვ.) წერდა მეფის დროინდელი სკოლის მკაცრი რეჟიმის წინააღმდეგ მიმართულ სატირულ ფელეტონებს და ბრძოლის მოწოდებით აღსავსე სტატიებს სემინარიის ხელნაწერ ჟურნალში „შუქი“. აქვე გვხვდება პოეტის მიერ შესრულებული ნახატებიც (კარიკატურა და სხვ.). მოწაფეთა ეს ორგანო ჩამოყალიბებული იყო გალაკტიონის ინიციატივით. ჟურნალი დღესაც წარმოადგენს საინტერესო ისტორიულ-ლიტერატურულ დოკუმენტს, საიდანაც ჩანს ცარიზმის დროინდელი სკოლის ცხოვრების ტიპიური სურათები, ჩინოვნიკურ-ბიუროკრატიული სულით გაყდენილი დირექციისა და ზოგ რეაქციონერ მასწავლებელთა უსულგულო, უხეში დამოკიდებულება მოზარდ თაობასთან, რელიგიის მოციქულთა თავგასულობა და ჯაშუშური საქციელი და სხვ. მაგრამ, რაც მთავარია, „შუქის“ ფურცლებიდან რისხვის ხმად გაისმის რევოლუციურად განწყობილი ქაბუკების ბრძოლის წყურვილი, მათი შეუპოვარი შემართება მაშინდელი მთავრობის კაბალის წინააღმდეგ.

ჟურნალ „შუქში“ გალაკტიონის გარშემო დარაზმული პროგრესულად მოაზროვნე ახალგაზრდების სახით იწრთო-

ბოდნენ მომავალი გადაწყვეტი ბრძოლების მოწინავე ძალები-
რევოლუციის ბარიკადების მეომრები.

გალაქტიონის ლექსები 1909 წლიდან იბეჭდებოდა ჟურნალ-
გაზეთებში: „ჩვენი კვალი“, „ფასკუნჯი“, „განათლება“, „პირ-
ველი ნაბიჯი“, „ლომისი“, „ამირანი“, „აზრი“, „ახალი კვალი“;
„თეატრი და ცხოვრება“, „საქართველოს მოამბე“, „თბილისი“;
„დროება“, „გრდემლი“, „საქართველო“, „თემი“.

ქუთაისის იუმორისტულ ჟურნალში „ჯოჯოხეთის მაშხალა“
1912 წ. დაიბეჭდა გალაქტიონის იუმორისტული ფელეტონე-
ბი „ნამწვავები“, „ძველი ქუდი“ და სხვა ნაწერები (ავტორის
ფსევდონიმით — „გალაშკა“). ხოლო 1914 წელს ქა-
ლაქ ქუთაისში გამოიცა მისი ლექსების პირველი კრებული-
რომელშიც შეტანილია: „მე და ღამე“, „მესაფლავე“, „განახლ-
და გული“, „გურიის მთებს“ და სხვ.¹

1915—1916 წლებში პოეტი მოსკოვში ცხოვრობდა. შემდეგ
ისევ საქართველოში დაბრუნდა.

თებერვლის რევოლუციის დროს, 1917-ში, გალაქტიონი პე-
ტერბურგშია. მაშინ შეიქმნა მისი ლექსი „დროშები ჩქარა“.
პოეტის შემოქმედებაში ნათელი განსახიერება პოვა თებერვ-
ლისა და დიდი ოქტომბრის სოციალისტურმა რევოლუციებმა.

ორი წლის შემდეგ გამოდის გალაქტიონის მეორე ლექსთა
კრებული „არტისტული ყვავილები“ (1919 წ.). ამ წიგნმა სა-
ხელი და დიდება მოუპოვა ახალგაზრდა პოეტს.

გალაქტიონი იყო რედაქტორი ჟურნალისა „ლომისი“.

¹ დაწერილებით; იხ. გ. მეფისაშვილი — „გალაქტიონ ტაბიძის პირვე-
ლი წიგნი“ (ჟურ. „რიონი“, ქუთაისი, 1959 წ. № 2).

(1921 წ.), რომლის ფურცლებიდან მოწინავე წერილებით მოუწოდებდა ქართველ მწერლებს, ჩამდგარიყვნენ ახალი დროის სამსახურში. 1922 წლის გაზეთ-ბიულეტენში „პოეზიის დღე“, როგორც ეს უკვე აღვნიშნეთ, გვხვდება გ. ტაბიძის მოწინავე წერილი (სათაურით: „პოეზიის დღე“), ხოლო ქართული წიგნის პალატაში ინახება წიგნი „ზაქარია ჭიჭინაძე“, რომელიც 48 გვერდს შეიცავს. საკატალოგო ბარათზე პოეტს მოგვიანებით, 1950-იან წლებში, თავისი ხელით წაუწერია: ტაბიძე გალაკტიონ (მონოგრაფია)¹.

მეტად ორიგინალური იყო პოეტის მიერ გამოცემული ჟურნალი „გალაკტიონ ტაბიძე“ (1923 წ.). ამ „აკაკის თვიური ჟურნალის“ ტიპის აღმანახში მოღვაწეობდნენ: დ. კლდიაშვილი, შ. არაგვისპირელი, ვ. ბარნოვი, გ. ქუჩიშვილი და სხვა გამოჩენილი მწერლები და პოეტები. ამავე დროს გალაკტიონი აქტიურად მონაწილეობდა ჟურნალ „მნათობში“, რომლის დაარსების ერთ-ერთი ინიციატორი თვითონ იყო.

პოეტის პირველი თხზულებათა სრული კრებული ერთ ტომად გამოიცა 1927 წელს. ამავე წელს გალაკტიონ ტაბიძემ მოსკოვში კომინტერნის მეექვსე კონგრესის დღეებში სხვა დელეგატებთან ერთად იმოგზაურა საბჭოთა კავშირის მნიშვნელოვან სამრეწველო ცენტრებში. შემდეგ დაწერა პოემა „ეპოქა“, რომ-

¹ ამ წარწერამ დააზუსტა ფსევდონიმი, რომელიც წიგნზე მანამდე იყო აღნიშნული: №№ (ნომენ ნესციო — ე. ი. სახელი უცნობია). გალაკტიონის ავტორობას ადასტურებს აგრეთვე გაიოზ იმედაშვილის და მწერალ ლეო ქიაჩელის ცნობები. პოეტი წერდა (1908—1922 წლებში) ფსევდონიმებითაც: „გალ. ტ-ბ-ძე“, „ტაბი“, „გა“, „გალაშკა“, „ახალი მწიგნობარი“ და სხვ.

მელიც მიეძღვნა ამერიკის, ინგლისის, იტალიის, ესპანეთის, ჩეხოსლოვაკიისა და სხვა ქვეყნების დელეგატებს (გამოაქვეყნა 1929 წ.). გალაკტიონის შემოქმედების ძირითად თემად გახდა დიდი ოქტომბრის სოციალისტური რევოლუციის შემდგომი პერიოდის მსოფლიო-ისტორიული მნიშვნელობის მოვლენები.

1933 წელს ხალხმა ტრიუმფით აღნიშნა პოეტის მოღვაწეობის 25 წლისთავი და საბჭოთა საქართველოს მთავრობამ გალაკტიონ ტაბიძეს საქართველოს სსრ სახალხო პოეტის წოდება მიანიჭა.

გალაკტიონი წარგზავნილ იქნა დელეგატად ანტიფაშისტურ მწერალთა I მსოფლიო კონგრესზე (1935 წ.) ქ. პარიზში. იქ პოეტი კონგრესის პრეზიდიუმის წევრად აირჩიეს.

1936 წ. პოეტს მოღვაწეობის 30 წლის იუბილე გადაუხადეს და ლენინის ორდენით დააჯილდოვეს.

დიდი სამამულო ომის წლებში გალაკტიონი მუშაობდა გაზ. „კომუნისტის“ რედაქციაში, აქტიურად მონაწილეობდა პერიოდულ ფურცლებზე „ხიშტით და კალმით“ და წერდა მებრძოლ ლექსებს ომის თემაზე.

1944 წელს გ. ტაბიძე არჩეულ იქნა საქ. სსრ მეცნიერებათა აკადემიის ნამდვილ წევრად.

1953—57 წლებში გალაკტიონი განაგებდა საქართველოს მწერლების კავშირის პოეზიის სექციას.

1953 წ. აღინიშნა გ. ტაბიძის დაბადების 60 წლისთავი. ხოლო 1958 წ. — სამწერლო მოღვაწეობის 50 წლისთავი.

რაც შეეხება თარგმანს, პოეტის შემოქმედებაში ნაკლებად გვხვდება. ნიმუშისათვის შეგვიძლია აღვნიშნოთ მხოლოდ ნაწყვეტი ვ. მაიაკოვსკის ლექსიდან, რაც ციტატის სახითაა ჩარ-

თული გ. ტაბიძის ლექსში „საუბარი ლირიკის შესახებ“. აი, ის სტრიქონებიც:

„გრამი შონისა ნაყოფია
წელთ მუშაობის,
მოღებულ იქნას და ერთ სიტყვად
უნდა გადადნეს
ათასეული ტონა მთელი
სიტყვიერ მადნის“.

ამრიგად, გალაკტიონის ლიტერატურულ მემკვიდრეობაში გვხვდება ბელეტრისტიკის, ჟურნალისტიკისა და თარგმანის ნიმუშებიც.

რაც შეეხება თვით გალაკტიონის ლექსთა თარგმანებს, მათზე დაყრდნობით „გალაკტიონის პოეზია: სამწუხაროდ, კავკასიონს ვერ გადაცდა. მაგრამ მისი ლექსები ისე ღრმად არიან შესული ქართული ენის უსიერ ტევრში, მეორე გალაკტიონია საჭირო, რომ ისინი აქედან გამოიყვანონ“ (კ. გამსახურდია).

პოეტის სიცოცხლის გოლო დღეები

ჩვეულებისამებრ შევიარე გალაკტიონთან შინ. საავადმყოფოში მეგულებოდა, მაგრამ კარი გამიღო, გადამეხვია და კაბინეტში შემიყვანა.

სციოდა. პალტო ეცვა. თავზე ბეწვის ქუდი ეხურა. სახე დაწმენდილი ჰქონდა, ლაწვებთან წვერი ოდნავ შეეკრიჭა. მომღიმარი, მაგრამ დაღლილი, მიმქრალი თვალებით მიცქეროდა. ხელის თითები უთრთოდა, საერთო სისუსტეს გრძნობდა, თითქოს ჰაერი არ ჰყოფნიდა. შევეკითხე: როგორ ბრძანდებით-მეთქი.

— ვერა ვარ კარგად, ჩემო გოგი! საშინელი იყო ჩემთვის საავადმყოფოს რეჟიმი. ავადმყოფების ცქერამ გული შემიღონა... ძალიან მომეწყინა. ადამიანი არავინ მყავდა გვერდში, რომ დავლაპარაკებოდი... როგორ არიან თქვენები, მამაშენი, დედა, კოლ-შვილი?

— გმადლობთ, არა უშავთ. თქვენი ნახვა მონატრათ ჩვენებს. მინდოდა საავადმყოფოში შესვლა, მაგრამ ქალაქში ვირუსული გრიპის გამო კარანტინი იყო...

— ვიცი, არ შემოგიშვებდნენ...

— იქნებ სოხუმს გაემგზავროთ?

— ვნახოთ, თუ კარგად ვიქენი, წავალ.

პაპიროსი მივაწოდე. მოვწიეთ.

— მე მინდა ზოგი რამ წაგიკითხო — მითხრა და მაგიდიდან რამდენიმე ხელნაწერი აიღო.

წამიკითხა თავისი შოგონებანი ძველ მოღვაწეებზე, რომელთაგან ზოგს პირადად იცნობდა, ზოგს სხვისი ნაამბობიდან იხსენიებდა...

ტელეფონის ყურმილი აიღო. ყურნალ „საბჭოთა ხელოვნების“ რედაქციაში დარეკა. ვერავის დაუკავშირდა, საქმისმწარმოებლის გარდა. მხიარულად გაესაუბრა და... ისევ მოიწყინა.

გამომშვიდობებისას განახევრებული კოლოფით პაპიროსი დავუტოვე.

— აბა, კარგად იყავი, არ დამივიწყო... შემოიარე, გავაკეთოთ რამე, საქმე ბევრია. ისევ შევუდგეთ მუშაობას. გამარჯვებით, არ დამივიწყო! — გულთბილად მითხრა გალაკტიონმა და ახლა, როდესაც ამ სტრიქონებს ვწერ, საბედისწერო მუ-

დარასავით ჩამესმის ყურში ეს სიტყვები, ცოცხალი გალაკტიონისაგან ჩემდამი უკანასკნელად ნათქვამი სიტყვები, რაც ისე ჩვეულებრივად მოვისმინე იმ დღეს, როგორც არაერთგზის მომისმენია.

დერეფანში გამომაცილა. კარი თვითონ გამიღო.

მომჯობინდება და ისევ შევუდგებით მისი ლექსების გამოცემას — ასეთი აზრი მამუვიდებდა და რკინიგზის ინსტიტუტში ლექციის წასაკითხად მივიჩქაროდი.

რას ვიფიქრებდი. ეს იყო გალაკტიონთან ჩემი უკანასკნელი საუბარი.

* * *

ველარ მომჯობინდა გალაკტიონი. რამდენიმე დღის შემდეგ გადაწყვიტა ისევ სამკურნალო კომბინატში წოლა. ფიქრობდა, რომ აღიდგენდა ძალ-ღონეს და თვითმფრინავით მოსკოვს გაემგზავრებოდა მწერალთა ყრილობაზე. ექიმები მიშველიან, გულის ტკივილს მოვირჩენ, მოვკეთდები და მგზავრობაში მხნედ ვიქნებიო, გადაუწყვეტია პოეტს...

13 ს, 30 წუთზე შევიდა საავადმყოფოს პალატაში. და იმავე დღის 5 თუ 6 საათზე იფერფლებოდა პოეტის გული, წუხდა. ბორგავდა, ჰაერი არ ყოფნიდა. ფანჯარას და აივანს აშურებდა ავადმყოფი, თავბრუ ეხვეოდა... სრულიად ფხიზელი გონება თანდათან ინისლებოდა... მეოთხე სართულიდან გადმოვარდა, გულშეღონებული.

თითქოს საბედისწეროდ მოევლინა დიდ გალაკტიონს რიკხვი ჩვიდმეტი. დაიბადა 1891 წლის 17 ნოემბერს, ტრაგიკულად გარდაიცვალა 1959 წლის 17 მარტს.

ძაძებით შეიმოსა მწერალთა სასახლე. საქართველოს ყოველი კუთხიდან ზღვა ხალხი ნაკადად მიედინებოდა. ემშვიდობებოდნენ გალაკტიონ ტაბიძის ნეშტს. მშობლებს მოჰყავდათ ბავშვები, რომ უკანასკნელად ეჩვენებინათ ჩვენი საუკუნის მართლაც დიდი კაცის სახე.

წარწერებიანი გვირგვინებითა და თაიგულებით აივსო დარბაზები. საპატოო ყარაულში ერთმანეთს ცვლიდნენ მწერლები, მეცნიერები, პასუხისმგებელი მუშაკები, შორეული სტუმრები.

განსაკუთრებით განიცდიდა წუხილს ახალგაზრდობის ის ნაწილი, რომელიც პირადად იცნობდა პოეტს. ისინი წესრიგს იცავდნენ პანაშვიდებზე, ღამეს უთევდნენ მიცვალებულს და სახიდან თაბაშირის ნილაბიც კი გადააღებინეს ამ საქმის ოსტატს.

თბილისში ყვავილები აღარ იშოვებოდა. სახალხო გლოვა მოედო ქალაქებსა და სოფლებს, იმართებოდა სამგლოვიარო მიტინგები.

21 მარტს 4 საათზე გალაკტიონის ნეშტი გამოასვენეს. საბლების ფანჯრებიდან, აივნებიდან, სახურავებიდან გადმომდგარნი ემშვიდობებოდნენ, ტიროდნენ...

ქუჩებში ტევა აღარ იყო. ტრანსპორტის მოძრაობა შეწყდა. მთაწმიდის კალთები, ფუნიკულიორის ბანი და აივანი ხალხით დაიხუნძლა. წესრიგის დამცველნი ვეღარ აკავებდნენ ადამიანთა ტალღებს. გლოვის ზარად გუგუნებდა მიწა მოქალაქეთა ფეხქვეშ.

დროგამოშვებით მთიდან ისმოდა უზარმაზარი რადიორეპროდუქტორების ხმა. დიქტორი სთხოვდა ხალხს, არ შეეშალა ხელი პროცესიის სწორად მსვლელობისათვის, არ გაეთელათ ერთმანეთი და პანთეონი. მიეცათ მუშაობის საშუალება კინოოპერატორებისათვის.

პანთეონში გამართულ მიტინგზე გულში ჩამწვდომი სიტყვებით გამოვიდნენ ქართველი პოეტები, მეცნიერები, მოძმე რესპუბლიკების საზოგადო მოღვაწენი...

ჟურნალ-გაზეთები, რადიო, ტელევიზია, ფოსტა-ტელეგრაფი გალაკტიონის სახელს ატარებდა ქვეყანაზე, ეთერში და პოეტი თავისი ლექსის ჩაუმქრალი თვალებით მარად ცოცხალი ბუმბერაზივით აღზევებული გასცქეროდა სამყაროს.

* * *

კლასიკოსი პოეტის შემოქმედების შესაფასებლად, მისი სახელის უკვდავსაყოფად ჩვენმა სახელოვანმა მწერლებმა და მოღვაწეებმა არაერთი პირდაპირი მოსაზრება გამოთქვეს.

მოხდენილად სთქვა ერთმა გამოჩენილმა მეცნიერმა: „გალაკტიონის წიგნებისათვის ყველაზე უკეთესი წინასიტყვაობა იქნება შიგ შეტანილი ლექსების სარჩევი“...

დღეს გალაკტიონის სახელი და სურათი ამშვენებს წიგნებს, ჟურნალ-გაზეთებს, კლუბებს, თეატრებს, სკოლებს, ქუჩებს, ლიტერატურულ წრეებს. მისი პოეზიის შესახებ იწერება სამეცნიერო დისერტაციები, პოეტის ცხოვრება აისახა მონოგრაფიებში, მოგონებებში, მემუარებში, ნარკვევებში, ლექსებში.

არაერთმა მხატვარმა და მოქანდაკემ გააცოცხლა ფერსა და ქვაში ქართული პოეზიის მედროშის სახე.

ქუთაისში 1961 წლიდან მუშაობს საქართველოს ერთ-ერთი უდიდესი საწარმო — გ. ტაბიძის სახელობის სტამბა.

თბილისში, ვაჟა-ფშაველას პროსპექტზე, გალაკტიონ ტაბიძის სახელობის კარგად მოწყობილ წიგნების მალაზიას ახალგაზრდები ემსახურებიან.

დღესასწაულებში რუსთაველის ძეგლთან კი ცისფერი შუქ-წერით კაშკაშებს გალაკტიონის სიტყვები:

„რევოლუციურს, ჯერ არნახულს, ჯერარ გაგონილს,
ვაშა ამ დიად საქართველოს, ვაშა შენებას!“

ამ მეტყველი ლამპიონიდან გადმოღვრილ სხივთა აჩრდილი თითქოს გზას უნათებს გალაკტიონის გიგანტურ გემს, რომელიც მსოფლიო ოკეანეებს სერავს და იერიქონის მძლეთამძლე საყვირით გასძახის სამყაროს მარადისობას.

* * *

როდესაც წლების განმავლობაში დიდი პოეტის შესახებ ნაგროვები ჩანაწერები ბლოკნოტებიდან, დღიურებიდან, თაბახისა თუ საშრობი ქალაღლებიდან... პაპიროსის კოლოფების თავსახურიდანაც კი გადავათეთრე და სულხან-საბა ორბელიანის სიტყვით რომ ვთქვათ, „ჩალხი ვკარ“, სხვაზე მეტად ერთმა უხერხულობამ დამაღონა, თითქმის ყველა ზმნა აწმყოდან ნამყო დროში გადავიდა, რადგან გალაკტიონ ტაბიძე ცოცხალი აღარ იყო.

ახლა კი მესმის, რატომ წარმოსთქვამდა ხანდახან გალაკტი-

ონი მისთვის ძვირფასი შენობების სადღეგრძელოს. სალოცავ ტაძრებად მესახება დღეს ის სახლები, სადაც მასთან ვმუშაობდი, ვსაუბრობდი. განსაკუთრებით მიყვარს მარჯანიშვილის ქუჩაზე მისი ყოფილი ბინა და ქ. კობერიძის ბინა საიუველირო მალაზიის პირდაპირ.

და როგორც გალაკტიონის შესახებ ვწერ ან სადმე ლექციას ვკითხულობ, იმ დღეს ვალმოხდილად, დამშვიდებულად ვგრძნობ თავს, როგორც ბერი გულმხურვალე ლოცვის შემდებ...

ამ წიგნს რომ ვწერდი, ზოგი მასალა (თარიღები და სხვ.) დამაზუსტებინეს გ. ტაბიძის მეუღლე ნინომ, ქართული წიგნის პალატის მუშაკებმა: თინათინ ნაკაშიძემ, ლევან მალაზონიამ, ნანული ახობაძემ, პროფესორებმა: ვარლამ დონდუამ, დიმიტრი ჯანელიძემ... მოწიწებით მადლობას მოვახსენებ მათ. გალაკტიონზე სათქმელი დიდხანს არ გამომეღევა.

გულთამხილველი მკითხველი გამიგებს, თუ რაოდენ ძნელია წერა ისეთი ბუმბერაზი პოეტის, მასწავლებლისა და მეგობრის შესახებ, როგორიც იყო გალაკტიონი... რადგან ლიტერატურული მოვალეობის გრძნობასთან ერთად არის მუსიკალური ნიუანსივით უფაქიზესი, სამყაროსავით უსაზღვრო და მარადიული პოეტური ხილვა, რომელსაც ვერასოდეს გამოხატავს მარტოოდენ სიტყვა.

რედაქტორი გ. ნატროშვილი
გამომცემლობის რედაქტორი ლ. ნანიტაშვილი
მხატვრები: ო. ქოჩიაძე ი. ჩიქვაძე, ა. სლოვინსკი
მხატვრული რედაქტორი გ. ქუთათელაძე
ტექნიკური რედაქტორი ლ. პაპკორია
კორექტორი ლ. არჩვაძე

ხელმოწერილია დასაბეჭდად 30/XII-65 წ.
ქალ. ზომა 70×108¹/₃₂. ნაბეჭდი თაბახი 6,85.
სააღრ.-საგამომც. თაბახი 5,52.
უე 02735. ტირაჟი 3000. შეკვ. № 1008.

ფასი 44 კაპ.

გამომცემლობა „საბჭოთა საქართველო“
თბილისი, მარჯანიშვილის ქ. № 5.

მე-4 სტამბა, თბილისი, მედქალაქი
Иллюстрация № 4, Тбилиси, Медгородок